

ბ. გუაჩიძე

კანობელი



ბავოგციფლოზა „ბანათლიბა“
თბილისი — 1977

36(3)
ბ, 361

ნაშრომში II პუნქტური ომის ფონზე ასახულია ქველი მსოფლიოს ერთ-ერთი უდიდესი მხედართმთავრის, კართაგენელი ჰანიბალის ცხოვრება და მოღვაწეობა, მისი ბრძოლა რომის რესპუბლიკის წინააღმდეგ.

წინათქმა

ჰანიბალზე, გენიალურ კართაგენელ სარდალზე, სხვადასხვა თვალთახედვით უამრავი ნაშრომი დაიწერა. ბრწყინვალე სამხედრო გენიის წყალობით მან უფსკრულის პირას მიიყვანა აღმავლობის გზაზე მდგარი რომის რესპუბლიკა, რომელსაც შემდგომში აღარასოდეს დამუქრებია ესოდენ სერიოზული სასიკვდილო საფრთხე. ჰანიბალია II პუნიკური ომის მთავარი ფიგურა. ეს ომი I პუნიკური ომის გაგრძელება იყო. ხოლო III პუნიკური ომი — წინა ორი ომის ლოგიკური შედეგი. კართაგენი დაემხო. იგი დაანგრიეს და გადახნეს. ამიერიდან მისა სახელი ისტორიის კუთვნილებულა გახდა. რომმა გაიმარჯვა ტოტალურ ომში. მან გზიდან ჩამოიცილა მრისხანე მოწინააღმდეგე. ამიერიდან დიდხანს რომის იარაღის ტრიუმფული შარში უზრუნველყოფილი იყო, მაგრამ ინტერესი პუნიკური ომებისადმი, კერძოდ კი II პუნიკური ომისადმი, დღემდე არ განელებულა, რადგან ამ ომში კართაგენელებს რომის წინააღმდეგ წინ მიუძღოდა უბადლო სარდალი, რომლაც გვერდზეც კაცობრიობამ ხელზე ჩამოსათვლელ სულ რამდენიმე სახელს მიუჩინა ადგილი. და მიუხედავად იმისა, რომ დიდი კართაგენელის მოწინააღმდეგე სციპიონ აფრიკელი უდავოდ ნიჭიერი მხედართმთავარი იყო, პირუთვნელმა მატიაანემ გენიალურ სარდალთა თანაგარსკვლავედში მისი სახელი არ შეიტანა.

ჰანიბალის შემდეგ ისტორიამ მრავალი ნიჭიერი მხედართმთავარი წარმოშვა, მაგრამ არც ერთ მათგანს არ დაუჩრდილავს კართაგენელი სარდლის სახე. ჰანიბალმა დიდი გავლენა იქონია მის მომდევნო თაობებზე. ძნელად თუ შეხვდებით ისეთ პოლიტიკურ თუ სამხედრო მოღვაწეს, რომელსაც გვერდი აევილოს ჰანიბალისათვის. ჰანიბალმა სრულიად დამსახურებულად მოაპოვა გენიალური სარდლის სახელი. სპეციალისტები განცვიფრებულნი არიან მი-

სი სამხედრო ხელოვნებით, ჰკუით, გაბედულებით. ჰანიბალს სწავ-
ლობენ როგორც პოლიტიკურ მოღვაწეს, სტრატეგს, ტაქტიკოსს.

ქართულ ენაზე არ გვაქვს ჰანიბალისადმი მიძღვნილი ცალკე
ნაშრომი, თუმცა აქვე ხაზგასმით გვინდა აღვნიშნოთ, რომ პროფ.
ლევან სანიკიძის დამხმარე სახელმძღვანელოში „ანტიკური ქვეყნე-
ბის ისტორია, პუნიკური ომების ეპოქა“ (თბილისი, 1963), საინტე-
რესოდ და ვრცლადაა გაშუქებული ჰანიბალის ცხოვრება და მოღ-
ვაწეობა.

ნაშრომში სქემები და ილუსტრაციება გამოვიყენეთ შემდეგი
გამოცემებიდან: Е. А. Разин. „История военного искусства“, т. I,
М., 1955; И. Ш. Кораблев. Ганнибал. М., 1976. Тит Ливий.
Война с Ганнибалом. Москва, 1968; Денисон. „История конни-
цы“, I, С.-Петербург, 1897. თარიღები მითითებულია ქველი
წელთაღრიცხვით.

წყაროები და ისტორიოგრაფია

პანიბალის შესახებ ცნობებს გვაწვდიან ანტიკური ავტორები: პოლიბიოსი, ტიტუს ლივიუსი, პლუტარქე, აპიანე, ფლორუსი და სხვ. პოლიბიოსი წერს, ისტორიკოსის დანიშნულება ის კი არ არის, რომ უცნაური ამბებით მკითხველი შეაძრწუნოს, არც ის, რომ მართლის მსგავსი ამბები გამოიგონოს, არამედ ის, რომ ზუსტად აღწესდეს, რაც სინამდვილეში მოხდა ან ითქვაო!

თავისი ისტორიის სარწმუნოების შესახებ პოლიბიოსი ამბობს, იმიტომ ვწერ ასე დაბეჭითებით პუნიკური ომების შესახებ, რომ მრავალი ცნობა ომის მონაწილეებმა გადმომცეს და ბრძოლის ადგილება თვითონ მინახავსო.

ტიტუს ლივიუსი ძირითადად პოლიბიოსს ეყრდნობა, ზოგჯერ მეტისმეტად გულუბრყვილოდ ხსნის მოვლენების მიზეზებს, მაგრამ მხატვრულად აგვიწერს მეორე პუნიკური ომის ისტორიას, რომელშიც აგრერივად გამომეღაუნდა პანიბალის გენიალური ნიჭი და უნარი: „მე მოგითხრობთ მსოფლიოში დღემდე მომხდარ ყველაზე დიდი ომის ამბავს, — წერს იგი — მეორე პუნიკური ომის ამბავს, — რომელსაც კართაგენელები გენიალური სარდლის მეთაურობით დიდხანს ეწეოდნენ რომაელი ხალხის წინააღმდეგ.

მანამდე ბრძოლის ველზე არასოდეს შებზულან ესოდენ მძლავრი და საუკეთესოდ აღჭურვილი სახელმწიფოები ან ტომები. ამასთან, მოწინააღმდეგეებმა კარგად გაიცნეს ერთმანეთი პირველ პუნიკურ ომში, ოცდასამი წელი რომ გაგრძელდა და ბოლოს რომის გამარჯვებით დაითავრდა. ომის ბედი იმდენად ცვალებადი იყო, რომ ხშირად გამარჯვებული უფსკრულის პირას იდგა, ორივე

¹ Полибий. Всеобщая история в сорока книгах. Перевод с греческого Ф. Г. Мищенко. Т. I, Москва, 1890, с. 276.

შსრივ ძალები განუზომელი იყო, ხოლო ურთიერთიზიზილი კიდევ უფრო მეტი².

აპიანეს შესახებ კ. მარქსი ფ. ენგელსისადმი მიწერილ წერილში აღნიშნავდა: „საღამოობით, დასასვენებლად ვერთობოდი აპიანეს „სამოქალაქო ომებით რომში“; ბერძნულ ორიგინალში. შეტად ძვირფასი წიგნია. შთამომავლობით იგი ეგვიპტელია. შლო-სერი ამბობს, რომ მას „სული არა აქვს“. ალბათ იმიტომ, რომ იგი ცდილობს ჩაწვდეს ამ სამოქალაქო ომების მატერიალურ საფუძვლებს“³.

პლუტარქეს ცნობები სავსეა შეთხზული ამბებით, მაგრამ მისი „პარალელური ბიოგრაფიები“, კრიტიკულად განხილული, ფრიად ძვირფასი მასალაა ჰანიბალის მთლიანი პორტრეტის დასადგენად.

ბურჟუაზიული ისტორიოგრაფია ანტიკური ისტორიის შესწავლას საქმეს საკუთარი კლასობრივი პოზიციებიდან უდგება.

ცნობილი ბურჟუაზიული მეცნიერი თ. მომზენი კართაგენში კაპიტალისტურ წყობილებას ხედავს⁴.

ბურჟუაზიული მეცნიერების უმრავლესობა განსაკუთრებულ ყურადღებას ამხვეილებს ყოველავე ბერძნულსა და რომაულზე, მაშინ როდესაც ანტიკური სამყაროს დანარჩენ ხალხთა ისტორიის ძირითადი საკითხები ზოგჯერ შეუსწავლელი რჩებათ⁵.

ჰანიბალის სამოგლობო — კართაგენი

1975 წლის ივლისში პრესა იტყობინებოდა, რომ კანადის ქალაქ ბრომტვილის მახლობლად (კვებეკის პროვინცია) აღმოაჩინეს სამი ქვა ლიბიური წარწერებით, რომლებიც გაშიფრა ჰარვარდის უნივერსიტეტის პროფესორმა ჰოვარდ ფელმა. მასში ნათქვამია:

² Тит Ливий. Война с Ганнибалом. С латинского пересказал Симон Маркиш. М., 1968, с. 4.

³ ს. ო. კოვალისკი, მარქსი და ენგელსი ანტიურობის შესახებ. თბილისი, 1937, გვ. 242.

⁴ Т. Моммзен. История Рима. Т. I. Москва, 1936, с. 470.

⁵ Е. М. Штаерман. Современная американская литература по истории Древнего Рима. Вестник древней истории, № 4, 1949, с. 201—203.

„ექსპედიცია, რომელმაც შირამ ღმერთის ნებით გადასცურა ოკეანე, რათა ხელთ ეგდო ტერიტორია“.

„ხატამ, რომელმაც მდინარით მიადწია ამ ადგილს, ღუზა ჩაუშვა და წარწერა გააკეთა ამ ქვაზე“;

„ხანომ, ტამუს შვილმა, მიადწია ამ ადგილს მთაზე“⁶.

მეცნიერ-არქეოლოგის, ლავალის უნივერსიტეტის პროფესორის ტ. ლის აზრით, კეებეკის პროვინციაში აღმოჩენილი წარწერები მოწმობენ, რომ კართაგენის მცხოვრებლები ჩრდილოეთ ამერიკაში ჩასულან 1992 წლით ადრე, ვიდრე ამერიკას კოლუმბი აღმოაჩენდა.

ამ სენსაციურმა ცნობამ კიდევ ერთი კორექტივი შეიტანა ჩვენს ცოდნაში ამერიკის აღმოჩენის შესახებ.

კართაგენის რამდენი საუკუნე იმპლაგრა მან ხმელთაშუაზღვეთის აუზში. რამდენმა მოწინააღმდეგემ მოიხარა ქედი მის წინაშე. თითქოს უბრალო შემთხვევის წყალობით აღმოცენდა ეს პატარა ფინიკიური კოლონია, რომელიც შემდეგ უძლიერეს სახელმწიფოდ იქცა.

კართაგენი ტვიროსელებმა დააარსეს. თვით ტვიროსი კი ტროას დანგრევამდე ერთი წლით ადრე დაუარსებიათ სიდონელებს.

თანამედროვე ისტორიოგრაფიაში გამოთქმულია მოსაზრება, რომ ტვიროსი დაანგრიეს „ზღვის ხალხებმა“, მაგრამ შემდეგ სიდონელებს იგი აღუდგენიათ. ხელსაყრელმა გეოგრაფიულმა და სტრატეგიულმა მდებარეობამ განაპარობა ტვიროსის გაძლიერება.


პროფ. ი. შიფმანი იმოწმებს აპიანეს ცნობას, რომელიც გადმოგვცემს, კართაგენი ფინიკიელებმა დააარსეს ტროას დაცემამდე ორმოცდაათი წლით ადრე⁷. იქვე შიფმანს მოჰყავს აპიანეს მეორე ცნობა, რომელიც, თავის მხრივ, მიუთითებს კართაგენულ და რომაულ წყაროებზე, და წერს, რომ კართაგენი დააარსა ტვიროსის მეფის ასულმა დიდონა-ელისამ, რომელიც დამარცხდა თავის ძმასთან — პიგმალიონთან ტახტისათვის ბრძოლაში.

საინტერესოა ერთი გადმოცემა ელისას შესახებ: „მეფას ასულს ფინიკიურად ელისა ერქვა და ტვიროსელი მეფის პიგმალი-

⁶ გაზ. „კომუნისტი“, 1975, 27. VII. № 175.

⁷ И. Ш. Ш и ф м а н. Возникновение Карфагенской державы. М.—Л., 1963, с. 37—38.

ონის და იყო; როცა ქმარი მოუკლეს, თავისი ქონება ხომალდზე დატვირთა და რამდენიმე მოქალაქესთან ერთად სამშობლოს განშორდა. მრავალი გასაჭირის გადატანის შემდეგ ლიბიის სანაპიროს მიაღწია. ადგილობრივმა მცხოვრებლებმა ელისას დიდონა შეარქვეს. მან დააარსა დასახელებული ქალაქი»⁸.



ქართაგენი.

ელისასთვის ცოლობა უთხოვია ლიბიელთა მეფეს. ამ შეუღლებებისათვის შხარი დაუქვრიათ ელისა-დიდონას თანამოქალაქეთ. მავრამ ქალს უარი უთქვამს, აღუმართონებია კოცონი და მასში ჩანთქმულა⁹.

ისტორიამ ქართაგენის დაარსების რამდენიმე თარიღი შემოგვინახა. ესენია: 814 წ., 824 წ. და 826 წ.

⁸ ი. შ. შიფმანი, დასახელებული ნაშრომი, გვ. 38.

⁹ იქვე.

პროფ. ი. შიფმანი, ყველა მონაცემების ანალიზის საფუძველზე, კართაგენის დაარსების თარიღად თვლის 825 წელს.

თუ როგორი იყო კართაგენის სახელმწიფო წყობა ამ დროს, ბურუსითაა მოცული. ელისა-დიდონა მეფეა. აქვე არის სენატი და სახალხო კრება.

VII ს-ის მეორე ნახევარში კართაგენმა გატეხა ფინიკიური ქალაქის გაღვსას წინააღმდეგობა ესპანეთში, რის შემდეგაც სხვა ფინიკიური კოლონიებიც იგდო ხელთ. ამის შემდეგ ესპანეთში დიდი ხნის განმავლობაში ქ. ტარტესი მარტოდმარტო ებრძოდა კართაგენელებს. შემდეგ მათ დაუკავშირდნენ ფოკეელები, რომლებიც საზღვაო ბრძოლებში ამარცხებდნენ ხოლმე კართაგენელებს.

კართაგენელების პოლიტიკის შესახებ სიცილიაში VII—VI საუკუნეებში მეტად მცირე ცნობები გვაქვს. კართაგენელთა ჯარების სათავეში ყოფილა მალხი, რომელიც დაახლოებით VI საუკუნის 60—50-იან წლებში ცხოვრობდა. მალხი დამარცხებულა სარდინიაში და კართაგენის ხელისუფალთ განდევნა მიუსჯიათ, რის წინააღმდეგაც წასულა ჯარი. შემდეგ მალხს ხელთ ჩაუგდია ძალაუფლება, მაგრამ მისთვის ბრალი დაუდევიათ მეფის ხელისუფლების უზურპაციაში და დაუმხიათ.

მალხის შემდეგ ხელისუფლებას სათავეში მოქცევია მაგონი, რომელსაც ბოლომდე მიუყვანია კართაგენის სახელმწიფოს შექმნის საქმე. მას აქტიური მონაწილეობა მიუღია მალხის დამხობაში და ხალხთა მასების ანტიოლიგარქიული მოძრაობის ჩახშობაში. მაგონის სახელს უკავშირებენ დაქირავებული არმიის შექმნას, რომელიც, ცხადია, უფრო ძლიერი იყო სახელდახელოდ შეგროვილ სახალხო ლაშქარზე და თვისებრივად განსხვავდებოდა მისგან. ამის შემდეგ სახალხო ლაშქარი მცირე როლს ასრულებდა. დაქირავებული ჯარის შექმნა და მისი დაქვემდებარება არა სახელმწიფოსადმი, არამედ პირადად სარდლისადმი, ამ შემთხვევაში მაგონისადმი, საშუალებას აძლევდა მხედართმთავრებს ხელთ ეგდოთ მძლავრი იარაღი. დაქირავებული არმია კართაგენში გახდა უმნიშვნელოვანესი პოლიტიკური ძალა. მაგონის რეფორმა ანტიდემოკრატიული იყო, რადგან დაქირავებული ჯარის შექმნამ ხელსუფლებას ჩამოაშორა კართაგენის პლებსი.

535 წელს კართაგენისა და ეტრუსკების გაერთიანებულმა ფლოტმა დაამარცხა ფოკეელების ფლოტი, რის შემდეგაც ბერძნები იძულებული გახდნენ ესპანეთი დაეტოვებინათ. ტარტესი იზოლირებული აღმოჩნდა.

ბერძნები შეეცადნენ ფეხი მრეკიდებინათ ფინიკიურ-კართაგენულ გავლენის სფეროში. სპარტის მეფე დორიევსმა ერიქსთან დააარსა კოლონია პერაკლეა. კართაგენმა ეს თავისი ინტერესებისათვის მუქარად ჩათვალა და ომი დაიწყო პერაკლეას წინააღმდეგ. მას ამ ომში მხარს უჭერდნენ ეგესტა და სიცალიის ქალაქები. პერაკლეას წინააღმდეგობა გატეხეს. დორიევსი დამარცხდა.

ირანელთა შექრამ საბერძნეთში V საუკუნეში მნიშვნელოვნად შეცვალა მდგომარეობა დასავლეთ ხმელთაშუაზღვეთში. გაჩნდა რეალური საფრთხე, რომ სპარსელები ჯერ კამბისესის მეფობის დროს, ხოლო შემდეგ დარიოსისა და ქსერქსეს დროს გაილაშქრებდნენ კართაგენის წინააღმდეგ, მაგრამ, სხვადასხვა მიზეზის გამო, სპარსეთის ეს განზრახვა ჩაიშალა.

V ს-ის შუახანებში კართაგენი მეტად რთული სახელმწიფო ორგანიზმი იყო. კართაგენის ხელისუფალნი ყოველმხრივ ცდალობდნენ, რომ მათი ქვეშევრდომნი არ გაერთიანებულიყვნენ მეტროპოლიის წინააღმდეგ და ამას დიდხანს წარმატებითაც ახერხებდნენ. კართაგენს მათთან სხვადასხვა ურთიერთობა ჰქონდა: ზოგი მისი მოკავშირე იყო, ზოგი კოლონია; ხოლო ზოგი მის პროტექტორატში შედიოდა. ყველაზე უუფლებო ნაწილს შეადგენდნენ ე. წ. „ქვეშევრდომნი“. ამ კატეგორიას ძირითადად ეკუთვნოდნენ ლიბიელები. კართაგენის არმიის ლიბიელები ძალდატანებით მიჰყავდათ, მაშინ როცა იბერები ან მოკავშირეები, ან თავისუფლად დაქირავებულნი იყვნენ.

კართაგენის პოლიტიკური წყობა სხვადასხვა დროს სხვადასხვა ყოფილა. მაგალითად, VI ს-ის ბოლოს და V ს-ის შუახანებში ქვეყანაში სამხედრო დიქტატურა იყო. V ს-ის მეორე ნახევარში კართაგენის მონათმფლობელურმა ოლიგარქიამ შექმნა 104-ის საბჭო, რითაც შეზღუდა მხედართმთავართა დიქტატურა.

კართაგენის უმაღლესი მაგისტრატები იყვნენ სუფეტები, რაც ბერძნულ „მეფეს“ ეთანაბრება. ერთი ვადით ირჩევდნენ ორ სუფეტს. ძალაუფლებას ეს დანაწილება აბრკოლებდა ერთმმართ-

ველური დიქტატურის დამყარებას. სუფეტებს არ ჰქონდათ სამხედრო ძალაუფლება, არ შეიძლებოდა ორივე სუფეტი ერთი გვარისა ყოფილიყო. არისტოტელე ამაში ხედავდა კართაგენელთა სახელმწიფო წყობილების დიდ უპარატესობას. იგი კართაგენელთა სახელმწიფო წყობილებას ლაკედემონელებისას აღარებს, სადაც „ზოგიერთი ელემენტი დემოკრატიისაყენ იხრებოდა, ხოლო ზოგიერთი — ოლიგარქიისაყენ“¹⁰. ა. ვ. მიშულინი ასეთ წყობილებას მონათმფლობელურ-ოლიგარქიულ-ფედერაციულ რესპუბლიკას უწოდებს¹¹.

ოლიგარქიული ხელისუფლების ორგანოები რეორგანიზებულ იქნა. ათის საბჭო გაზარდეს ოცდაათის საბჭოდ და ის იქცა კართაგენის უმაღლეს ორგანოდ. მის ფუნქციებში შედიოდა საგარეო საქმეებიც. ყველა უმნიშვნელოვანეს საკითხზე სუფეტებთან ერთად გადაწყვეტილებას იღებდა უხუცესთა საბჭო, რომლის წევრთა რიცხვი 100-დან 300 კაცამდე აღწევდა.

კართაგენში მნიშვნელოვან როლს ასრულებდა ხუთის კოლეგია — „პენტარქია“, რომლის ფუნქციაც იყო 104-ის საბჭოს წევრების დანიშვნა. პენტარქიები სოციალური ბუნებით ოლიგარქიული ხელისუფლების ციტადელებს წარმოადგენდნენ.

დემოკრატიულ ორგანოებს კართაგენში არ ჰქონდათ რაიმე სერიოზული ძალა. სახალხო კრების მთავარი ფუნქცია იყო მაგისტრატების არჩევა, მაგრამ რადგან არჩეული პირი წარჩინებული და მდიდარი უნდა ყოფილიყო, პლებსს არ ჰქონდა საშუალება რომელიმე თანამდებობაზე თავისი წარმომადგენელი დაენიშნა. წამდვილ ძალაუფლებას სახალხო კრება მხოლოდ მაშინ იღებდა, როცა ორ ოლიგარქიულ ჯგუფს შორის უთანხმოება წარმოიშობოდა. ასეთ შემთხვევაში იგი უმაღლესი განმკარგულებელი ორგანო ხდებოდა.

„ჩვენ არ ვიცით არც ერთი შემთხვევა, — წერს პროფ. ი. შიფმანი, — რომ სახალხო მასები, თვით ყველაზე უფრო ძლევაგამოსი-

¹⁰ А р я с т о т е л ь. Политика. Перевод С. А. Жебелева. Кн. II, гл. 8, 2—8. См. Струве В. В. Хрестоматия по древней истории, т. II, с. 41.

¹¹ Мишулин А. В. Карфагенская держава до пунических войн. ВДИ, № 4, 1948, с. 38.

ლებს პერიოდში III—II საუკუნეებში, რომელაჲე ოლიგარქიული ხროვის თანამგზავრნი არ ყოფილიყვნენ“¹².

სოფლის მეურნეობის ძირითადი რაიონი კართაგენში იყო მდ. ბაგრადის ველი, სადაც კართაგენელ არისტოკრატებს დიდი მამულები ჰქონდათ. მიწას ამუშავებდნენ მონები, ან ადგილობრივი ლუბიელები. სოფლის მეურნეობა რაციონალურად იყო მოწყობილი. კ. მარქსი ამის შესახებ წერს: „ის სიწმინდე (აბსტრაქტული გარკვეულობა), რომლითაც მოვაჭრე ხალხები — ფინიკიელები, კართაგენელები, ძველს ქვეყანაში გამოჩნდნენ, სწორედ მიწათმოქმედ ხალხთა გაბატონების მიზეზითაა მოცემული. კაპიტალი სავაჭრო ან ფულადი სახით ჩნდება სწორედ ამ აბსტრაქციაში იქ, სადაც კაპიტალი ჯერ კიდევ არ არის საზოგადოების გაბატონებული ელემენტი. ლომბარდიელებს, ებრაელებს იგივე ადგილი უკავიათ მიწათმოქმედების მწარმოებელ საზოგადოებათა მიმართ საშუალო საუკუნეებში“¹³.

კართაგენი ძირადად საშუამავლო ვაჭრობას ეწეოდა, თუმცა აქაურ ვაჭრებს ადგილობრივი წარმოების საგნებიც გაჰქონდათ. საშუამავლო ვაჭრობამ განაპირობა კართაგენის ეკონომიკა და მისი ხასიათი.

III ს-ის მეორე ნახევარში კართაგენში ბრძოლა გამწვავდა ორ ოლიგარქიულ ჯგუფს შორის — აგრარულ და სავაჭრო-სამრეწველო ჯგუფებს შორის. აგრარული ჯგუფი, რომლის სათავეშიაც პანონ დიდი იდგა, აფრიკაში დაპყრობების მომხრე იყო, ხოლო სავაჭრო-სამრეწველო ჯგუფი კი დაინტერესებული იყო ზღვისიქითა დაპყრობებით. ამ ჯგუფის სათავეში ბარკიდების გვარი იდგა.

პოლიბიოსი III ს-ის კართაგენის შესახებ წერს, ამ დროისათვის „კართაგენი უკვე დაბერდა, ხოლო რომი, ყოველ შემთხვევაში სახელმწიფო დაწესებულებების მხრივ, განსაკუთრებით გაიფურჩქნა“¹⁴.

კართაგენსა და რომს შორის თავდაპირველად მეგობრული ურთიერთობა ყოფილა. მათ შორის პირველი ხელშეკრულება დაიდო „ლუციუს იუნიუს ბრუტუსისა და მარკუს ჰორაციუსის დროს“.

¹² ი. შიფმანი, დასახელებული ნაშრომი, გვ. 102.

¹³ ს. ი. კოვალიოვი, მარქსი და ენგელსი ანტიურობის შესახებ, გვ. 49.

¹⁴ პოლიბიოსი, დასახელებული ნაშრომი, გვ. 58.

სამეფო ხელისუფლების გაუქმების შემდეგ პირველი კონსულე-
ბის დროს, წერს პოლიბიოსი. მაგრამ მას შემდეგ რაც რომაელებ-
მა პიროსი დაამარცხეს და ფეხი მოიკიდეს რეგიუმში, ხოლო კარ-
თაგენი კუნძულ სიცილიაზე გამაგრდა, აშკარა შეიქნა, რომ მათ
შორის შეტაკება გარდაუვალა იყო. რომის გაძლიერებული მადა-
ვერ იტანდა, რომ სიცილია, იტალიის ეს ბუნებრივი ნაწილი, მას
არ ეკუთვნოდა. კართაგენს კი აზრადაც არ მოსდიოდა სიცილიის
უბრძოლველად დათმობა¹⁵.

პირველი პუნიკური ომის მთავარი ასპარეზი კუნძული სიცი-
ლია იყო. ხმელეთზე რომაელებმა წარმატებებს მიაღწიეს, ზღვაზე
კი კართაგენელები ბატონობდნენ. მაგრამ რომაელებმა მალე აქაც
იმარჯვეს. „აგარაული ქვეყანა, ძლიერი თავისი გლახური არმიით,
ან საზღვაო სახელმწიფოდ უნდა გადაქცეულიყო, ან დასავლეთ
ხმელთაშუაზღვეთში ხელმძღვანელობის დაჩემებაზე უარი ეთქვა...
ძალთა უდიდესი დაძაბვით და ბერძენ ინსტრუქტორთა დახმარე-
ბით, რომაელებმა განსაცვიფრებლად მოკლე დროში შექმნეს 120
დიდი სამხედრო გემისაგან შემდგარი ფლოტი“¹⁶. გარდა ამისა,
რომაელებმა მშვენივრად გამოიყენეს სააბორდაჟო კაუჭება, რო-
მელთა საშუალებითაც მათ კართაგენულ სწრაფმავალ გემებს მანე-
ვრილება მოუსპეს, თან ზღვაზედაც გაავრცელეს რომაული ქვეითი
ჯარის აშკარა უპირატესობა. კართაგენელებმა დაკარგეს ზღვაზე ბა-
ტონობა.

ფრ. ენგელსი I პუნიკურ ომში მომხდარი საზღვაო ბრძოლე-
ბის შესახებ წერს: პირველი პუნიკური ომის შემდეგ, რომელმაც
ბოლო მოუღო კართაგენელთა საზღვაო ძლიერებას, ძველი მსოფ-
ლიოს ისტორიაში აღარ ყოფილა არც ერთი. საზღვაო ბრძოლა,
ოდნავ პროფესიულ ინტერესს რომ იწვევდესო¹⁷.

საზღვაო ბრძოლებში გამარჯვების შემდეგ, რომაელებმა დე-
სანტი აფრიკაშიც გადასწესეს, მაგრამ რამდენიმე ბრწყინვალე გა-
მარჯვების შემდეგ ისინი დამარცხდნენ. 241 წლისათვის
ორივე მეზრძოლი მხარე გამოფიტულია. ევატის კუნძუ-

¹⁵ პოლიბიოსი, დასახელებული ნაშრომი, ტ. I, გვ. 266.

¹⁶ Всемирная история. Т. II, 1956, с. 293.

¹⁷ Фр. Энгельс. Избранные военные произведения. Т. I, М., 1940, с. 257.

ლებთან კართაგენას ფლოტის დამარცხება ზაენის დასადებ საბა-
ბად იქცა. საზავო პირობების შესახებ ცნობას გვაწვდის პოლი-
ბიოსი: „კართაგენელები ვალდებულებას კისრულობენ დაცალონ
სიცილია და იტალიასა და სიცილიას შუა მდებარე ყველა ტუნდუ-
ლა... არ აუტეხონ ომი არც სირაკუზელებს და არც მათ მოკავში-
რეებს, რომელებს უსასყიდლოდ დაუბრუნონ ყველა ტყვე და 20
წლის განმავლობაში გადაუხადონ მათ 2 ათას 200 ფინიკიური ტა-
ლანტი ვერცხლი“¹⁸.

რომის სენატმა ხელშეკრულების რატიფიკაცია მხოლოდ მა-
შინ მოახდინა, როცა მასში შეიტანეს შემდეგი ცვლილებები: კონ-
ტრიბუციის ვადა 20 წლიდან 10-მდე შეამცირეს, ხოლო გადასახ-
დელი თანხა 3200 ტალანტამდე გაზარდეს.

აკად. ს. ა. ებელიოვის აზრით, პირველ პუნიკურ ომში საქ-
მე გადაწყვიტა რომელების მიერ ძლიერი ფლოტის აგებამ. „პირ-
ველივე შეტაკებისას ახალგაზრდა რომაულმა ფლოტმა ბრწყინ-
ვალე გამარჯვება მოიპოვა. ამან არსებითად გადაწყვიტა ომის
ბედი“¹⁹. ხოლო პ. დელბრიუკი წერს: „თუკი ბოლოს და ბოლოს,
რომაელებმა გაიმარჯვეს, ამაში მათ დიდი დახმარება გაუწია... რო-
მის სახელმწიფოში მოქცეულმა დიდმა იტალიკურმა გაერთიანე-
ბამ. იგი საშუალებას აძლევდა რომაელებს განადგურებული და
დამსხვრეული ფლოტის ნაცვლად სასწრაფოდ ახალი ფლოტი ჩა-
ეშვათ წყალში“²⁰.

I პუნიკური ომის დამთავრებისთანავე კართაგენში აჯანყებამ
იფეთქა, იგი წალეკვით ემუქრებოდა კართაგენის მონათმფლობე-
ლურ რესპუბლიკას. აჯანყება გაგრძელდა სამ წელიწადს (241—
238 წწ.). მასში მონაწილეობას იღებდნენ უცხო დაქირავებულნი
და ადგილობრივი ჩაგრული მოსახლეობა. აჯანყებულთა რიცხვმა
70 ათასს მიაღწია. აჯანყება ასე დაიწყო:

კართაგენელებს ლილიბეუმიდან აფრაკაში უნდა გადაეყვანათ
დაქირავებული ჯარი, დაახლოებით 20 ათასი კაცი და მიეცათ მათ-
თვის ჯამაგირი, ხოლო შემდეგ დაეგზავნათ სამშობლოში. ლილი-

¹⁸ პოლიბიოსი, დასახელებული ნაშრომი, ტ. I, გვ. 271.

¹⁹ С. А. Жебелева. История Рима, Л., 1948, с. 196.

²⁰ Г. Дельбрюк. История военного искусства в рамках политической истории. Т. I. М., 1936, с. 252.

ბეუმის კომენდანტმა ჰისგონმა გადაწყვიტა ისინა მცირე ჯგუფებად გაეგზავნა კართაგენში, რადგან ანდენი შეიარაღებული ჯარისკაცის თავმოყრა დედაქალაქში კარგს არათერს მოასწავებდა. ი. შ. კორაბლიოვი მიუთითებს, რომ დაქირავებულთა შორის ამ დროს დისციპლანა შერყეული იყო. თან კართაგენის ხელისუფლებამ გადაწყვიტა, ჯამაგირის ნაწილი არ გადაეხადა დაქირავებულთათვის. ამან. ცხადია, დიდი უკმაყოფილება გამოიწვია დაქირავებულთა შორის. ქალაქში ნორმალური ცხოვრება დაირღვა. გახშირდა ძარცვა და მკვლელობა. ხელისუფლებამ გადაწყვიტა დაქირავებულნი ქვეყნის სამხრეთით, ქალაქ სიკაში გადაეყვანათ, რომელიც კართაგენის სამფლობელოთა ცენტრში მდებარეობდა. კართაგენის მმართველნი ფიქრობდნენ, რომ ამ მოქმედებით ისინი უკმაყოფილო დაქირავებულთ დედაქალაქიდან გაიყვანდნენ და იქ, თავიანთ სამფლობელოთა შეუაგულში, იოლად გაუსწორდებოდნენ, მაგრამ ანგარიშში მოტყუვდნენ:

სიკაში დაქირავებულებთან გამოცხადდა ლიბიის მმართველი—კართაგენელი სტრატეგოსი ჰანონი, რომელმაც სცადა ჯარისკაცებისათვის განემართა კართაგენელთა უმძიმესი მდგომარეობა და მოითხოვა, რომ მათ ჯარაგირას ნაწილზე უარი ეთქვათ. ჰანონის სიტყვამ აღავსო ჯარისკაცთა მოთმინების ფიალა. ისინი დაიძრნენ კართაგენისაკენ და შეჩერდნენ ქალაქ ტუნესთან, კართაგენის მისადგომებთან.

ახლა მიხვდნენ კართაგენელები, თუ რა შეცდომა ჩაიდინეს. ქვეყანას მრისხანე საფრთხე დაემუქრა. კართაგენის საბჭომ დაქირავებულებთან მოსალაპარაკებლად ჰისგონი გაგზავნა, სწორედ ის ჰისგონი, რომელმაც მოაწყო დაქირავებულთა ევაკუაცია. ლილიბეუმშიდან.

ჰისგონი ტუნეტში გამოცხადდა და ჯამაგირის დარიგება დაიწყო. თითქოს კონფლიქტი უნდა მოგვარებულიყო, მაგრამ ამ დროს კამპანიელმა სპენდიუსმა, გაქცეულმა მონამ, ჯარისკაცებს მოუწოდა არ დაჰყოლოდნენ ჰისგონის სიტყვებს. იგი შიშობდა, რომ არსებული რომაული კანონი, როგორც მოლაღატეს, დასჯიდა. სპენდიუსის გარდა უკმაყოფილოთა შორის გამოიჩინებოდა ლიბიელი მათოსი, რომელიც თავიდანვე კართაგენთან ყოველგვარი შეთანხმების მოწინააღმდეგე იყო. მათოსმა ლიბიელებს მოაგონა, რომ

თუკი კართაგენელები მიადწევდნენ აჯანყებულებთან კონფლიქტის მოწესრიგებას, უცხოელა დაქირავებულნი წავიდოდნენ თავიანთ ქვეყნებში და მოწინააღმდეგის პირისპირ მხოლოდ ლიბიელები დარჩებოდნენ, რომელთა დამარცხება კართაგენელებს არ გაუჭირდებოდათ.

აჯანყებულებმა დააპატიმრეს ჰისგონი, მისი თანშხლები კართაგენელები და ხელთ იგდეს მთელი თანხა, რომელსაც ისანი არიგებდნენ. ახლა კონფლიქტის მშვიდობიან მოწესრიგებაზე ლაპარაკიც აღარ შეიძლებოდა. აჯანყებულთ შეუერთდა კართაგენიდან გაქცეული მრავალი მონა. მათოსმა და სპენდიუსმა მოწოდებით მიმართეს ლიბიურ ქალაქებს, მოეშორებინათ კართაგენელთა უღელი და დახმარებოდნენ აჯანყებულთ, მეამბოხეთა, დასახმარებლად ტუნესში სურსათით დატვირთული ლიბიელთა მრავალი რაზმი მივიდა.

„აჯანყებამ,—წერს ი. შ. კორაბლიოვი,—თანდათან დაკარგა ჯარისკაცთა ბუნტის ნიშან-თვისებები და გადაიზარდა ჩაგრულთა მძლავრ მოძრაობაში მჩაგვრელთა წინააღმდეგ.“

მათოსისა და სპენდიუსის სალაროში უზარმაზარმა სახსრებმა შოიყარა თავი. მათ თავიანთ ამხანაგებს აჩათუ ჯამაგირი გადაუხადეს, არამედ დიდი თანხა გადაინახეს კიდევ. დაქირავებულ „ჯარისკაცთა ბუნტი“ თანდათან გადაიზარდა სახალხო-განმათავისუფლებელ ომში — ლიბიის ომში, როგორც მას წყაროები იხსენიებენ²¹.

აჯანყებულებმა ორად გაყვეს თავიანთი ძალები და ალყა შემოარტყეს უტიკასა და ჰიპონს, რითაც კართაგენი მოკვეთეს აფრიკის მატერიკს.

უარშიოდ დარჩენილმა კართაგენელებმა საგანგებო ღონისძიებები განახორციელეს. მათ თავი მოუყარეს ახალ დაქირავებულ ჯარს, ხელახლა აღჭურვეს ფლოტი, მობილიზაცია უყვეს მოქალაქეთ. კართაგენის არმიის სარდალი გახდა ის ჰანონი, რომელმაც აჯანყების დასაწყისში ასე უხეიროდ წარმართა დაქირავებულებთან მოლაპარაკება.

ჰანონმა გასწია უტიკასკენ. მისმა არმიამ, რომელსაც წინ 100 სპილო მიუძღოდა, გააბო მოწინააღმდეგის თავდაცვა. აჯანყებულნი

²¹ ი. შ. კორაბლიოვი, დასახელებული ნაშრომი, გვ. 44—45.

დამარცხდნენ და გაიფანტნენ. მაგრამ ჰანონმა, ისე რომ ბოლომდე არ მიიყვანა წარმატება, შეწყვეტა ბრძოლა და დასასვენებლად უტიკაში წავიდა. ამით ისარგებლეს აჯანყებულებმა, თავი მოუყარეს გაფანტულ ძალებს, თავს დაესხნენ კართაგენელებს, მრავალი გაელიტეს და ჰანონის მთელი აღქურვილობა და ალალი იგდეს ხელთ. რამდენიმე დღის შემდეგ ჰანონმა კვლავ გაუშვა ხელიდან გამარჯვება.

აჯანყება უბადლო ოსტატობით აღწერა გ. ფლობერმა „სალამბოში“.

„აქ ნახავდით ყოველ ეროვნების კაცს — ლიგურიელთ, ლუზიტანიელთ, ბალეარელთ, ზანგებს და რომიდან ლტოლვილთ. დორიული მძიმე კილოს გვერდით ისმოდა საბრძოლო ეტლებივით გრუხუნა კელტური სიტყვები, იონიური დაბოლოებანი ტურების მჭახე კვილის დარ უდაბნოს თანხმოვნებს ეჯახებოდნენ. ბერძენს იცნობდით თხელი აღნაგობით, ეგვიპტელს — აწოწილი მხრებით, კანტაბრიელს — მსხვილი კანკებით. კარიელნი ამაყად არხევდნენ მუზარადებზე მიმაგრებულ ფრთებს, კაპადოკიელ მშვილდოსნებს ბალახნა წვენით დიდრონი ყვავილები დაეხატათ სხეულზე, ხოლო რამდენიმე საყურებიანი ლიდიელი, ქალის კაბაში გამოწყობილი... შეექცეოდა ტაბლას. სხენი საზეიმოდ სინგურით მოთითხნილიყვნენ და მარჯნის ქანდაკებებს ჰგავდნენ“²².

კართაგენის სენატმა აჯანყებულთა წინააღმდეგ ოპერაციების ხელმძღვანელობა ჰამილკარ ბარკას დაავალა, რომელიც გაცილებით სჯობნიდა ამ ომში მონაწილეს „ყველა სარდალს ჰკუთნით, სიმაშაცითა და ენერგიით. იგი ძველი სამყაროს საუკეთესო მხედართმთავართა რიცხვს ეკუთვნოდა“²³.

ამ დიდებულნი სარდალის მეთაურობით კართაგენის არმიამ დამარცხა აჯანყებულნი. კართაგენი ამჯერად გადაიჩა.

ჰამილკარმა კარგად იცოდა, რომ დაქირავებული ჯარის მორალური დონე ძლიერ დაბლა დგას სამშობლოს დამცველი არმიის

²² გ უ ს ტ ა ვ ფ ლ ო ბ ე რ ი, სალამბო, მთარგმნელები კარლო ქილარჯიანი (I—VII თ.) და შანანა გოგინიევილი (VIII—XV თ.), გამომც. „ლიტერატურა და ხელოვნება“, თბილისი, 1963, გვ. 18.

²³ Г. В. Штолл. Герои Рима в войне и мире. С.-Петербург, 1877, с. 204

მორალურ დონესთან შედარებით. ამიტომ მან გადაწყვიტა, რომ პატ-
რაოტიზმის გრძნობა, რომელიც არ შეიძლებოდა კართაგენის მი-
მართ ჰქონოდათ სხვადასხვა ქვეყანაში შეკრებილ დაქირავებულებს,
შეეცვალა სარდლისადმი სიყვარულითა და მორჩილებით.

ამისათვის კი საჭირო იყო თვით სარდლის მაგალითის ძალა.

ჰამილკარმა იმასაც მიაღწია, რომ განუსაზღვრელი დროით
გახდა არმიის მეთაური და შოშავალში მისი მემკვიდრე სარდალიც
ჯარს უნდა აერჩია.

I კუნძუარი ომიდან II კუნძუარ ომამდე. ჰანიბალის ფიცი

ჰამილკარმა კარგად იცოდა, რომ პირველხარისხოვანი სახმე-
ლეთო არმიის გარეშე მას არ შეეძლო დაემარცხებინა რომის არ-
მია, რომელსაც შამინდელ მსოფლიოში ყველაზე უფრო ძლიერი
ქვეითი ჯარი ჰყავდა.

ფრ. ენგელსი ამ არმიის შესახებ წერს: რომის არმია ქვეითი
ტაქტიკის სრულყოფილი სისტემაა, გამოგონილი იმ ეპოქაში, რომ-
ლისთვისაც უცნობი იყო დენთი²⁴.

რომაული ქვეითი ჯარის უპირატესობას ჰეგელი შემდეგნაი-
რად ხსნის: „ფალანგის ძალას შეადგენდა მასა და შემქმნელობა-
ლობა. და რომაული ლეგიონებიც იყვნენ ერთიანნი და ამავე
დროს დანაწევრებულნიც. ისინი ერთმანეთში აერთიანებდნენ ორი-
ვე უკიდურესობას: ერთიანობასა და მსუბუქ რაზმებად დანაწევ-
რებულობას. რამდენადაც ისინი მჭიდროდ იდგნენ ერთ ადგილზე,
იმდენადვე იოლად იშლებოდნენ“²⁵.

ჰამილკარმა, ძლიერი არმიის შექმნის მიზნით, აგრეთვე სიცი-
ლისა და სარდონიის დაკარგვით გამოწვეული ზარალის ასანაზ-
ღაურებლად გადაწყვიტა დაეპყრო ესპანეთი და იქ ერთგვარი
პლაცდარში მოემზადებინა.

ესპანეთში ყველაფერი იყო იმისათვის, რაც ჰამილკარს სჭირ-

²⁴ ფ. ენგელსი, დასახელებული ნაშრომი, გვ. 121.

²⁵ Гегель. Соч., т. VIII. Перевод А. М. Водена, под редакцией Ф. А. Горохова, 1935, Л., с. 287.

დებოდა ბრძოლაში რომის წინააღმდეგ: მრავალრიცხოვანი მეომარი ტომები, რომელთა ხარჯზეც უნდა შეეცხო დაქირავებული ჯარი, სურსათი უხვად, ხე-ტყე ფლოტისათვის, ვერცხლის მდიდარი საბადოები და, რაც მთავარია, სიშორე ხარბ კართაგენელ ხელისუფალთაგან.

237 წელს ჰამილკარი ესპანეთის დასაპყრობად დაიძრა. მან თან წაიყვანა თავისი უფროსი ვაჟი ჰანიბალი, რომელიც ამ დროს 9 წლის იყო. პოლიბიოსმა შემოგვინახა ცნობა ჰანიბალის ფიცის შესახებ, რომელიც მამის წინაშე დადო. ეს სიტყვები ჰანიბალს უთქვამს ანტიოქე III-თვის, როცა ამ უკანასკნელს ექვი შეუტანია ჰანიბალის გულწრფელობაში, თუმცა ა. გ. მიშულინი ჰანიბალის ფიცს შემდგომი თაობების მიერ შექმნილ ამბად თვლის, მაგრამ იგი სანტერესთა და სრულიად ადვილად შესაძლებელია, რომ მაშინდელ პირობებში ასეთი რამ სინამდვილეშიც მომხდარიყო. ჰამილკარმა მას შემდეგ, რაც იბერიაში გამგზავრებამდე ზეესს მსხვერპლი შესწირა, განკარგულება გასცა, ჰანიბალის გარდა, ყველანი მოშორებით დამდგარიყვნენ. შეიღს კი დაყვავებით ჰკათხა, სურდა თუ არა მასთან ერთად სალაშქროდ წასვლა. ჰანიბალი დაუფიქრებლად დიდი სიხარულით დაეთანხმა. მაშინ ჰამილკარმა შეიღს მარჯვენა ხელში მოჰკიდა ხელი, მიიყვანა საკურთხეველთან, უბრძანა შეხებოდა. ზვარაკს და დაეფიცა, რომ არასოდეს არ იქნებოდა რომაელების მეგობარი²⁶.

ბიჭუნამ მორჩილად აღასრულა მამის ბრძანება. შეჰფიცა და შემდეგ თავისი ბოზოქარა და ფათერაყებით აღსაყვე ცხოვრების მანძილზე არასოდეს უღალატია ამ ფიცისათვის. ამიტომაც იქცა „ჰანიბალის ფიცი“ მიცემული პირობის გაუტეხლობისა და ვაჟკაცური სიტყვის სიმბოლოდ.

ჰამილკარი კართაგენს მიუძღოდა დიდ ომში რომის წინააღმდეგ და თან მიჰყავდა თავისი პირმო. იგი კარგად გრძნობდა, რომ ერთი სიცოცხლე საკმარისი არ იქნებოდა რომის წინააღმდეგ ომის ბოლომდე მისაყვანად და მის საქმეს ღირსეული გამგრძელებელი უნდა ჰყოლოდა. სარდლის დაგეშიღმა თვალმა არჩევანი ჰანიბალზე შეაჩერა და მოვლენათა შემდგომმა მსვლელობამ დაამტკიცა, რომ იგი არ შემცდარა.

²⁶ პოლიბიოსი, დასახელებული ნაშრომი, ტ. I, გვ. 254—255.

ნეპოტის ტექსტი თითქმის არაფრით განსხვავდება პოლიბიოსისაგან: „მამაჩემი ჰამილკარი, — ამბობს ჰანიბალი, — როცა ვიყავი არაუმეტეს ცხრა წლისა, ესპანეთში მიემგზავრებოდა მხედართმთავრად და დიდ ღმერთს იუპიტერს მსხვერპლი შესწირა. შემდეგ მკითხა, ხომ არ მსურდა მასთან ერთად ომში წასვლა. როცა ამ ამბის იგამო სიხარული გამოვთქვი და შევეხვეწე, რომ არ გადაეფიქრა ჩემი წაყვანა, მაშინ მითხრა: წაგიყვან თუ ფიცით განმინტკიცებ დაპირებასო. შემდეგ წამიყვანა ტაძარში და იქ მსხვერპლი შესწირა. მას შემდეგ, რაც ტაძარი ყველამ დასტოვა, მამამ ხელი მომკიდა, ზვარაკთან მიმიყვანა და მიბრძანა, რომ რომაელებთან არასოდეს მეცხოვრა მეგობრულად. მშობლისათვის მიცემულ ამ ფიცს მე ისე ერთგულად ვინახავდი, რომ არავინ არ უნდა დაექვდეს მის სიმტკიცეში“²⁷.

ჰამილკარმა საფუძველი ჩაუყარა ისეთ სახმელეთო არმიას, რომელიც თითქმის ყოველთვის იძლეოდა გამარჯვების გარანტიას. ფრ. ენგელსი ამის შესახებ წერს: კართაგენელმა სარდლებმა ჰამილკარმა და ჰანიბალმა ნუმიდურ ირეგულარულ ცხენოსან ჯართან ერთად ჩამოაყალიბეს რეგულარულ კავალერია, და; ამრიგად, შექმნეს ჯარის სახეობა, რომელსაც თითქმის ყოველთვის გამარჯვება მოჰქონდა მათთვის²⁸. ჰამილკარის არმიას თვით უნდა შეენახა თავი. ამასთან ერთად, ჰამილკარს კართაგენში უნდა გაეგზავნა თანხის განსაზღვრული რაოდენობა, რომელიც საჭირო იქნებოდა მასი წამოწყების დასაცავად. ცხადი იყო, რომ ჰანონის პარტია ყოველ ღონეს იხმარდა, რათა ხელი შეეშალა ჰამილკარის გეგმების განხორციელებისათვის.

თ. მომზენის გაანგარიშებით, ესპანეთის ვერცხლის საბადოები (სიერა-მორენას ვერცხლის მღაროები) ყოველ წელს იძლეოდა 2,5 მილიონ ტალერს. ამავე დროს ესპანეთის თემების უმრავლესობა ხარკს იხდიდა²⁹. ჰამილკარ ბარკას მიერ ესპანეთში მიღებული ვერცხლი, ნ. ა. მაშეინის აზრით, რომელიც პოლიბიოსს იმოწმებს, ასე ნაწილდებოდა: თანხის 1/3 ხმარდებოდა ჯარს, 1/3 კარ-

²⁷ Корнелий Непот. Жития славных генералов. Перевод с латинского Василия Лебедева. С.-Петербург, 1748, кн. XXIII, гл. II, с. 187.

²⁸ ფრ. ენგელსი, დასახელებული ნაშრომი, ტ. I, გვ. 182.

²⁹ თ. მომზენა, დასახელებული ნაშრომი, გვ. 535.

თაგენის ხაზინას, ხოლო 1/3 კართაგენის სახელმწიფოს ხელმძღვანელებისათვის იყო განკუთვნილი³⁰.

ჰამილკარმა ესპანეთში 9 წელი დაჰყო. ამ ხნის განმავლობაში ესპანეთში მოსახლე იბერიელი ტომების ერთი ნაწილი დიპლომატიური გზით მოაქცია კართაგენის ქვეშევრდომად, ხოლო მეორე ნაწილი ძალით დაიპყრო. განსაკუთრებით მძიმე ბრძოლები გადაიტანა მან ტურდეტანების ტომთა გაერთიანების წინააღმდეგ ბრძოლაში, რომელსაც მეთაურობდნენ ისტოლატიუსი და ინდორტი. კართაგენელმა სარდალმა ხელთ იუღო ინდორტი, ჯერ აწამა და თვალები დათხარა, ხოლო შემდეგ ჩამოახრჩო.

ჰამილკარმა ბრძოლებით განვლო გზა პალოსის კონცხამდე, რომელიც ძველი საზღვარი იყო კართაგენისა და რომის გავლენის სფეროებს შორის ესპანეთში. პალოსის კონცხიდან მან კვლავ განაგრძო გზა ნაოს კონცხამდე. ამ ორ კონცხს შორის მან დააარსა „თეთრი ციხე“.

რომაელებმა ჰამილკართან დელეგაცია გაგზავნეს და მოთხოვეს შეეწყვიტა რომაელთა ორიენტაციის მქონე მასალიელების წინააღმდეგ ლაშქრობა. ჰამილკარმა ელჩებს უპასუხა, რომ მისი მოქმედება ნაკარნახევი იყო პირველი პუნიკური ომის საზავო პირობებით, რაც ითვალისწინებდა კართაგენელებისათვის დაკისრებული საკონტრიბუციო თანხის ვადაში გადახდას. პოლიბიოსი გადმოგვცემს, ქალაქ ილიცეს ალყის დროს ჰამილკარმა გამოიჩინა გასაოცარი გმირობა და ისე გამოესალმა სიცოცხლეს, როგორც მამაც მებრძოლს შეშვენოდაო³¹.

ჰამილკარის ნაცვლად ჯარმა მისი სიძე ჰასდრუბალი აირჩია, რომელიც მანამდე ცნობილი იყო როგორც ერთ-ერთი გამოჩენილ სახელმწიფო მოღვაწე და სამხედრო პარტიის აღიარებული ხელმძღვანელთაგანი. იგი განაგრძობდა ჰამილკარის პოლიტიკას. მან ესპანეთში დააარსა ახალი კართაგენი, რომელიც კართაგენელთა მნიშვნელოვან სტრატეგიულ ბაზად იქცა.

ჰასდრუბალის ხელში დიდმა ძალებმა მოიყარეს თავი და განიზრახა მონარქიული გადატრიალება მოეხდინა. იგი ამ მაზნით ჩაეი-

³⁰ Н. А. М а ш к и н. Последний век пунического Карфагена. ВДИ, № 2, 1949, с. 45.

³¹ პოლიბიოსი, დასახელებული ნაშრომი, ტ. 1, გვ. 139.

და კიდეც ლიბიაში, მაგრამ განზრახვა სისრულეში ვერ მოიყვანა და ისევ ესპანეთს მიაშურა, სადაც თავს უშიშრად და დამოუკიდებლად გრძნობდა.

მამის სიკვდილის შემდეგ ჰანიბალი კართაგენში ცხოვრობდა. შემდეგ ჰასდრუბალმა სენატში წერილი გაგზავნა და მოითხოვა ჰანიბალი ესპანეთში გაეგზავნათ მასთან. შეიკრიბა სენატი. ბარკიდები მოითხოვდნენ, რომ ჰამილკარის შვილი მხედრულა ცხოვრებისათვის შეეჩვიათ და მამამისის შემკვიდრე გამხდარიყო. მოწინააღმდეგე პარტიის მეთაური ჰანონი კი მოითხოვდა, რომ ჰასდრუბალისათვის უარი შეეთვალათ.

— რა გვალელებს? — კითხულობდა ჰანონი. — ის, რომ ჰამილკარის შვილს დაუგვიანდება შეუზღუდავი ძალაუფლებისა და მეფური დიდების გემოს გაგება? თუ ის, რომ ჩვენ თვითონ დაგვიგვიანდება სულ მალე მის მონებად გადაქცევა? არა, ეს ყმაწვილი შინ უნდა იყოს და მიეჩვიოს კანონებისა და ხელისუფლების მორჩილებას ისე, როგორც ემორჩილება მათ ყველა კართაგენელი! არადა, ფრთხილად იყავით, რომ ამ პატარა ნაპერწყლისაგან დიდი ხანძარი არ გაჩაღდეს³².

არ ვიცით მამის სიკვდილის შემდეგ, რამ აიძულა ჰანიბალი ესპანეთიდან წასულიყო — წერს ი. შ. კორაბლიოვი. — შესაძლებელია, რომ ჰასდრუბალმა ზრუნვა გამოიჩინა თავის ცოლისძმებზე. ასევე შესაძლებელია, რომ მას სურდა, თუნდაც მცირე დროით თავიდან მოეშორებინა ძალაუფლებისათვის ყველაზე საშიში და უთუო პრეტენდენტი. ასეა თუ ისე, უახლოესი ხუთი წელი ჰანიბალმა კართაგენში გაატარა და, როგორც ჩანს, ყურადღებით აკვირდებოდა სამშობლოს პოლიტიკურ ცხოვრებას. მაგრამ უკვე 224 წელს ჰანიბალი ესპანეთში დაბრუნდა და სამხედრო სამსახური დაიწყო სიძის ხელმძღვანელობით, ვისთანაც ცხენოსან ჯარს სარდლობდა³³.

რომაელები კარგად ხედავდნენ კართაგენელთა წარმატებებს, მაგრამ ჯერ სხვა საქმეები ჰქონდათ მოსაგვარებელი. როგორც კი ახლომახლო ქვეყნების დაპყრობები და ილირიის ომი დაამთავრეს, მათ ჰასდრუბალთან დელეგაცია გაგზავნეს და დაავალეს ხელშეკ-

³² ტ ი ტ უ ს ლ ი ვ ი უ ს ი. დასახელებული ნაშრომი, გვ. 7.

³³ ი. შ. კორაბლიოვი, დასახელებული ნაშრომი, გვ. 54.

რულების დადება. მოლაპარაკებისას რომაელებმა ბევრი რამ დათმეს. ისინი არაერთარ პრეტენზიებს არ აცხადებდნენ ჰამილკარისა და ჰასდრუბალის იბერსიქითა დაპყრობებზე, მაგრამ მოითხოვეს, რომ კართაგენელებს სამხედრო მიზნით იბერსგამოღმა ყოველგვარი ოპერაციებისაგან თავი შეეკავებინათ.

ეს ხელშეკრულება ჰასდრუბალსა და რომაელებს შორის 226 წელს დაიდო. ამრიგად, ესპანეთის დიდი ნაწილი კართაგენელთა გავლენის სფეროდ იქნა აღიარებული.

ტიტუს ლივიუსის გადმოცემით, ჰასდრუბალი რვა წელაწადს სარდლობდა. მას ჰამილკარმა, მისი გარეგნობითა და გამჭრიახი გონებით მოხიბლულმა, ქალიშვილი მიათხოვა... ჰასდრუბალი გონივრულად მოქმედებდა, შედარებით მცირე ომები გადაიხანდა, მაგრამ სამაგიეროდ კართაგენს ახალი მოკავშირეები შესძინა, დაუმეგობრა მეზობელი ხალხები, მათი მთავრები და მეთაურები³⁴.

ჰასდრუბალის არმიის იყო 200 საბრძოლო სპილო, 50 ათასი გამოცდილი ქვეითი ჯარისკაცი და 6 ათასი ცხენოსანი. ამ უძლიერესი სამხედრო ძალით მან გაილაშქრა ორისების ტომის წინააღმდეგ. გაანადგურა ისინი, ვისაც ბრალი მიუძღოდა ჰამილკარის დამარცხებასა და სიკვდილში, დაიმორჩილა ორისთა 12 ქალაქი, აგრეთვე ზოგიერთი ქალაქი.

როგორც ზემოთ აღინიშნა, ჰასდრუბალმა ახალი კართაგენის დაახლებით უძლიერესი დასაყრდენი ბაზა გაიჩინა. ახალი კართაგენი ფაქტიურად კართაგენელთა ადმინისტრაციული ცენტრი გახდა ესპანეთში³⁵.

ჰასდრუბალმა მოქნილი დიპლომატიური ხერხებით დაიხლოვა იბერიული ტომები. იგი დაქორწინდა კიდევ ერთ-ერთი იბერიელი ბელადის ქალიშვილზე. ი. შ. კორაბლიოვის აზრით, ეს შესაძლებელია მომხდარიყო ჰამილკარის ქალიშვილის სიკვდილის შემდეგ.

დაახლოებით ასეთი მდგომარეობა იყო 221 წლისათვის, როდესაც, პოლიბიოსის ცნობით, ჰასდრუბალი კერძო ინტერესით მოკლა ვილაც კელტმა. შესაძლებელია, რომ კართაგენის სენატმა,

³⁴ ტ ი ტ უ ს ლ ი ვ ი უ ს ი, დასახელებული ნაშრომი, გვ. 6.

³⁵ ი. შ. კორაბლიოვი, დასახელებული ნაშრომი, გვ. 54—55.

რომლისთვისაც ცნობილი გახდა ჰასდრუბალის მიზნები, ამით იგი თავიდან მოიშორა. მის ადგილზე ჯარმა აირჩია ჰამილკარ ბარკას ახალგაზრდა ვაჟი — ჰანიბალი. ჯარის ეს არჩევანი შემდეგ კართაგენელმა ხალხმა და სენატმა დაადასტურეს.

პოლიბიოსი ამ აქტის შესახებ წერს: როგორც კი ჰანიბალმა ძალაუფლება მოიპოვა, აშკარა გახდა, რომ გადაწყვეტილი ჰქონდა რომის წინააღმდეგ გალაშქრება³⁶.

ი. შ. კორაბლიოვის აზრით, როცა ჰანიბალი ხელისუფლების სათავეში მოექცა, 25—26 წლის იყო. მას ცოლად ჰყავდა კასტელონის მკვიდრი იბერიელი ქალი. ეს ქალაქი კართაგენელთა მოკავშირე იბერიულ ტომს ეკუთვნოდა³⁷.

ჰანიბალი კართაგენელთა ჯარის სათავეში

ჰანიბალის ბავშვობა კართაგენისათვის მეტად მნიშვნელოვანი მომენტებით აღინიშნა. I პუნიკური ომის ბოლო წლები და იმით გამოწვეული სიხარული და მწუხარება პატარა ბავშვის პირადი ცხოვრების ნაწილად იქცა. თავისი გავლენა იქონია ბავშვის ფსიქოლოგიაზე დაქირავებულთა და მონების ზემოთ აღწერილმა აჯანყებამ, რადგან ეს აჯანყებაც მამამისმა ჩააქრო. ისე რომ, საფიქრებელია, ჰანიბალი ბავშვობიდანვე ჩაება კართაგენის პოლიტიკური ცხოვრების ფერხულში. და გარკვეულ გამჭრიახობას ამჟღავნებდა. გასაკვირი არ არის, რომ ჰამილკარ ბარკა ნიჭიერ პირმშომში თავისი დაწყებული საქმის განმგრძობს ჰერეტლად:

ჰანიბალის გენიალური ნიჭი და გაქანება ჯერ კიდევ მისმა თანამედროვეებმა შეიგნეს მთელი სიცხადით. ტიტუს ლივიუსი კართაგენელებისადმი ზიზღს არ მალავს. მაგრამ მისი დახასიათებითაც კი კართაგენელი სარდალი მთელი სიდიადით გვიდგება თვალწინ.

„არასოდეს ერთი ადამიანი ასე თანაბრად არ ყოფილა დაჯილდოებული ორთ, ასე განსხვავებული თვისებით — მეთაურისა და ხელქვეითის თვისებებით, ამიტომ ძნელი იყო იმის გარკვევა, ვისთვის უფრო ძვირფასი იყო ჰანიბალი — მთავარსარდლისა თუ ჯა-

³⁶ პოლიბიოსი, დასახელებული ნაშრომი, ტ. I, გვ. 176.

³⁷ ი. შ. კორაბლიოვი, დასახელებული ნაშრომი, გვ. 61.

რისათვის. უფრო ხალისით, პასდრუბალი არავის ანდობდა ლაშქ-
რის უფროსობას, რომელსაც ევალეზობდა საქმე, გაბედულებასა და
სიმამაცეს რომ მოითხოვდა, და არც მებრძოლნი არავის მეთაურო-
ბით არ იყვნენ აგრერიგად დაიმედებულნი და მამაცნი. საფრთხი-
სას არავერ ისეთი უშიშარი არ იყო, როგორც ჰანიბალი და არავინ
ისეთი წინდახედული არ იყო ყველაზე დიდი განსაცდელის ჟამს. არ
იყო სამუშაო, რომელიც მას დაღლიდა ფიზიკურად ან სულიერად.
პაპანაქებასა და ყინვას ერთნაირად იოლად იტანდა. ჰამდა და სვამ-
და არა სიამოვნებისათვის, არამედ მხოლოდ შიმშილისა და წყურ-
ვილის მოსაკლავად. დღისა და ღამის დროს განუჩივრებლად ანაწი-
ლებდა ძილისა და ფიზიკობისათვის, მოსვენებას იმ დროს უთმობ-
და, რომელიც შრომას გადაჩივებდა. ამასთან, არაფრად დაგიდევ-
დათ რბილ ლოგინს და ძილისათვის სიჩუმეს არ მოითხოვდა. ბევრი
ნახულობდა მას მოსასახამში გახვეულს ზედ მიწაზე მძინარეს მებრ-
ძოლთა შორის, საგუშაგოზე და პოსტზე.

ტანსაცმლით არ განსხვავდებოდა დანარჩენთაგან. სამაგიეროდ,
ძისი იარაღი და ცხენი ყველას თვალში ეცემოდა. როგორც მხედ-
რებს შორის, ასევე ქვეითებში ჰანიბალზე უფრო დახელოვნებული
მეომარი არ იყო. პირველი გადაეშეებოდა ხოლმე ბრძოლაში და
უცანასყნელი ტოვებდა მას.

მაგრამ ამ დიდ დაღებით თვისებებთან ერთად მას ჰქონდა ასე-
ვე დიდი ნაკლოვანებები: არაადამიანური სიმკაცრე, გაუგონარი
მუხანათობა. მისთვის არ არსებობდა ჰუმანარტება, სიწმინდე, არა-
ვითარი შიში არ ჰქონდა ღმერთებისა, პატივის არ სცემდა მიცემულ
ფიცს³⁸.

პოლიბიოსი ჰანიბალის უფრო ობიექტურ დახასიათებას იძლე-
ვა. იგი აღფრთოვანებულია ჰანიბალის სტრატეგიული ხელოვნებით,
რომელსაც იტალიაში 16 წლის ყოფნისას არც ერთხელ თავისი
მხედრობა დამარცხებული არ გაუყვანია ბრძოლის ველიდან. იგი
ჰანიბალს ადარებს სახელოვან მესაჭეს, ყოველთვის რომ მბრძანებ-
ლობდა სხვადასხვა ჯურის ურდოებზე, შეძლო დაეცვა ისინი მთა-
ვარსარდლის წინააღმდეგ ამხედრებისა და ურთიერთშორის შულ-
ლისაგან.

³⁸ ტიტუს ლივიუსი, დასახელებული ნაშრომი. გვ. 7—8.

„განა შეიძლება არ გაგაოცოს ჰანიბალის სტრატეგიულმა ხელოვნებამ, მისმა სიმამაცემ და სალაშქრო ცხოვრების ცოდნამ, თუ თვალს გადაავლებ მთელს მის ცხოვრებას, თუ ყურადღებით შეჩერდები ყველა დიდსა და მცირე ომზე, ქალაქების აღყასა და მათ გადმობრუნებაზე, სიძნელეებზე, ჰანიბალს რომ ხედა წილად, მიიღებ რა საბოლოოდ, მხედველობაში მის მიერ ომის ხელმძღვანელობის დიდ ხელოვნებას? იტალიაში 16-წლიანი ომის განმავლობაში დახელოვნებული მესაჭის მსგავსად იგი ყოველთვის მბრძანებლობდა სხვადასხვა სახის ურდოებზე, შეძლო დაეცვა ისინი სარდლის წინააღმდეგ ამხედრებისა და ურთიერთშორის ბრძოლისაგან. მის ჯარში იბრძოდნენ იბერები, ლიგურიელები, კელტები, ფინიკიელები, იტალიელები, ელინები — ხალხები, რომელთაც თავიანთი წარმოშობით ერთმანეთთან საერთო არაფერი ჰქონდათ, მაგრამ ბელადის სიბრძნემ ასწავლა ამ განსხვავებულ და მრავალრიცხოვან ხალხებს დამორჩილებოდნენ ერთ კანონს, ერთ სურვილს“³⁹.

ბურჟუაზიული ისტორიოგრაფია ჰანიბალს ნაპოლეონს ადარებს. თ. მოშენი მას არა მარტო სტრატეგიულ, არამედ პოლიტიკურ გენიასაც უწოდებს და უდიდეს ადამიანად თვლის⁴⁰. ასევე დიდ ადამიანად მიაჩნია ჰანიბალი სამხედრო ხელოვნების ისტორიის ცნობილ სპეციალისტს ჰ. დელბრიუქს, რომელიც კართაგენელ სარდალს თვლის არა ერთბაშად შემუსვრის, არამედ ქანცგამოლევის მეშვეობით მტრის წამოჩოქების სტრატეგად⁴¹.

„თუ ჰანიბალს ხშირად ადარებენ ნაპოლეონს, არ უნდა დავივიწყოთ, რომ ჰანიბალმა ბოლოს და ბოლოს ვერ დაამარცხა მოწინააღმდეგე იმიტომ, რომ ვერ დაძლია თავისი ვაჭარი ხელისუფალნი, მაშინ, როცა ნაპოლეონი ზედაპირზედ ამოისროლა საფრანგეთის დიდმა რევოლუციამ“⁴².

საბჭოთა ისტორიკოსები: ვ. სერგეევი, ნ. ა. მაშკინი, ა. ვ. შიშულინი, ნ. ა. ლაპინი, ს. ა. უტჩენკო, დ. პ. კონჩალოვსკი და სხვები ჰანიბალს დიდ სარდალად და პოლიტიკურ მოღვაწედ თვლიან.

³⁹ პოლიბიოსი, დასახელებული ნაშრომი, ტ. II, გვ. 321—322.

⁴⁰ თ. მოშენი, დასახელებული ნაშრომი, გვ. 539.

⁴¹ Г. Делъбрьюк. История военного искусства в рамках политической истории. Т. I, с. 252.

⁴² Ф. Мериног. Очерки по истории войн и военного искусства. с. 51,

აკად. ს. ი. კოვალიოვი ჰანიბალს ისეთსავე გენიალურ დიპლომატს უწოდებს, როგორც სტრატეგს⁴³, სხვა ადგილას იგი აღფრთოვანებული წერს: ჰანიბალის მთელი შინაარსიანი ცხოვრება, გამსჭვალული ერთი ფიქრითა და სურვილით, თავის შესახებ უკეთ მეტყველებს, ვიდრე ამას შეძლებდა რომელიმე ლიტერატურული დახასიათება⁴⁴.

ჰანიბალი თავისი დროისათვის განათლებული ადამიანი იყო. იგი შესანიშნავად იცნობდა მაშინდელი მსოფლიოს ხალხების ცხოვრებას, ადათ-ჩვევებს. როგორც დ. პ. კონჩალოვსკი წერს, მან შეისწავლა მანამდე არსებული საშინაო და საგარეო პოლიტიკა, უზიარა დახვეწილ ფინიკიურ და ელჩურ კულტურას. გარდა ამისა, იგი ისეთივე ფინიკიელი იყო, როგორც ესპანელი. ისე რომ, მასში შერწყმული აღმოჩნდა ფინიკიური ეშმაკობა იბერიულ სიმამაცესთან. ექვს გარეშეა, რომ ჰანიბალს კარგად ჰქონდა შესწავლილი მისი წინამორბედი სარდლების სამხედრო ხელოვნება.

ი. შ. კორაბლიოვი თუმცა ხარკს უხდის ჰანიბალის უდიდეს სამხედრო ნიჭს, პირად დამოკიდებულებას კართაგენელი სარდლისადმი შემდეგი სიტყვებით გამოხატავს:

„...დიდი სარდალი... მაგრამ რა იგულისხმება ამ სიტყვებში?... ნუთუ სარდლის სიდიადე მხოლოდ იმით განიასაზღვრება, რომ მთელი თავისი სამხედრო კარიერის მანძილზე უამრავი ბრძოლა მოიგო ურიცხვ ომში? ნუთუ მხედველობაში არ უნდა მივიღოთ მიზნებიც, რომლებსაც ის ისახავს, რისთვისაც ჩაღდება ომები და აღწევენ გამარჯვებებს? ნუთუ შეიძლება დიდი ვუწოდოთ ადამიანს, რომელსაც სხვა ხალხებისათვის დამრნება, სილატაკე და დაღუპვა მოაქვს“⁴⁵?

ნაშრომის დასასრულს კი იგი წერს: „კართაგენელი სარდლის გარშემო ატეხილმა დაეამ კარგახანია დაკარგა თავისი სიმწვავე. ჰანიბალის, მისი მეგობრებისა და მტრების ძვლებიდაა მიწაში. საზღვრმწიფოები; ოდესღაც რომ მსოფლიო ბატონობას იჩემებდნენ, გაქრნენ; აღარ არიან არც პუნები, არც რომაელები. დრო ახლა საშუალებას გვაძლევს შევხედოთ ჰანიბალს ორი ათას წელზე მეტი ხნის სიმორიდან. იგი შეუბრალებლად სპობს ყოველგვარ ფერუმა-

⁴³ С. И. Ковалев. История Рима, с. 219.

⁴⁴ ს. ი. კოვალიოვი, დასახელებული ნაშრომი, გვ. 223.

⁴⁵ ი. შ. კორაბლიოვი, დასახელებული ნაშრომი, გვ. 10—11.

რილს, ააშკარავებს „დიდი“ დამპყრობლების ნამდვილ მიზნებს, რომლებმაც ამდენი სისხლიანი მსხვერპლი შესწირეს თავიანთ პატივმოყვარეობას. მაღალფარდოვანი ფრაზებით შენიღბული წერილმანი ზრახვები, დიდებისაკენ სწრაფვის ამაოება, ადამიანთა ტანჯვისა და თვით ადამიანთა სიცოცხლის პატივმოყვარულად უგულვებელყოფა, იმის ურცხვი რწმენა, რომ უფლება აქვთ ჩაიდინონ ნებისმიერი ბოროტმოქმედება, ოღონდ კი მიაღწიონ წარმატებას... ძალაუფლების ხარბი მოყვარულნი, მოძალადენი და მკვლელები — ასეთებად დარჩნენ ისინი ბოლოს და ბოლოს კაცობრიობის მეხსიერებაში“⁴⁶.

ჩაუდგა თუ არა არმიას სათავეში, ჰანიბალმა ინტენსიურად დაიწყო ომისათვის მზადება. სარდალმა ჯერ ზურგის განმტკიცებას ოპერაციებიდან დაიწყო. მან კარგად იცოდა, რომ ისეთი მეომარი ტომების ზურგში დაუმორჩილებლად დატოვება, როგორც იყვნენ ოკლადები (ორეტანები), კარპეტანები, ბესტეტანები, კონსტეტანები, ვეტონები, ვაკეები, ტარტესელები (ტურდეტანები) და სხვ. არ შეიძლებოდა. ჰანიბალი მშვიდად ვერ წავიდოდა შორეულ და ძნელაშქრობაში, მით უმეტეს, რომ მისთვის ამჯერად მეტროპოლია ესპანეთი უფრო იყო, ვიდრე კართაგენი, რომლის იმედაც მას თითქმის არ ჰქონდა. ამიტომ ჰანიბალმა თავისი მახვილი ჯერ ამ ტომების დასამორჩილებლად მიმართა. ეს არც მთლად ადვილი საქმე იყო. ამაყი ადგილობრივი ტომები თავგანწირვით იცავდნენ თავიანთ დამოუკიდებლობას და კართაგენის გაწვრთნილ არმიასთან ბრძოლაში სიმამაცის მაგალითებს იძლეოდნენ. სხვა მრავალ გამირულ ფურცელთა შორის ისტორიამ ასეთი ეპიზოდი შემოგვინახა: ქ. სალამანტიკაში გარშემორტყმულმა ვეტონებისა და ვაკეების ტომებმა მრავალი გამოხდომა მოახდინეს, ზარალიც მიაყენეს კართაგენელ მოალყეებს, მაგრამ გარემოცვა მაინც ვერ გაარღვიეს. ამის შემდეგ ისინი დათანხმდნენ ჰანიბალს წინადადებაზე, რომ ალყაშემორტყმულთ ჩაებარებინათ იარაღი, ქონება და ქალაქს გაელოდნენ. ეს მათ მეტისმეტად შეურაცხყოფელად მოეჩვენათ და გადაწყვიტეს მტრისათვის ძვირად დაესვათ გამარჯვება. ქალებმა იცოდნენ, რომ მათ არ გაჩხრეკდნენ და ხანჯლები გადამალეს. მამაკაცების გაჩხრეკის შემდეგ

⁴⁶ ი. შ. კორაბლიოვი. დასახელებული ნაშრომი, გვ. 355—356.

კართაგენელებმა დაიწყეს ქალაქის რბევა, ქონების დატაცება და ლოთობა. ყურადღების შესუსტებით ისარგებლეს დამარცხებულებმა, ქალებმა ხანჯლები მამაკაცებს გადასცეს, ეს უკანასკნელნი თავ-განწირვით ეკვეთნენ მარბიელთ და გაქლიტეს, რის შემდეგაც გზა გაიკაფეს ტყით დაბურული მთებისაკენ, სადაც მათი ხელში ჩაგდება უკვე ძნელი იყო.

ოკლადებმა, ვაკეებმა და კარპეტინებმა უზარმაზარ, 100-ათასიან არმიას მოუყარეს თავი. გადამწყვეტი ბრძოლა მოხდა მდინარე ტაგუსთან. ჰანიბალმა ბრწყინვალე გამარჯვება მოიპოვა.

ი. შ. კორაბლიოვი წერს, რომ ტაგუსთან გამარჯვებას განსაკუთრებული ადგილი უჭირავს ჰანიბალის ბიოგრაფიაში. აქ მან პირველად გამოიჩინა ტაქტიკური თვისებები, ცხადყო, რომ შეუძლია მიიღოს გაბედული გადაწყვეტილება, დაამსხვრიოს დაწესებული სამხედრო ნორმები და თავის სასარგებლოდ გამოიყენოს ადგილმდებარეობის ის თავისებურებანი, რომლებიც ერთი შეხედვით უეჭველ დამარცხებას უქადდა⁴⁷.

ამის შემდეგ ჯერი რომაელთა მოკავშირე ქალაქ საგუნტზე მიდგა. ჰანიბალმა გადაწყვიტა ჯერ კართაგენში შეემზადებინა საზოგადოებრივი აზრი. ამიტომ დედაქალაქში ზედიზედ გაგზავნა რამდენიმე ცნობა, რომლებშიც იტყობინებოდა, რომ საგუნტელები ავიწროებდნენ კართაგენელთა მოკავშირე ტომს. ჰანიბალი პასუხს აღარ დაელოდა და საომარი ოპერაციები გააჩაღა საგუნტის წინააღმდეგ. პირდაპირი იერიშით ქალაქის აღება გაჭირდა. კართაგენელები ალყაზე შეჩერდნენ, რომელიც 8 თვეს გაგრძელდა. ალყის დროს ჰანიბალი ბარძაყში დაიჭრა. მიუხედავად ალყაშემორტყმულთა წინააღმდეგობისა, საგუნტი დაეცა. ეს ნიშნავდა რომისათვის ომის გამოცხადებას.

რომაელები მზად არ იყვნენ ომისათვის, ამიტომ ჯერ მოლაპარაკებით სცადეს საქმის მოწესრიგება. მათ კართაგენში დელეგაცია გაგზავნეს და ჰანიბალის გაცემა მოითხოვეს, მაგრამ უარი მიიღეს, თუმცა ჰანიბალის წინააღმდეგ ჰანონმა, როგორც ტიტუს ლივიუსი გადმოგვცემს, სიძულვილით აღსავსე სიტყვა წარმოთქვა.

„მე თქვენ გაფრთხილებდით, — თქვა ჰანონმა, — რომ ჰა-

⁴⁷ ი. შ. კორაბლიოვი, დასახელებული ნაშრომი, გვ. 63—64.

მილკარის შვილი ჯარში არ გაგეგზავნათ. არც სულს იმ კაცისას საი-
ჭიოს, არც მის ცოცხალ მემკვიდრეთ არ შეუძლიათ მშვიდი ცხოვ-
რება და მანამ იქნება რომაელებთან ომის საფრთხე, ვიდრე იქნე-
ბა ბარკას სახსენებელი და მისი სისხლის თუნდაც ერთი წვეთი. მაგ-
რამ ყური არ დამიგდეთ — თქვენ თვითონ დაასხით ნავთი ცეცხლ-
ზე, თვით გააჩაღეთ ეს ხანძარი ახლა რომ მიძინვარებს. თქვენმა
მეომრებმა ალყა შემოარტყეს საგუნტს, დაარღვიეს ხელშეკრულება,
რომელიც მათ ამ ქალაქთან მიახლოებას უკრძალავდა; მაგრამ მალე
რომაელთა ლეგიონები ალყას შემოარტყამენ კართაგენს — იმავე
ღმერთების ნებით, რომლებიც წარსულ ომში (პირველ პუნიურ
ომზეა ლაპარაკი. — ბ. ბ.) დაეხმარნენ მათ შური ეძიათ შეურაცხყო-
ფისა და ხელშეკრულების ფეხით გათელვისათვის! გაიხსენეთ ყოვე-
ლივე, რაც თქვენ გადაიტანეთ ხმელეთსა და ზღვაზე იმ ომის ოცდა-
სამი წლის განმავლობაში, მაშინ ხომ სარდალი იყო არა ეს ლაწი-
რაკი, არამედ ჰამილკარი — „მეორე მარსი“, როგორც მას მეგობრე-
ბი იხსენიებენ...

დამიჯერეთ, საგუნტის კედლებთან კი არა, ჩვენს საკუთარ კედ-
ლებთან მოიტანა ჰანიბალმა საალყო იარაღები, ჩვენს კედლებს
აზანზარებენ მათი დარტყმები, და საგუნტის ნამსხვრევები ჩვენ
გვაცვივა თავზე, იმიტომ, რომ საგუნტელთა წინააღმდეგ დაწ-
ყებული ომი რომაელთა წინააღმდეგ უნდა გავაგრძელოთ.

„მაშ, გავცეთ ჰანიბალი?“ — შემეკითხებით — ვიცი, რომ ჩემს.
რჩევას არ მიიღებთ, მაგრამ ყოველივეს მოგახსენებთ, რასაც ვფიქ-
რობ. ის არათუ უნდა გავცეთ ხელშეკრულების კადნიერად დარღვე-
ვისათვის, არამედ, თუნდაც არავის მოეთხოვა, ცის დასალიერს უნ-
და გაგვესახლებინა, ცხრამთას იქით, რომ არასოდეს და არაფერი
მის შესახებ არ გავიგონოთ, და რომ ველარასოდეს ვერ შეძლოს ჩვე-
ნი სახელმწიფოს სიმშვიდის დარღვევა!“⁴⁸

ომის მიზეზები შემდეგი იყო: როგორც კართაგენის, ისე რომის.
სავაჭრო-სამრეწველო წრეები დაინტერესებული იყვნენ ახალ-ახალი
ქვეყნების დაპყრობით, თავიანთი გავლენის ქვეშ მათი მოქცევით.
ამის განხორციელება კი შეუძლებელი იყო, ვიდრე ერთ-ერთი მათ-
განი ძლიერი იყო. კართაგენი და რომი ამ დროს გამოდიან როგორც

⁴⁸ ტ ი ტ უ ს ლ ი ვ ი უ ს ი, დასახელებული ნაშრომი, გვ. 13—14.

ხელთაშუა ზღვის აუზში ბატონობის პრეტენდენტები. ორივე მხარე უკმაყოფილოა I პუნიკური ომის შედეგებით. კართაგენი იმით, რომ დაკარგა სიცილია, სარდინია, კორსიკა და გადაიხადა დიდი კონტრიბუცია, ამიტომ იგი რევანშისათვის ემზადება. რომში კი უკმაყოფილო და შეშფოთებულთა იმით, რომ I პუნიკურ ომში ვერ მოახერხა კართაგენის განადგურება და მისი საბოლოოდ ჩამოცილება. იგი უკმაყოფილოა კართაგენის გაძლიერებით და მისი გაზრდილი ექსპანსიით იბერიაში. შორსმჭვრეტელი ადამიანები რომში კარგად ხედავდნენ, რომ კართაგენის გაძლიერება ესპანეთში მომასწავებელი იყო რომისათვის დიდი და სერიოზული გართულებებისა.

ტიტუს ლივიუსი გადმოგვცემს, რომ სენატმა საგუნტის აღების შემდეგ მეორე ელჩობა გაგზავნა კართაგენში, რომელსაც ხელმძღვანელობდა კვინტუს ფაბიუსი. რომაელი ელჩები კართაგენის სენატში მიიღეს. კვინტუს ფაბიუსმა მქსიმუსმა სენატორებს ჰკითხა, თუ რა გარემოებაში შემოაჩტყა ალყა ჰანიბალმა საგუნტს, მათი დასტურით და წაქეზებით, თუ პირადი თაოსნობით. ამაზე ერთ-ერთმა კართაგენელმა უპასუხა, რომ რომაელთა პირველი ელჩობა, როცა ისინი პირდაპირ მოითხოვდნენ ჰანიბალის გაცემას, უხეში კადნიერება იყო, არც მეორე ელჩობა გამოირჩევა დიდი მოკრძალებულობით, თუმცა სიტყვები შედარებით რბილად შეგირჩევიათ. ახლა ჰანიბალს კი არ ეხება საქმე, განაგრძო კართაგენელმა, არამედ ჩვენ; ჩვენ უნდა ვალიაროთ დანაშაული და სასწრაფოდ დამაკმაყოფილებელი პასუხი გავცეთ. მაგრამ საქმე ის კი არ არის როგორ დაიწყო ომი — ჩვენი დასტურით თუ მის საწინააღმდეგოდ. არა, აქ სულ სხვა რამ არის მთავარი: გაითელა თუ არა კანონი და სამართლიანობა. ყველაფერს, რაც შეეხება ჩვენი მოქალაქის შეცდომებს, ჩვენ თვითონ გავარკვევთ, თქვენთან კი მზად ვართ განვიხილოთ ერთი საკითხი — დაირღვა თუ არა თქვენსა და ჩვენს შორის დადებული ხელშეკრულება. შემდეგ კართაგენელმა სენატორმა დაასაბუთა, რომ ხელშეკრულებით რომსაც და კართაგენსაც უფლება ჰქონდათ დაეცვათ თავიანთი მოკავშირეები, მაგრამ საგუნტელებზე იქ კონტრიც არ იყო დაძრული, იმიტომ, რომ იმ დროს ისინი რომაელთა მოკავშირეები არ იყვნენ. ის ძველი ხელშეკრულება იყო, მას შემდეგ ახალი დაიდო ჰანდრუბალთან და რომაელებსაც ის ხელშეკრულებები მიაჩნდათ სავალდებულოდ. სხვათა შორის, განაგრძო სენატორმა,

პასდრუბალს არ შეუტყობინებია ჩვენთვის, რომ რომაელებთან მოლაპარაკება გამართა. ისე რომ, დაეხსენით საგუნტს, მდინარე იბერს და ბოლოს და ბოლოს თქვით, რაც დიდიხანია გულში გაქვთ, — დაამთავრა კართაგენელმა.

მაშინ კვინტუს ფაბიუსმა ტოგის კალთა აიკრიფა, ორმაგად მოკეცა და უქმებად განაცხადა — შეხედეთ, აქ მიძევს ომი და მშვიდობა, რომლებიც თქვენ ჩამოგიტანეთ. აირჩიეთ.

არანაკლებ მკვახე იყო კართაგენელთა პასუხი: თვით აირჩიე! რომაელმა ხელი უშვა აკეცილ კალთას და შესძახა, აჰა, მე გარგუნეთ ომი. ამის გაგონებაზე ყველა კართაგენელმა ერთხმად შესძახა, რომ ისინი იღებდნენ ომს და ისეთივე შემართებით იბრძოლებდნენ, როგორც ახლა მიიღეს რომაელთა ძღვენი⁴⁹.

კართაგენიდან რომაელი ელჩები ესპანეთში გაემგზავრნენ იმ იმედით, რომ იქაურ სახელმწიფოებსა და ტომებს მოკავშირეებად გაიხდიდნენ ან, ყოველ შემთხვევაში, ჩამოაშორებდნენ კართაგენელებს.

როგორც ტიტუს ლივიუსი გადმოგვცემს, პირველად ისინი ბარგუსების ტომს სწვევიან, რომლებიც შეწუხებული ყოფილან კართაგენელთა ბატონობით. ისინი სიხარულით შეხვედრიან რომაელებს, მაგრამ როცა ჯერი ვოლკიანთა ტომზე მიმდგარა, ყოველგვარი იმედი გასცრუებიათ. ერთ-ერთ უხუცესს რომაელი ელჩებისათვის უხეშად მიუხლია: „არ გაქვთ არც სინდისი, არც ნამუსი, როცა გვთავაზობთ თქვენი მეგობრობა ვარჩიოთ კართაგენელებისას! თქვენ ხომ უღალატეთ მოკავშირეებს, რომლებიც დაგთანხმდნენ ასეთ წინადადებაზე. ახლა იქ ეძიეთ მოკავშირეები, სადაც საგუნტის დალუპვის ამბავი არ იციან. ესპანელებისთვის საგუნტის ნანგრევები სამუდამოდ იქნება საშინელი გაკვეთილი და მრისხანე გაფრთხილება“⁵⁰.

აქედან ელჩები გალიაში გადასულან, მაგრამ, იქ ისეთი ხარხარი აუტეხიათ მათთვის შეკრებილ გალებს, რომ ისინი იმედგაცრუებულნი რომში დაბრუნებულან.

საგუნტის აღების შემდეგ ჰანიბალი გამოსაზამთრებლად ახალ

⁴⁹ ტ ი ტ უ ს ლ ი ვ ი უ ს ი. დასახელებული ნაშრომი, გვ. 21—22, აგრეთვე მ დ ლ ი ბ ი ო ს ი, დასახელებული ნაშრომი, ტ. I, გვ. 276—277.

⁵⁰ ტ ი ტ უ ს ლ ი ვ ი უ ს ი, დასახელებული ნაშრომი, გვ. 24.

კართაგენში დაბანაკდა. მან მოიწვია ესპანური წარმოშობის მეზრძოლნი და შემდეგი სიტყვებით მიმართა:

„თქვენ კარგად გესმით, მეგობარო-მოკავშირენო, რომ ახლა, როცა ესპანეთის ყველა ხალხი დაპყრობილია, ჩვენ ისლა დაგვრჩენია, რომ ან დავშალოთ ჯარი, ანდა სხვა მხარეებში დავიწყოთ ახალი ომი. მაგრამ დარწმუნებული ვარ, რომ ესპანელი ტომები მხოლოდ მაშინ მოიშვიან არა მხოლოდ მშვიდობის, არამედ გამარჯვების მთელ სიკეთეს, როცა უცხო მხარეებში განვაგრძობთ ნადავლისა და დიდების ძიებას. ამრიგად, თქვენ შორეული და ხანგრძლივი ლაშქრობა გელით, მალე როდი მოგიწევთ თქვენი ოჯახებისა და ნათესავების ნახვა; ამიტომ, ყველას, ვისაც სურს თავისი ანლობლების ნახვა, შეუძლია აიღოს შევებულება. მაგრამ განაფხულისთვის ყველა უნდა დაბრუნდეს. ღმერთების ნებით ჩვენ დავიწყებთ ომს, რომელიც განუზომელ დიდებას და აურაცხელ ნადავლს მოგვიტანს“⁵¹.

ჰანიბალმა კართაგენში და აფრიკის სხვა ქალაქებში გაგზიენა ესპანელთა რაზმები, ხოლო მათ სანაცვლოდ გაითხოვა აფრიკელი რაზმები, რადგან დარწმუნებული იყო, რომ ყოველი მეზრძოლი თავისი კერიდან მოშორებით უკეთესად იბრძოლებდა⁵².

ამრიგად, II პუნიკური ომი ფაქტი გახდა. იგი ორმხრივ მტაცებლური იყო. სწორედ ასეთი შეფასება მისცა ვ. ი. ლენინმა მას: „იმპერიალისტური ომები ყოფილა აგრეთვე მონობის ნიადაგზეც (რომის ომი კართაგენთან ორივე მხრივ იმპერიალისტური იყო“⁵³).

„მეორე პუნიკურმა ომმა, —წერს ჰეგელი, — მაშინდელ უძლიერეს სახელმწიფოთა კოლოსალური შეჯახება გამოიწვია...“

...ეს დიადი პერიოდი რომის სხვა ქვეყნებთან ურთიერთობისა და ამით გამოწვეული სხვადასხვა გართულებები მოგვიტხრო კეთილშობილმა აქაველმა პოლიბიოსმა; რომელსაც წილად ხვდა ყოფილიყო თვითმზილველი იმისა, თუ როგორ იღუპებოდა მისი სამშობლო ბერძენთა უკადრისი ვნებებისა და რომაელთა უსიცივნელო და ულმობელი დაჯინების გამო“⁵⁴.

⁵¹ ტ ი ტ უ ს ლ ი ვ ი უ ს ი, დასახელებული ნაშრომი, გვ. 25.

⁵² ი ქ ვ ე. გვ. 25.

⁵³ ვ. ი. ლ ე ნ ი ნ ი, ტ. 26, გვ. 180.

⁵⁴ ჰ ე გ ე ლ ი, დასახელებული ნაშრომი. გვ. 288.

ჰანიბალმა გადაწყვიტა ომი თვით იტალიის ტერიტორიაზე გადაეტანა. მისი გეგმა შემდეგ მიზანს ისახავდა: ესპანეთიდან ხმელთაშუა ზღვის სანაპიროს გასწვრივ მოძრაობით მიეღწია ალპებისათვის, გადაელახა ის და რომაელებს ჩრდილოეთიდან დასხმოდა თავს. ჰანიბალის ეს გეგმა, თუმცა დიდ რისკთან და სიძნელებებთან იყო დაკავშირებული, მაინც რეალური და ყველაზე უფრო სწორი იყო, რადგან I პუნიკურ ომში კართაგენელებმა ზღვაზე ბატონობა დაკარგეს, ე. ი. რომზე თავდასხმა ზღვიდან შეუძლებელი იყო და იგი ხმელეთიდან უნდა განხორციელებულიყო. რომის ჩრდილოეთი კი ყველაზე უფრო მერყევი იყო, რადგან იგი შედგებოდა ახლად დაპყრობილი ოლქებისაგან, რომელთა მოსახლეობაც ბორგავდა და ცდილობდა თავიდან მოეშორებინა რომაელთა ბატონობა. ჰანიბალის სტრატეგიული გეგმა კი იმას ისახავდა მიზნად, რომ ცალკეული ოლქების ჩამოცილებით რომი სისხლისაგან დაეცალა. გარდა ამისა, ჰანიბალის გამოჩენა იტალიის ჩრდილოეთში იმდენად მოულოდნელი იქნებოდა, რომ იგი თავზარს დასცემდა რომაელებს. ეს გეგმა საშუალო გონების ადამიანს პარადოქსულად მოეჩვენებოდა და სწორედ ამზე იყო ნავარაუდები დიდი სარდლის გეგმა. როგორც დ. პ. კონჩალოვსკი აღნიშნავს, ჰანიბალი ცდილობდა გამოეცნო ჰემმარტი, მაგრამ შეუმჩნეველი ძალები, გაერთიანებინა ისინი და დაეპირისპირებინა იმ ძალებისათვის, რომლებსაც ემყარებოდა საშუალო აზრი⁵⁵.

ჰანიბალს შესაძლებლად შიაჩნდა რომაელების ექსპედიცია აფრიკასა და ესპანეთში. ამიტომ მან თავის ძმას — ჰასდრუბალს დაუტოვა დიდი არმია და ფლოტი და დაარიგა საჭიროების შემთხვევაში როგორ უნდა მოქცეულიყო⁵⁶.

კართაგენელმა სარდალმა გადაწყვიტა კელტებთან შეეყრა კავშირი. დიპლომატიური ალღოს მეოხებით იგი კარგად ხელავდა, რომ თუ კელტები ჰანიბალს მხარს დაუჭერდნენ მომავალ კამპანიაში, ამით მისი გენერალური გეგმა ბევრს მოიგებდა.

თ. მომზენი ჰანიბალის ლაშქრობას რომის წინააღმდეგ ადარებს ნაპოლეონის ლაშქრობას რუსეთის წინააღმდეგ და წერს, რომ კელ-

⁵⁵ Д. П. Кончаловский. Аннибал. Петербург, 1923 г., с. 46—47.

⁵⁶ პოლიბიუსი, დასახელებული ნაშრომი, ტ. I, გვ. 277.

ტებს იგივე როლი უნდა შეესრულებინათ რომის წინააღმდეგ, რა როლიც შეასრულა პოლონეთმა ნაპოლეონის ომში რუსეთის წინააღმდეგ⁵⁷.

ომის საბოლოო მიზანი მხოლოდ ჰანიბალმა და მისი თანამებრძოლების ვიწრო წრემ იცოდა.

ჰანიბალმა დანიშნულ დღეს დაიწყო ლაშქრობა. მის არმიაში იყო დაახლოებით 90 ათასი ქვეითი მებრძოლი და 12 ათასი მხედარი⁵⁸. ჰანიბალმა გადალახა მდ. იბერი და დაიმორჩილა ის ტომები, რომლებიც მის წინსვლას აფერხებდნენ. მდ. იბერის მარცხენა ნაწილის მმართველად მან დანიშნა ჰანონი და აღჭურვა შეუზღუდველ უფლებებით. მასვე დაუტოვა 10 ათასი ქვეითი, ათასი მხედარი და არმიის მთელი სურსათი. ამდენივე მეომარი მან სახლებში გაუშვა, რათა დანარჩენებისათვის დაბრუნების იმედი ჩაენერგათ. — წერს პოლიბიოსი. ჰანიბალმა ეს იმიტომ მოიმოქმედა, რომ მეომართა ერთმა ჯგუფმა უარი განაცხადა თავისი სამშობლოდან შორს წასვლაზე. ჰანიბალმა ამაში დიდი საფრთხე დანახა და უხმაუროდ, რათა ეს სენი დანარჩენ მასას არ მოსდებოდა, ისინი შინ გაუშვა. ასევე მოექცა სარდალი სხვებსაც, რომლებმაც მერყეობა გამოიჩინეს. ამით მან ისეთი შთაბეჭდილება შექმნა, თითქოს, დიდ ძალას არავის ატანდა და არცთუ მთლად უხეირო საქმეზე მიჰყავდა ისინი.

ამრიგად, რჩეული არმია 50 ათასი ქვეითისა და დაახლოებით 9 ათასი მხედრის რაოდენობით თან წაიყვანა⁵⁹. ამ არმიით, რომელიც ფიზიკური გამძლეობით და იბერიაში მიღებული დიდი საბრძოლო გამოცდილებით გამოირჩეოდა, ჰანიბალმა პირენეის მთები გადალახა.

რომაელებმა გადაწყვიტეს იბერიაში ჰანიბალის წინააღმდეგ გაეგზავნათ პუბლიუს კორნელიუს სციპიონი, ხოლო ლიბიაში-ტიბერიუს სემპრონიუსი. სციპიონმა 60 გემით იბერიისკენ გასწია, ტიბერიუსი კი 160 გემით ლიბიისკენ გაემართა. ამრიგად, რომაელებმა თავიანთი ძალები გაჰყვეს და ეს მშვენიერად შეტყვევებს იმაზე, რომ ისინი ერთი წუთითაც ვერ ითვალისწინებდნენ იმ საფრთხეს, შემდეგში. მათ თავს რომ დაატყდათ.

⁵⁷ თ. მ. მ. ზ. ნ. ი, დასახელებული. ნაშრომი, გვ. 542.

⁵⁸ პ. ო. ბ. ი. ო. ს. ი, დასახელებული ნაშრომი, ტ. 1, გვ. 279.

⁵⁹ ი. ქ. ე. ი, გვ. 280.

ბუბლიუსი შეხუთე დღეს მივიდა მასალიაში და მდინარე როდა-
ნუსთან ჩაუშვა ლუზა, ხოლო ჯარი ხმელეთზე გადმოსხა. აქ მას მო-
ახსენეს, რომ ჰანიბალმა პირენეები უკვე გადალახა და მდ. როდა-
ნუსთან არისო.

ჰანიბალის მიერ მდინარის გადალახვას ხელი შეუშალეს ადგი-
ლობრივმა მცხოვრებლებმა, მაგრამ კართაგენელმა სარდალმა ჯარის
ერთ ნაწილს უბრძანა მდინარე მთავარი ძალებიდან მოშორებით
გადაელახა და შემდეგ ორმხრივი დარტყმით გაანადგურა მრავალ-
რიცხოვანი მტერი. სწორედ ამ დროს ჰანიბალთან მოვიდა მდ. პადუ-
სის დაბლობში მცხოვრები კელტების დელეგაცია მეფე მაგილის მე-
თაურობით. დელეგატები მეგობრობას და რომაელების წინააღმდეგ
დახმარებას აღუთქვამდნენ კართაგენელებს. ჰანიბალმა მაგილს თხო-
ვა ჯარისათვის მიემართა. მაგილის სიტყვამ დიდად აღაფრთოვანა
მხედრობა. ამის შემდეგ თვით კართაგენელმა სარდალმა მიმართა
ჯარს.

„ახლა, — ამბობდა ის, — როცა გზის დიდი ნაწილი განვ-
ვლეთ, როცა გადავლახეთ პირენეები და გზა გავიკვლიეთ გამძვინვარ-
ებულ ბარბაროსებს შორის, როცა გადავლახეთ როდანიუსი და
მრავალი ათასი გალის წინააღმდეგობა. დავძლიეთ, როცა თვით
წყლის დინების ძალა ნადირივით დავიურვეთ, ალპების წინაშე,
რომლის იქითაც უკვე იტალიაა, — ნუთუ ახლა, ზედ მტრის კიშკარ-
თან შევედრებით... და განა რას წარმოადგენს ეს ალპები? ერთი მა-
ღალი მთებია და მეტი არაფერი! იქნებ ის გაშინებთ, რომ ალპები
პირენეებზე მაღალია? თუნდაც ასე იყოს. მაგრამ არ არის მთელს
დედამიწაზე მწვერვალი, ცასაც რომ სწვდებოდეს, და ადამიანისთ-
თვის მიუდგომელი იყოს! ალპები! იქ ხალხიც ცხოვრობს, ხორბა-
ლიც შოდის და ფარები ბალახს ძოვენ! ვინ დამიბტკიცებს, რომ
მისი უღელტეხილები ჯარისათვის დახშულია? მაშინ როგორღა მო-
იღწიეს ჩვენამდე ამ ელჩებმა, თქვენს წინაშე რომ დგანან? ხომ არ
გადმოფრინდნენ... რა შეიძლება იყოს მიუდგომელი, გადაულახავი
ჯარისკაცისთვის, რომელსაც თან არაფერი მიაქვს, გარდა იარაღისა?
იმისათვის, რომ აგველო საგუნტი, რვა თვის ალყის განმავლობაში
რა ჯაფა არ გადავიტანეთ! ახლა ჩვენი მიზანია რომი, მთელი მსოფ-
ლიოს დედაქალაქი... ეს ქალაქი თავის დროზე გალებმა აიღეს. პუნს
კი მის გალავანთან მისვლაც კი ვერ წარმოუდგენია და ამის გაფი-

ქრებაც არ უნდა. რა გაეწყობა, მაშინ ვაღიაროთ, რომ ჩვენ მხდლუ-
ბი და სულმოკლენი ვართ იმ ხალხთან. შედარებით, რომლებიც
არაერთხელ დავამარცხეთ ამ უკანასკნელ დღეებში... ეს მაინც
დაიხსომეთ — ჩვენი გზა დასრულდება მარსის ველზე და ტიბრსა
და რომის გალაფანს შორის“⁶⁰.

ჰანიბალს მოახსენეს, რომ პუბლიუსი ცდილობდა მასთან ბრძო-
ლის გამართვას. მან დასაზვერავად გაგზავნა ნუმიდიელები, რომელ-
ნიც შეხვდნენ რომაელ მზვერავებს. მოხდა შეტაკება, რომელშიაც
200 ნუმიდიელი და 120 რომაელი გაწყდა.

პუბლიუსმა დაადგინა თუ არა ჰანიბალის ადგილსამყოფელი,
მის შესახებდრად გაემართა, მაგრამ ჰანიბალი ბრძოლას მოერიდა.
მიუხედავად იმისა, რომ ჰანიბალს გარანტირებული ჰქონდა უეჭვე-
ლი გამარჯვება, იგი მაინც არ შეება მტერს შემდეგი მიზეზების გამო:
ჯერ ერთი, ჰანიბალს უნდა ეჩქარა, რომ მოესწრო ალპებზე გადასე-
ლა აცივებამდე, მეორე, ბრძოლაში არ შეიძლება კართაგენელებსაც
არ მოსგლოდათ გარკვეული ზარალი, რაც დაასუსტებდა მათ. განსა-
კუთრებით საზრუნავი გახდებოდნენ დაქრილნი, რომელნიც შეა-
ფერხებდნენ ჰანიბალის არმიის მოძრაობას. სწორედ ამ მიზეზების
გამო ჰანიბალი ბრძოლას განერიდა. პ. დელბრიუკი ჰანიბალის ამ
მოქმედების შესახებ წერს, ახალგაზრდა კართაგენელი სარდალი არ
გამოეკიდა იაფი დაფნის გვირგვინს, რაც ადასტურებს მთელ მის
გენიალობას⁶¹.

პუბლიუს კორნელიუს სციპიონი, რადგან მტერს ვერ შეხვდა,
მან არმია ორად გაყო. ერთ ნაწილს თვითონ ჩაუდგა სათავეში და
ჩრდილოეთ იტალიისაკენ გაუძღვა, ხოლო მეორე ნაწილს თავისი
ძმა გნეუსი ჩაუყენა სარდლად და ესპანეთში გაგზავნა.

კორნელიუს სციპიონის ამ მოქმედებას სწორად ხსნის დ. პ.
კონჩალოვსკი. იგი წერს, რომ სციპიონი მხოლოდ ამ დროს
დარწმუნდა ჰანიბალის ნამდვილ განზრახვაში, მაგრამ მიუხედავად
ამისა, მან დიდი ძალები ესპანეთში თავისი ძმის მეთაურობით იმი-
ტომ გაგზავნა, რომ ესპანეთი მიაჩნდა ჰანიბალის ძირითად ეკონო-
მიკურ და პოლიტიკურ დასაყრდენად.

ჰანიბალმა ოთხი დღის შეუსვენებელი მარშის შემდეგ ე. წ.
„კუნძულს“ მიაღწია. ეს ის ადგილიაო, წერს პოლიბიოსი; რომელ-

⁶⁰ ტ ი ბ უ ს ლ ი ვ ი უ ს ი, დასახელებული ნაშრომი, გვ. 32—33.

⁶¹ პ. დ ე ლ ბ რ ი უ კ ი, დასახელებული ნაშრომი, გვ. 290.

საც ორივე მხრიდან მდინარეები როდანუსი და ისარა უელიანო⁶². აქ მან მონაწილეობა მიიღო ორი ძმის ცილობაში, დაეხმარა უფროსს უმცროსის წინააღმდეგ და სამაგიეროდ მიიღო სურსათი, ტანსაცმელი და ახალი იარაღი უვარგისის ნაცვლად. ამის შემდეგ კართაგენის არმიამ კვლავ ალპებისაკენ განაგრძო გზა. ალპების გადალახვის ადგილის შესახებ მეცნიერებაში სხვადასხვა აზრია. ეს გამოწვეულია იმით, რომ პოლიბიოსი და ტიტუს ლივიუსი ამ მხრივ ერთმანეთის საწინააღმდეგო ცნობებს გვაწვდიან. ამის გამო მეცნიერთა ერთი ნაწილის აზრით, ჰანიბალმა ალპები სენ-ბერნარის უღელტეხილით გადალახა, ხოლო მეორეთა აზრით — მონ-სენის უღელტეხილით.

ჰანიბალის მიერ ალპების გადალახვა ერთ-ერთი ბრწყინვალე ფურცელია სამხედრო ხელოვნების ისტორიაში. ლაშქრობა სიძნელეებით იყო აღსავსე. არმიის მოძრაობას ხელს უშლიდნენ ადგილობრივი მთიელები, რომელნიც თავს ესხმოდნენ ხან წინა, ხან უკანა რიგებს და ღიდ ზიანს აყენებდნენ არმიას. „მეცხრე დღეს ჰანიბალმა უღელტეხილს მიაღწია და იქ გაშალა ბანაკი, რომელშიც ორ დღეს დარჩა“⁶³. ამ ორი დღის განმავლობაში საარტილერიო ნაწილი წამოეწია. არმიის მთავარ ძალებს. ჯარმა დაისვენა, მაგრამ ლაშქრობის არაადამიანურმა სიძნელეებმა დიდი ზიანი მიაყენა მის სულიერ მხარეს. ამიტომ ჰანიბალმა საჭიროდ ჩათვალა მებრძოლებისათვის გამამხნევებელი სიტყვით მიემართა. მან მიუთითა იტალიაზე, რომელიც გაშლილი იყო ალპების ძირში და იქ არსებულ სიმდიდრეზე. ამით მან ბრძოლისა და გამარჯვების წყურვილი აღუძრა ჯარს, რომლის დაჭირავებული წევრებისთვისაც ბრძოლაში გამარჯვება ძარცვასა და გამდიდრებას ნიშნავდა.

„...შეხედეთ, ჩვენს წინაშეა იტალია, — თქვა ჰანიბალმა, — და დღეს თქვენ არა მარტო მის კედლებზე ახვედით, არამედ ქალაქ რომის კედლებზეც. ამიერიდან გზა სწორი და იოლი იქნება: ერთი, ჰა, სულ დიდი ორი ბრძოლა, — და იტალიის დედაქალაქი თქვენს ხელთ და თქვენს განკარგულებაში აღმოჩნდება“⁶⁴.

⁶² პოლიბიოსი, დასახელებული ნაშრომი, ტ. I, გვ. 296.

⁶³ იქვე, გვ. 301.

⁶⁴ ტიტუს ლივიუსი, დასახელებული ნაშრომი, გვ. 37, აგრეთვე პოლიბიოსი, დასახელებული ნაშრომი, ტ. I, გვ. 301.

მეორე დღეს ჰანიბალი აიყარა და დაიწყო მთებიდან ძირს დაშვება. აქ მას მტერი არ შეხვედრია, მაგრამ „გზის სიძნელეებისა და თოვლის გამო თითქმის იმდენი მებრძოლი დაკარგა, რამდენიც მთებზე ასვლისას“⁶⁵.

მესამე დღეს ჰანიბალმა ვაკეს მიაღწია. იმის შესახებ, თუ რა ზარალი ნახა ჰანიბალმა ახალი კართაგენიდან ალპების გადალახვამდე, ცნობას გვაწვდის პოლიბიოსი. იგი წერს: „განვლო რა მთელი გზა ახალი ქალაქიდან ხუთ თვეში და ალპები 15 დღეში, ჰანიბალი ბოლოს მხნედ დაეშვა პადუსის ველზე... მას თან ჩამოყვა 12 ათასი ქვეითი ნუმიდიელი, 8 ათასი იბერი და არა უმეტეს 6 ათასი ცხენოსნისა“⁶⁶. ამ ცნობის უტყუარობის დასამტკიცებლად პოლიბიოსი იმოწმებს ჰანიბალის ბრძანებით გაკეთებულ დაფას, რომელიც ლაციუმში ინახებოდა მის დროს.

ამრიგად, ჰანიბალმა უდიდესი ზარალი ნახა ბარბაროსთა თავდასხმებისა და იმ საშინელი გაჰირვებისაგან, რომლის გადატანაც მოუხდა ჯარს ლაშქრობის დროს. კართაგენელი სარდალი იძულებული იყო გაეთვალისწინებინა ესოდენ დიდი ზარალი. ახლა მას გაცილებით ნაკლები ძალები გააჩნდა. ამიტომ იგი იძულებული იყო გადაესინჯა თავისი ტაქტიკა და შექმნილი სიტუაციის მიხედვით შეედგინა იგი.

ისეთი კრიტიკულად მოაზროვნე გენერალი კი, როგორც კ. დელბრიუკია, ამ უდიდეს ზარალს ბუნებრივად მიიჩნევს, რადგან „ცნობილია, — წერს ის, — როგორ ფიტავს არმიას მოწინააღმდეგის ტერიტორიაზე ლაშქრობა, თუნდაც დიდი ბრძოლების გარეშე“⁶⁷.

მაგრამ ჰანიბალმა იცოდა ვის წინააღმდეგაც იბრძოდა. მან იცოდა მტრის ყველა სუსტი მხარე, სჯეროდა, რომ რომაელ კონსულთა რუტინაზე უნდა გაემარჯვა შის მოქნილ სამანევრო ბრძოლას, რომის თვითდაჯერებაზე, — მისი მებრძოლების გამირობასა და სიამამაცეს.

„ჰანიბალი ეკუთვნოდა იმ ბუნების ადამიანებს, რომლებიც სასიკვდილო საფრთხის ქამს თავიანთ საუკეთესო თვისებებს ამ-

⁶⁵ პოლიბიოსი, დასახელებული ნაშრომი, ტ. I, გვ. 301.

⁶⁶ იქვე, გვ. 303.

⁶⁷ კ. დელბრიუკი, დასახელებული ნაშრომი, გვ. 290.

ქდავენებენ და უფსკრულის პირას ყველაზე უფრო ზუსტად პოულობენ ხსნის გზას. მისი არმიისათვის ხსნა მხოლოდ გამარჯვებას ნიშნავდა⁶⁸.

ჰანიბალი ალპების ძირში შეჩერდა. იგი დაღლილ-დაქანცული, ფიზიკურად და მორალურად დაცემული არმიის ძალების აღდგენას შეუდგა. ამის შემდეგ მან გადაწყვიტა ახლო მცხოვრებ ტომებთან მეგობრული ურთიერთობა დაემყარებინა. მან მოკავშირეობა შესთავაზა ტაგრიმანების ტომს, მაგრამ უარი მიიღო. ჰანიბალმა სამაგალითოდ დასაჯა ეს ტომი. რითაც „იხეთი ძრწოლა მოჰკვარა მეზობელ ბარბაროსებს, რომ მაშინვე მასთან გამოცხადდნენ და მფარველობა სთხოვეს“⁶⁹.

ამგვარად, ჰანიბალმა ფეხი მოიკიდა იტალიაში. რომაელებმა ხელიდან გაუშვეს მისი დამარცხების შესანიშნავი მოშენტი. თ. მომზენის აზრით, რომაელებს რომ გენერალური ბრძოლა გაემართათ ჰანიბალისათვის ალპების ძირში მაშინ, როცა ჰანიბალის არმია ქანცგამოღებული დაეშვა იქ, მათ რომ მთელი სერიოზულობით გაეთვალისწინებინათ მოწინააღმდეგის ძალა, მათ რომ იმთავითვე მოეხდინათ მნიშვნელოვანი ძალების კონცენტრაცია, მაშინ საეჭვოა ჰანიბალის გენიალურ ჩანაფიქრს ფრთები შესხმოდა⁷⁰.

კელტების მნიშვნელოვანი ნაწილი ჰანიბალს შეხვდა როგორც მოკავშირესა და გზნათავისუფლებელს.


პირველი შეტაკება რომაელებსა და კართაგენელებს შორის მდ. ტიცინუსთან მოხდა 218 წელს. ამის შესახებ დ. პ. კონჩალოვსკი წერს, სციპიონი მიხვდა, რა მასშტაბის სარდალთან ჰქონდა საქმე, მაგრამ მაინც ვერ წარმოედგინა რომაელთათვის ჩვეული სიამაყის წყალობით, რომ წარმატებას ვერ მიაღწევდა⁷¹. ბრძოლის წინ ორივე მხარის მხედართმთავრებმა სიტყვებით მიმართეს თავიანთ ქარისკაცებს: ჰანიბალმა ქარისკაცებს მიუთითა რომაელთა სიმდიდრეზე, რომელიც გამარჯვების შემთხვევაში კართაგენელთა ალაფად იქცეოდა. იგი შოუწოდებდა ქარისკაცებს „უდიდესი ნე-

⁶⁸ დ. პ. კონჩალოვსკი, დასახელებული ნაშრომი, გვ. 62.

⁶⁹ პოლიბიოსი, დასახელებული ნაშრომი, ტ. I, გვ. 307.

⁷⁰ თ. მომზენი, დასახელებული ნაშრომი, გვ. 552.

⁷¹ დ. პ. კონჩალოვსკი, დასახელებული ნაშრომი, გვ. 63.



რომაული არმიის ორგანიზაცია III ს. ჩვ. წ. აღმდე.

ტარებისათვის“, „საუკეთესო მიზნებისათვის“ მამაცურად ებრძოლათ.

პუბლიუსმა თავისი სიტყვის დიდი ნაწილი საშობლოსა და წინაპართა მიღწევებს დაუთმო. მებრძოლებს გაახსენა როგორ ააჩიდა თავი პანიბალმა როდანუსთან რომაელებს და მისი მოქმედება ახსნა კართაგენელი სარდლის შიშით. მან თქვა: „ახლა პანიბალი, რომელმაც დაკარგა თავისი არმიის დიდი ნაწილი, ჩვენთან მოვიდა, ხოლო გადარჩენილი მებრძოლნი, რომელთაც დიდი ჯაფა გადაიტანეს, ბრძოლისათვის უვარგისნი არიან. სწორედ ასევე, მან თავისი ცხენების დიდი ნაწილი დაკარგა, ხოლო გადარჩენილნი ყოვლად უმაქნისი არიან ესოდენ გრძელი და დამქანცველი გზის შემდეგ“⁷².

მდ. ტიცინუსთან მომხდარ ბრძოლაში რომაელები დამარცხდნენ. ბრძოლაში პუბლიუსი დაიჭრა, იგი სიკვდილს გადაარჩინა 17 წლის ვაჟმა, შემდეგში სცაბიონ აფრიკელად წოდებულმა. ამ ბრძოლამ კართაგენელთა არმიის და მისი სარდლის აშკარა უპირატესო-

⁷² პოლიბიუსი, დასახელებული ნაშრომი, ტ. I, გვ. 312—313.

ბა გამომეძღვება. ამ არმიის წარმატებათა წყარო იყო მისი კავალერიის მრავალრიცხოვნობა და სიძლიერე. ფრ. ენგელსი რომაელთა ამ მარცხის შესახებ წერს: რომაელები არასოდეს არ იყვნენ ცხენოსნები. მათი ცხენები უჯიშონი იყვნენ, ხოლო მებრძოლებმა არ იცოდნენ მისი ტარება... ბრძოლა ხანმოკლე იყო, რომაელები მამაცურად იბრძოდნენ, მაგრამ გამარჯვების უმცირესი შანსიც კი არ ჰქონდათ... საკუთარმა ცხენებმა დაამარცხეს ისინი⁷³.

ტიციუსთან ბრძოლამ დაარწმუნა პუბლიუსი, რომ ჰანიბალის არმიასთან გაშლილ ველზე დიდი ბრძოლის გამართვა რომაელებსათვის ხელსაყრელი არ იყო. „ჰანიბალმა, — წერს დენისონი, — პირველმა დასავლეთ ევროპაში გაიგო კავალერიის ნამდვილი მნიშვნელობა და ყველა ის სიკეთე, რისი გამოწურვაც მისგან შეიძლებოდა. ეს იყო ერთ-ერთი ისეთი უდიდესი ხელოვანი სამხედრო საქმისა, რომლებიც გამოჩნდებიან ხოლმე საუკუნეში ერთხელ და თავისი გენიის დაღს ასვამენ მთელ მათ. თანამედროვე სამხედრო ისტორიას“⁷⁴. შემდეგ იგი სწორად აფასებს ჰანიბალის გამარჯვებებში ცხენოსანი ჯარის როლს და წერს:

„აღმოსავლეთში ალექსანდრეს მსგავსად, ჰანიბალი — დასავლეთში, ბრწყინვალე გამარჯვებების მთელ სერიას, რომელიც მოიპოვა საუკეთესო ქვეით ჯარზე, უნდა უმადლოდეს მრავალრიცხოვან, შესანიშნავად გაწვრთნილ ცხენოსან ჯარს და მისი გაძლიერებულს“⁷⁵.

დენისონი, ეყრდნობა რა ანტიკურ ავტორებს, ჰანიბალის ცხენოსან ჯარს ყოფს მძიმე და მსუბუქ ნაწილებად. მძიმეს ჰქონდა შემდეგი შეიარაღება: კაპარკი, მუზარადი, რკინის ორთუყები, მახვილი და მოკლე შუბი. იგი იყოფოდა ესკადრონებად, რომლებშიც შედიოდა 64 კაცი. მოკავშირე გალების ცხენოსანი ჯარიც მძიმე ნაწილს ეკუთვნოდა.

მსუბუქი კავალერია ნუმიდეელებისაგან შედგებოდა. მათი ცხენები ტანმოკრილნი, მაგრამ მარდნი იყვნენ. თვით ნუმიდეელები ცუდად იყვნენ შეიარაღებული. უნაგირს არ ხმარობდნენ. არც სპეციალურ აღიარსა და არც სადაიეს. ცხენს მიერეკებოდნენ წყნელით

⁷³ ფ. ენგელსი, დასახელებული ნაშრომი, გვ. 182—183.

⁷⁴ Д е н и с о н. История конницы. I, С.-Петербург, 1897, с. 48.


⁷⁵ იქვე, გვ. 48.



რომაელი ცხენოსნები.

ან ქამრით. ანტიკური ავტორების ცნობით, ისინი თითქმის მთლად შიშველნი იყვნენ და მხოლოდ ზურგზე ეფარათ პატარა მოსასხამი, რომელიც კენების დროს ჰაერში ფრიალებდა. შეიარაღებული იყვნენ ხელშუბებით და ფარებით. მათ ევალეობოდათ: დაზვერვა, ალაფობა, მტრის არიერგარდების დევნა; იყვნენ სწრაფნი, მოქნილნი. გულადნი, შეიარაღება მათი შეეფერებოდა მათი დანიშნულების შინაარსს. მოკლე ხელშუბი მათ ხელში მრისხანე იარაღად იქცეოდა⁷⁶.

⁷⁶ დ ე ნ ი ს ო ნ ი, დასახელებული ნაშრომი, გვ. 48.



ბრძოლა მდ. ტრეზისთან.

ჰანიბალმა აყარა ბანაკი, ღამის საფარქვეშ ტიცინუსზე გადაიარა და ჩრდილოეთ იტალიაში პლაცენციასთან შეჩერდა. ამ დროს დაიწყო კელტების მღელვარება, რომელნიც ჰანიბალში რომაელთა უღლისაგან განმათავისუფლებელს ხედავდნენ. 2 ათასი კელტი ჰანიბალს ეახლა. ამან აიძულა პუბლიუსი კლავ უკან დაეხია მდინარე ტრეზის აღმოსავლეთით. აქ მას შეუერთდა სემპრონიუსის არმია, რომელიც სენატმა ლილიბეუმიდან გაიწვია, რათა კოლეგას დაეხარებოდა.


ჰანიბალმა განგებ მისცა რომაელ კონსულებს შეერთების საშუალება. იგი ვარაუდობდა, რომ ორი არმიის შეერთება დააიმედებდა რომაელებს და არ მოერიდებოდნენ ჰანიბალთან ბრძოლას, რაც საშუალებას მისცემდა კართაგენელ სარდალს ერთი დარტყმით ორივე არმია დაემარცხებინა.

ჰანიბალმა რომაელებთან ახლოს გაშალა ბანაკი. ქარის ნაწილი გაგზავნა იმ კელტების ასაოხრებლად, რომელნიც ორქოფობდნენ. მათ, თავის მხრივ, დახმარებისათვის რომაელებს მიმართეს. სემპრონიუსმა მათ დასახმარებლად ათასი მებრძოლი გაგზავნა. რომაელებმა გადალახეს მდინარე ტრებია და მტერს ეკვეთნენ. ამ ბრძოლაში, რომელშიც ორივე მხარე მიეშველა თავისიანებს, რომაელებმა უფრო მცირე ზარალი ნახეს, ვიდრე კართაგენელებმა. კართაგენელთა ამ დამარცხებას პოლიბიოსი ხსნის იმით, რომ თითქოს ჰანიბალი მზად არ იყო გადამწყვეტი ბრძოლისათვის⁷⁷. შესაძლებელია, ეს ჰანიბალის ტაქტიკური ხრიკი იყო, რომელსაც კართაგენელმა სარდალმა იბისათვის მიმართა, რომ გაეხალისებინა ტიბერიუს სემპრონიუსი და მისთვის დიდ ბრძოლაში გამარჯვების იმედი მიეცა.

პუბლიუსი გენერალური ბრძოლის წინააღმდეგი იყო. იგი ვარაუდობდა, რომ ზამთრის ვარჯიშები მებრძოლებს გამოაწრობდა და შესაძლოა, კელტებიც, თავიანთი მერყევი ხასიათის გამო, კვლავ რომაელების მხარეზე გადასულიყვნენ. ჰანიბალმა კარგად იცოდა პუბლიუსის ეს განზრახვა. ამიტომ მან გადაწყვიტა როგორმე მოეხერხებინა ბრძოლის გამართვა ტიბერიუსის მორიგეობისას. იგი ცდილობდა ესარგებლა კელტების საბრძოლო აღტყინებით და ეშურებოდა, რაც შეიძლება ჩქარა გაემართა ბრძოლა, რადგან გამოუცდელი, ცოტა ხნის წინათ შეგროვილი რომაული ლეგიონების დამარცხება, რომელთაც ჯერ ვერ მოესწროთ ჯეროვანი საბრძოლო წვრთნის გავლა, ადვილი იყო. ჰანიბალმა გადაწყვიტა ხაფანგი მოეწყო მოწინააღმდეგისათვის. მან თავისი გეგმა გაანდო სამხედრო საბჭოს, რომლის წევრებმაც მოიწონეს სარდლის აზრი. ამის შემდეგ სარდალმა ათასი ცხენოსანი და ქვეითი გაგზავნა ჩასასაფრებლად, ხოლო ნუმიდიელებს უბრძანა მიახლოებოდნენ მტრის ბანაკს და მოწინააღმდეგისათვის თავს მოეხვიათ ბრძოლა.

ბრძოლა მოხდა ცივ ამინდში. რომაელი მებრძოლები და ცხენები ბრძოლაში უჭმელნი ჩაებნენ. მათ გადალახეს ცივი მდინარე, რომელიც მებრძოლებს მკერდადღე სწვდებოდა. კართაგენელები კი დანაყრდნენ, ცხენები შეკაზმეს ბრძოლისათვის, ტანი დაიზილეს ზეთით და ყოველმხრივ მომზადებულნი ჩაებნენ ბრძოლაში.

⁷⁷ პოლიბიოსი, დასახელებული ნაშრომი, ტ. I, გვ. 319.



რომელი მხედარი.

ტიბერიუსი წამოეგო პანიბალის ანკესზე. მან ნუმბდიელებს დაადევნა ჯერ ცხენოსნები, შემდეგ 6 ათასი ქვეითი; ნუმბდიელებმა პირი იბრუნეს. პანიბალმა დაუცადა შესაფერის მომენტს და მთელი ძალები ჩააბა ბრძოლაში. კართაგენელმა სარდალმა მთელი ქვეითი ჯარი 20 ათასი კაცის რაოდენობით ერთ სწორ ზაზზე განალაგა, კავალერია, რომელიც კელტ მოკავშირეებთან ერთად, 10 ათას კაცს აღემატებოდა, ორ ნაწილად გაყო და ფლანგებზე დააყენა. ფლანგებს შორის გაანაწილა სპილოებიც.

ტიბერიუსის ქვეითი ჯარი 36 ათასი კაცისაგან შედგებოდა. კავალერია 4 ათას მხედარს ითვლიდა. დარწმუნებული თავის ძალაში, იგი „ამაყად, დინჯად, საბრძოლო წყობით გაემართა შტრის წინა-აღმდეგ“⁷⁸.

⁷⁸ პოლიბიუსი, დასახელებული ნაშრომი, ტ. I, გვ. 323.

შეტაკებისთანავე გამომეღვენდა, რომ რომაელები ბევრ რამეში ჩამორჩებოდნენ კართაგენელებს. მათ ნუმიდიელებთან შეტაკებისას ხელშუბების დიდი რაოდენობა დახარჯეს. ისე რომ, როდესაც მთავარი ძალები ბრძოლაში ჩაებნენ. მეზრძოლთა უმეტესობას ხელშუბები აღარ ჰქონდა, ხოლო დიდი ნაწილი, სინესტის გამო, უვარგისი აღმოჩნდა. კართაგენელები კი დასვენებული ძალებით ჩაებნენ ბრძოლაში და სარდლის ყველა ბრძანებას ზუსტად ასრულებდნენ.

კართაგენელთა კავალერიამ შეავიწროვა მოწინააღმდეგის ფლანგები. ამის შემდეგ საქმეში ჩაერია ჯარის ძირითადი მასა, თან ჩასაფრებული ნუმიდიელები გამოვიდნენ საფრიდან და ზურგიდან დაარტყეს მტერს. მოწინააღმდეგეს ჟღერდნენ კართაგენელთა სპილოებიც. რომაელები დამარცხდნენ. 10 ათასმა რომაელმა გაქცევით უშველა თავს. კართაგენელებს მკირე ზარალი მოუვიდათ, რაც მეტწილად კელტებზე მოდიოდა⁷⁹.

„ბრძოლა მდინარე ტრებიასზე შეიძლება განვიხილოთ როგორც ეტაპი კანასკენ მიმავალ გზაზე“⁸⁰.

ტრებიასზე ბრძოლაში გამოვლინდა ჰანიბალის დიდი სამხედრო ნიჭი. ტრებიასზე ბრძოლის შესახებ დენისონი შენიშნავს, რომაელების სარდალს ბრძოლა რომ არ მიეღო კართაგენელთა კავალერიისათვის ხელსაყრელ პირობებში, მაშინ „ბრძოლის შედეგით უთუოდ სულ სხვა იქნებოდა. ტრებიას ბრძოლამ ნათელყო, რომ კართაგენელთა ქვეითი ჯარი ძლიერ ჩამორჩებოდა რომაულს“⁸¹. ამ ბრძოლამ რომაელებს დაანახვა, რომ კართაგენელი სარდლის წინააღმდეგ უფრო სერიოზული, ყოვლისმომცველი საომარი სამზადისი იყო საჭირო, რომ მათ წინააღმდეგ დიდოსტატი სარდალი იღვა.

რომაელთა ჯარების დამარცხებამ დედაქალაქში დიდი შეშფოთება გამოიწვია. მათ კიდევ უფრო გულმოდგინედ იწყეს. ომისათვის მზადება. გამწვავდა პარტიული ბრძოლა. დემოკრატიულმა პარტიამ კონსულად ფლამინიუსი გაიყვანა. კონსულად იქნა აგრეთვე არჩეული გნეუს სერვილიუსი. რომაელებმა დახმარებისათვის

⁷⁹ პოლიბიოსი, დასახელებული ნაშრომი, ტ. 1, გვ. 324—325.

⁸⁰ E. A. P ჰ ზ ი. История военного искусства, М., 1955, с. 318.

⁸¹ დენისონი, დასახელებული ნაშრომი, გვ. 54.

სიცილიის მეფე ჰიერონს მიმართეს. მან 1500 მებრძოლი გამოგზავნა. კონსულები რომისა და მოკავშირეების ჯარებს დედაქალაქში უყრიდნენ თავს.

ჰანიბალმა ზამთარი კელტიკაში გაატარა. „ის რომის მოკავშირეებს განსაკუთრებით პატივისცემით ექცეოდა, ეუბნებოდა მათ, რომ სამტროდ კი არ არის მოსული, არამედ. — რომაელების წინააღმდეგ — მათ დასახსნელად. ამ სიტყვებთან ერთად იმ მიზნით, რომ იტალიის მცხოვრებთა გული მოეგო, ტყვეები გამოსასყიდის გარეშე შინ გაუშვა⁸².

გაზაფხულის დადგომისთანავე ფლამინიუსი ტირენიაზე გავლით არეცინისაკენ გაემართა, ხოლო გნეუს სერვილიუსმა არიმინუმისაკენ გასწია, რომ იქ დალოდებოდა მტერს.

კელტები უკმაყოფილებას გამოთქვამდნენ იმის გამო, რომ მათი ტერიტორია იმის ასპარეზად იქცა და სურდათ იგი როგორმე თავიანთი მიწა-წყლიდან გადაეტანათ, რითაც ნადავლში წილს დაიღებდნენ. ჰანიბალმა გადაწყვიტა დაეკმაყოფილებინა მათი სურვილი.

კართაგენელმა სარდალმა გადაწყვიტა მტრისთვის დიდი ბრძოლა გაემართა. მაგრამ ყველა გზას რომაელები დაარაჯობდნენ.

ამ გარემოებამ აიძულა ჰანიბალი სხვა გამოსავალი მოეძებნა. მან ჭაობზე გავლა გადაწყვიტა. ეს გზა, თუმცა უდიდეს ჯაფას მოითხოვდა, მაგრამ მოკლე და მტრისათვის შეუძმჩნეველი იყო. ჰანიბალის ამ გადაწყვეტილებამ ჯარში შემფოთება გამოიწვია, მაგრამ ბელადის გადაწყვეტილება ურყევი იყო. წინ მან ლიბიელები და იბერები გაუშვა, საერთოდ, თავისი არმიის საუკეთესო ნაწილი. მათვე გაატანა ალალი. სურსათის მარაგზე არ უზრუნია, რადგან ფიქრობდა, თუ გაიმარჯვებდა სურსათის შოვნა არ გაუძნელდებოდა, ხოლო დამარცხებულს იგი აღარ დასჭირდებოდა. საარიერგარდო ჯარს სათავეში ჰანიბალმა მაგონი ჩაუყენა. ეს იმას ნიშნავდა, რომ, თუ კელტები ვერ აიტანდნენ ლაშქრობის სიმძიმეს და პირს იბრუნებდნენ, მაგონს ისინი თავისი კავალერიით უნდა შეეჩერებინა.

ლაშქრობა უდიდესი სიძნელებით იყო აღსავსე. ჯარი იტანჯებოდა უძილობისაგან, რადგან სამი დღისა და ოთხი ღამის განმავ-

⁸² პ. ო. ლ. ბ. ი. ს. ი., დისახელებული ნაშრომი, ტ. I, გვ. 327.

ლობაში შემომრებს ჰაობიდან გამოსვლის საშუალება არა ჰქონდათ. ყველაზე მეტად კელტები იტანჯებოდნენ და იღუპებოდნენ, რადგან მათ სიარული უხდებოდათ მეწინავე ნაწილების მიერ უკვე გავლილ ლაფში, რომელიც ამის გამო, კიდევ უფრო გაუვალი ხდებოდა. პირუტყვის დიდი ნაწილი ტალახში ეფლობოდა და იღუპებოდა. თვით პანიბალი ჯართან ერთად ინაწილებდა გზის მთელ სიძიძემს. „აუტანელმა ჯაფამ მას თვალის ავადმყოფობა დამართა, რის გამოც, ცალი თვალი დაკარგა კიდევ. მდგომარეობა არ აძლევდა არც გაჩერების, არც თვალის მკურნალობის საშუალებას“⁸³.

ამ ოპერაციას ალპებზე გადასვლას აღარებენ⁸⁴.

პანიბალმა ბოლოს გადალახა ჰაობი და არიციუმთან დაბანაკდა. მან დაასვენა და მოაწესრიგა ლაშქარი. ამის შემდეგ საბრძოლო სამზადისს შეუდგა.

კართაგენელმა სარდალმა გადაწყვიტა ახლომდებარე მიდამოების აოხრება, რითაც ფლამინიუსს გააღიზიანებდა და აიძულებდა ბრძოლა მიეღო. მან კარგად იცოდა, რომ ფლამინიუსი რომაელთა არა მარტო სარდალი, არამედ პარტიის ლიდერიც იყო.

ფლამინიუსის ჯარი ბრძოლისათვის გამოუყვანი იყო. იგი შედგებოდა ბრძოლებში გამოუცდელი ახალგაზრდებისაგან და, რაც ძალიან მნიშვნელოვანია, „შეიარაღებული ნაკლები ჰყავდა, ვიდრე უიარაღო“⁸⁵.

პანიბალის მოქმედებით გაღიზიანებულმა ფლამინიუსმა გადაწყვიტა ბრძოლა მიეღო. მოწინააღმდეგენი ერთმანეთს ტრაზიმენის ტბასთან შეხვდნენ. ფლამინიუსი კართაგენელი სარდლის ხაფანგში მოექცა.


ბრძოლა მოხდა მინდორზე, რომელიც მთებით მთავრდებოდა. პანიბალმა მინდვრის ვიწრო შესავალში დააყენა იბერები და ლიბიელები. დანარჩენი არმია მალღობებს იქით ჩაასაფრა. მან დააცალა ფლამინიუსის არმიას, რომ ხეობაში მთლიანად შესულიყო და შემდეგ ყოველი მხრიდან დაარტყა. „მტერი რომაელებს ერთბაშად ესხმოდა ფრონტიდან, ზურგიდან და ფლანგებიდან“⁸⁶.

⁸³ პოლიბოსი, დასახელებული ნაშრომი, ტ. I, გვ. 330.

⁸⁴ А. И. Л а п и н. Ганнибал. М., 1939, с. 83.

⁸⁵ პოლიბოსი, დასახელებული ნაშრომი, ტ. I, გვ. 330.

⁸⁶ იქვე. გვ. 333—334.



ბრძოლა ტრაზიმენის ტბასთან.

რომაელებმა მნიშვნელოვანი ზარალი განიცადეს. „ბრძოლის ველზე დაეცა 15 ათასი რომელი, რომელთაც საშუალება არ ჰქონდათ გასცლოდნენ იქაურობას, ან რაიმე წინააღმდეგობა გაეწიათ... ნაწილი რომაელებისა, რომელნიც ხეობაში ფერდობებზე შორის მდებარე ვიწროებში ჩაკეტეს, დააღუპნენ სამარცხვინო და უმწეო სიკვდილით, კერძოდ: ტბასთან მომწყვდეულნი, ისინი დაფეთებულნი, იარაღიანად ტბაში ცვივოდნენ, სულ უფრო შორს მიდიოდნენ და შემდეგ ჩერდებოდნენ; წყლის ზემოთ მხოლოდ მათი თავები იღებოდა მორჩანდა. როცა, ამის შემდეგ, გამოჩნდა (ქართაგენელთა) ცხენოსანი ჯარი და უთუო დაღუპვა დაემუქრათ, ბედკრულნი, ზეაწეული ხელებით, ბაგეებზე მუდარით, იღუპებოდნენ მტრის ხელით ან ერთმანეთს ევედრებოდნენ სიკვდილს, ანდა თვით ისპობდნენ სიცოცხლეს“⁸⁷.

რომაელები სასტიკად დამარცხდნენ. ბრძოლაში დაეცა ფლამინიუსიც. ჰანიბალის ზარალი უმნიშვნელო იყო და ისიც უმეტესწილად კელტებზე მოდიოდა⁸⁸.

⁸⁷ ბოლიბიოსი, დასახელებული ნაშრომი, ტ. I, გვ. 334.

⁸⁸ იქვე, გვ. 335.

გნეუს სერვილიუსმა, რომ გაიგო ჰანიბალის ტირენიაში შექრის ამბავი, მაშინვე კოლეგის დასახმარებლად გასწია. მან დააწინაურა ოთხი ათასი მხედარი გაიუს ტერენციუსის მეთაურობით. ჰანიბალმა მას მპარბალი შეაგება; რომაელები დამარცხდნენ.

ტრაზიმენის ბრძოლა ჩასაფრების და მთელი არმიის ხაფანგში გაბმის საუკეთესო მაგალითია⁸⁹.

სასტიკმა მარცხმა შეშფოთება გამოიწვია რომაელებში. მათ საგანგებო ღონისძიებებს მიმართეს და უარყვეს ომის ხელმძღვანელობის პრაქტიკა არჩეული თანამდებობის პირების მეთაურობით. ისინი დაწმუნდნენ, რომ მდგომარეობა მოითხოვდა საგანგებო ღონისძიების გატარებას, მიხვდნენ, რომ საჭირო იყო სრულუფლებიანი ბელადი, დიქტატორი, რომელიც საგანგებო და გადამკრეულ ღონისძიებებს განახორციელებდა. დიქტატორად დანიშნულ იქნა ფაბიუს მაქსიმუსი „განსაკუთრებული ჰკუისა და ბუნებისაგან უხვად დაჭილდოებული ადამიანი“⁹⁰.

დიქტატორმა ბრძანა სერვილიუსის ორი ლეგიონისათვის კიდევ ორი დაემატებინათ და გაეძლიერებინათ. სოფლის მცხოვრებლებს, სადაც შესაძლებელი იყო უახლოეს ხანებში ჰანიბალის გამოჩენა, მან უბრძანა ქალაქისათვის თავი შეეფარებინათ და გაეწადგურებინათ ნათესები, რათა მტერს ვერაფერი ეგდო ხელთ⁹¹.

დიქტატორის უფლებები ფართო იყო. თუ კონსულები ვალდებულნი იყვნენ რაიმე ღონისძიების განსახორციელებლად სენატის ნებართვა აეღოთ, დიქტატორი სრულუფლებიანი ხელმძღვანელი იყო, რომლის დანიშნვისთანავე ყველა თანამდებობის პირი რომში, სახალხო ტრიბუნებს გარდა, კარგავდა თავის უფლებებს⁹².

კვინტუს ფაბიუს მაქსიმუსი დინჯი, მტკიცე, ფრთხილი პიროვნება იყო⁹³.

დიქტატორმა გადაწყვიტა ქვეყნის შიგნით ისეთი საგანგებო ღონისძიებები განეხორციელებინა, რომლებიც ხალხს გაამხნეებდა, ასწევდა მის მორალურ დონეს. ამ მიზნით ბრძანება გასცა ხშირად

⁸⁹ ე. რ ა ზ ი ნ ი, დასახელებული ნაშრომი, გვ. 311.

⁹⁰ პ ო ლ ი ბ ი ო ს ი, დასახელებული ნაშრომი, ტ. I, გვ. 338.

⁹¹ ტ ი ტ უ ს ლ ი ვ ი უ ს ი, დასახელებული ნაშრომი, გვ. 66.

⁹² პ ო ლ ი ბ ი ო ს ი, დასახელებული ნაშრომი, ტ. I, გვ. 338.

⁹³ ი ქ ვ ე, გვ. 339—340.

გაემართათ თეატრალური და მუსიკალური სანახაობანი; ამისათვის გაღებულ იქნა გარკვეული სახსრები⁸⁴.

ფაბიუსმა ჰანიბალთან ბრძოლაში წერილი თავდასხმების ტაქტიკა არჩია. დიქტატორის ასეთ ტაქტიკას ეწინააღმდეგებოდა ცხენოსანი ჯარის უფროსი მარკუს მინუციუსი, რომელიც მისი მოადგილე იყო. მინუციუსი ჯარისკაცთა მასის სულისკვეთებას გამოზატავდა და გადაწყვეტი, დიდი ბრძოლების მომხრე იყო.

ჰანიბალმა აპენინები გადაიარა და სამნიუმის ოლქში შეჩერდა. აქ მან ვენუზია აიღო. ფაბიუსი მას 1—2 დღის სავალზე აედევნა. კართაგენელთა სარდალმა შენიშნა, რომ ფაბიუსი გადაწყვეტ ბრძოლაზე არ მიდიოდა. ამიტომ იგი თამამად გაემართა კაპუის მიდამოებისაკენ, ფალერენისაკენ.

„ამით იგი ფიქრობდა ორი მიზნიდან ერთისათვის მიეღწია: ან აეძულებინა მოწინააღმდეგე ბრძოლა მიეღო, ან ყველასათვის აშკარად დაენახვებინა, რომ სრული გამარჯვება მოიპოვა და რომაელები ბრძოლის ველიდან გაეცალნენ... საქმე ისაა, რომ მიუხედავად რომაელების ორი დამარცხებისა, იტალიის არც ერთი ქალაქი არ ჩამოსცილებია მით და არ გადასულა კართაგენელის მხარეზე“⁸⁵, —წერს პოლიბიოსი.

ბოლოს ფაბიუსსა და ჰანიბალს შორის მცირე ხასიათის შეტაკება მაინც მოხდა. ფაბიუსმა ხაფანგში გაბმა დაუპირა მტერს, მაგრამ კართაგენელი სარდალი გაუსხლტა და საკმაოდ მნიშვნელოვანი ზარალი მიაყენა რომაელებს. ამის შემდეგ ფაბიუსი რომში გაემართა რელიგიურ ცერემონიალში მონაწილეობის მისაღებად და ავტორიტურად მისი ადგილი მარკუს მინუციუსმა დაიკავა.

რომში წასვლის წინ, ტიტუს ლივიუსის გადმოცემით, ფაბიუსმა მაქსიმუსმა მინუციუსი გაათრთხილა, რომ ჰანიბალისათვის არაერთაშორ შემთხვევაში არ გაემართა ბრძოლა.

— ნუ გგონია, — ამბობდა ის, — რომ ზაფხულმა უკვალოდ ჯანვლო. ექიმებიც ზომ ავადმყოფებს ხშირად სიმშვიდით ჰკურნავენ.

⁸⁴ Плутарх. Сравнительные жизнеописания. Ч. II, перевод с греческого В. Алексеева. Перикл и Фабиус Максим. С.-Петербург, 1891, с. 179.

⁸⁵ პოლიბიოსი, დასახელებული ნაშრომი, ტ. I, გვ. 342.

ჩვენთვისაც აუცილებელი იყო დამარცხებათა დავიწყება, გაუთავებელი წარუმატებლობის შემდეგ შვებით ამოსუნთქვა⁸⁶.

ჰანიბალი გამოსაზამთრებლად გერუნიაში დარჩა. აქ შეტაკება მოხდა ჰანიბალისა და მინუციუსის ჯარებს შორის. ჰანიბალის ჯარისკაცებს, რომელნიც მინდვრად იყვნენ გასულნი და სურსათს იმარაგებდნენ, მარკუსი მოულოდნელად თავს დაესხა. მან გარკვეული ზიანიც მიაყენა კართაგენელებს, ამან კიდევ უფრო ასწია მისი პრესტიჟი.

ახლა ძნელია იმის თქმა, მინუციუსმა მართლა გაიმარჯვა, თუ ეს ჰანიბალის ჩვეული ხრიკი იყო, რითაც მან წაახალისა მოწინააღმდეგე. ასეა თუ ისე, მინუციუსის წარმატებამ, რომლის შესახებაც მან სასწრაფოდ აცნობა რომს, დიდი აღფრთოვანება გამოიწვია. დედაქალაქში ყველა ზეიმობდა, გარდა ფაბიუსისა.

ამასთან, რომში, ისე როგორც ჯარში, ფაბიუსს მრავალი მტერი ჰყავდა. მას ბრალს სდებდნენ დანაშაულებრივ ზოზინში, სიმხდალეში, თვით ღალატშიც კი.

ღალატის თაობაზე ხმები ჰანიბალის ხრიკის გამო გავრცელდა: ჰანიბალმა ბრძანება გასცა აეოხრებინათ და გადაეწვათ დიქტატორის მამულის ახლომახლო ყველაფერი და მხოლოდ ფაბიუსის სახლისა და მინდვრისათვის არ ეხლოთ ხელი. ამან, ცხადია, კიდევ უფრო გააღრმავა ეჭვები.

სახალხო ტრიბუნი მარკუს მეთილიუსი, რომელიც კრებას კრებაზე იწვევდა, დიქტატორის მისამართით სიძულვილით აღსავსე სიტყვებს წარმოთქვამდა.

«გაგონილა, — ამბობდა ის, — ამას რაღა ვუწოდოთ! ჯერ ერთი, როცა ჯართან არის ჩვენი დიქტატორი, გამარჯვების საშუალებას არ აძლევს მას. ახლა, როცა რომში დაბრუნდა, ამ გამარჯვებას საეჭვოდ ხდის... მას მხოლოდ ერთი რამ სურს: როგორმე რაც შეიძლება დიდხანს შეინარჩუნოს ძალაუფლება და ამიტომ აქიანურებს ომს, იმიტომ უყურებს მშვიდად, როგორ აოხრებს პუნი იტალიის მიწას, იმიტომ გამოკეტა ბანაკში ჩვენი ბრძოლის წყურვილით ანთებული ლეგიონები, მებრძოლებს ხმლები და შუბები ჩამოართვა, თითქოს მტრები იყვნენ. ფაბიუსი მთლად უნდა გადავყენოთ, მაგრამ მე თანახმა ვარ შედარებით მცირეზეც: უფლებებით გავუ-

⁸⁶ ტ ი ტ უ ს ლ ი ვ ი უ ს ი, დასახელებული ნაშრომი, გვ. 71.

თანაბროთ დიქტატორს მისი თანაშემწე—თქვენ ხომ ყველამ გშვე-
ნიერად იცით, როგორი მამაცია მარკუს მინუციუსი!“⁹⁷

ფაბიუსმა ყური არ ათხოვა სახალხო ტრიბუნის სიტყვებს და
სასწრაფოდ გასწია უკან, ჯარისაკენ. მაგრამ მეტილიუსმა სახალხო
კრებას მიღებინა დადგენილება, რომლითაც მინუციუსი ისეთივე
უფლებებით აღიჭურვა, როგორი უფლებებიც ჰქონდა ფაბიუს მაქ-
სიმუსს. დადგენილების ამბავი დიქტატორმა გზაში გაიგო, მაგრამ
ჩვეული სიღინჯით გადაიტანა ეს დიდი შეურაცხყოფა. ამრიგად, ერ-
თისა და იმავე ომის საწარმოებლად ერთდროულად ორი დიქტა-
ტორი აღმოჩნდა, რაც რომის ისტორიაში მანამდე გაუგონარი ამბავი
იყო⁹⁸.

ფაბიუს მაქსიმუსი კარგად ხედავდა მინუციუსის აღზევებას და
თავისი პრესტიჟის დაცემას, მაგრამ მტკიცედ იდგა გადაწყვეტილე-
ბაზე. უმრავლესობა მას მშვიდარად თვლიდა. მისი ტაქტიკის სის-
წორე მხოლოდ ჰანიბალს ესმოდა. ფაბიუსი დარწმუნდა, რომ მინუ-
ციუსი, რომელიც გაიტაცა დაფნის გვირგვინის ძიებამ, მზად იყო
ჰანიბალისათვის გენერალური ბრძოლა გაემართა. ამიტომ მან კო-
ლეგას შესთავაზა ერთმანეთს შორის გაენაწილებინათ ჯარი. მინუ-
ციუსი სიამოვნებით დათანხმდა.

ჰანიბალმა, ჩვეული გამჭკრიახობით, ორ დიქტატორს შორის არ-
სებული უთანხმოება თავის სასარგებლოდ გამოიყენა. მან მარკუსი
ხაფანგში გააბა და მის ჯარს სრული განადგურება მოელოდა, რომ
წინდახედულ ფაბიუს მაქსიმუსს დროზე არ მიესწრო მისთვის.

ამ ბრძოლამ ყველას დაანახვა ფაბიუსის ტაქტიკის სისწორე.
ამაში დარწმუნდა მინუციუსიც. პლუტარქეს ცნობით, მან აღიარა
თავისი შეცდომები და მოუწოდა ჯარს დამორჩილებოდა ფაბიუს
მაქსიმუსის ბრძანებას „დიქტატორი თქვენი ერთადერთი მეთაურია.
მე სარდლობას გაგიწევთ მხოლოდ იმისათვის, რომ ფაბიუსს მად-
ლობა გადავუხადო. მე მისი უპირველესი მსახური ვარ და დავე-
შორჩილები მის ბრძანებას“⁹⁹.

216 წელს ფაბიუს მაქსიმუსს ვადა გაუვიდა და რადგან მისი
ტაქტიკით უმრავლესობა უკმაყოფილო იყო ქვეყანასა და სენატში,

⁹⁷ ტ ი ბ უ ს ლ ი ე ი უ ს ი, დასახელებული ნაშრომი, გვ. 72.

⁹⁸ პ ო ლ ი ბ ი ო ს ი, დასახელებული ნაშრომი, ტ. I, გვ. 356.

⁹⁹ პ ლ უ ტ ა რ ქ ე, დასახელებული ნაშრომი, გვ. 198.

თავის რწმუნებები გადასცა ორ კონსულს—სერვილიუს გემინუსსა და ატილიუს რეგულუსს.

216 წელს სენატის პარტიამ კონსულის პოსტზე გაიყვანა ლუციუს ემილიუს პაულუსი, ხოლო დემოკრატიულმა პარტიამ გაიუს ტერენციუს ვარონი.

რომაელებმა ამ დროისათვის ადამიანთა უდიდეს რეზერვს მოუყარეს თავი. ჩვეულებრივ ისინი ყოველ წელს ოთხ ლეგიონს აგროვებდნენ; ლეგიონში კი ოთხი ათასი ქვეითი და ორასი მხედარი იყო. ამ პერიოდისათვის რომაელებმა რვა ლეგიონს მოუყარეს თავი: თითოეულ ლეგიონში, მოკავშირეებს გარდა, იყო ხუთი ათასი მეომარი ქვეითი და 200 მხედარი¹⁰⁰.

მკვლევართა აზრით, ამ დროს რომაელ მობილიზებულთა რაოდენობა შთელი თავისუფალი შოსახლეობის 6-10%-ს უდრიდა.

დელბრიუკის გამოანგარიშებით საბრძოლო დაძაბვა 6,5%-ს შეადგენდა, ხოლო დანაკარგის ჩათვლით 7,5%-ს¹⁰¹. დელბრიუკის აზრს იზიარებს ფრანც მერინგიც¹⁰².

ახლად არჩეულმა კონსულებმა გამამხნეველელი სიტყვებით მიმართეს ჯარს. ემილიუს პაულუსი, კართაგენელთა ჯარის დაბალ მორალურ დონეზე მიუთითებდა. კართაგენელები იბრძვიან სხვისი ქონების, სხვისი დოვლათის ხელში ჩასაგდებად, რომაელებს ბრძოლა მოელით საკუთარი თავისათვის, სამშობლოსათვის, ცოლებისა და შვილებისათვის¹⁰³, ამბობდა იგი.

ემილიუს პაულუსი ფაბიუს მაქსიმუსის ტაქტიკას მიჰყვებოდა. იგი თავს არიდებდა ჰანიბალთან დიდი ბრძოლის გამართვას და ყოველმხრივ ცდილობდა, რომ მოკავშირეები არ ჩამოსცილებოდნენ.

შაგრამ ვარონი საწინააღმდეგო პოზიციაზე იდგა. იგი გენერალური ბრძოლის მომხრე იყო და როდესაც კონსულობის ჯერი მასზე მიდგა, ბრძოლა გარდუვალი გახდა, ცხადია, ჰანიბალისათვის ხელსაყრელ პირობებში.


ჰანიბალს წარსულმა ბრძოლებმა ნათლად დანახვა, რომ რომაული ქვეითი ჯარი სჯობნიდა კართაგენულს. ამიტომ გადაწყვიტა

¹⁰⁰ პოლიბიუსი, დასახელებული ნაშრომი, ტ. I, გვ. 360—361.

¹⁰¹ ჰ. დელბრიუკი, დასახელებული ნაშრომი, ტ. I, გვ. 284.

¹⁰² ფ. მერინგი, დასახელებული ნაშრომი, გვ. 52.

¹⁰³ პოლიბიუსი, დასახელებული ნაშრომი, ტ. I, გვ. 362—363.



ნუმიდიელი მხედარი.

თავისი ქვეითა ჯარი გარდაეკმნა რომაულ ყაიდაზე. მეომრები შეაიარაღა ნადავლი იარაღით და ლეგიონებად დაყო. ამის შემდეგ კართაგენელთა ქვეითი ჯარი ოთხი კვირის განმავლობაში ინტენსიურად ვარჯიშობდა. განსაკუთრებული ყურადღება მიაქცია კართაგენელმა სარდალმა სხვადასხვა სახეობის ჯარების შეხამებული ბრძოლის საკითხს.

ჰანიბალმა მებრძოლებს სიტყვით მიმართა და გაამხნევა ისინი იმით, რომ ბრძოლა მათთვის ხელსაყრელ პირობებში მოხდებოდა. აქვე გაიხსენა, რომ პირობა, რომელიც ჯარს მისცა ალპების გადალახვის შემდეგ, ასრულდა.

„თქვენ უკვე გახდით ამ მიწა-წყლის მფლობელები, — ამბობდა ის, — ახლა მოგველის ბრძოლა ქალაქებისა და მათი სიმდიდრისათვის. ამ ბრძოლაში გამარჯვებისთანავე მთელი იტალიის მფლობელები გახდებით. ეს ერთი ბრძოლა საზღვარს დაუდებს თქვენს აწმყო ჯაფას და მთელი ქვეყნის მპყრობელნი იქნებით. აი რატომ აღარ არის სიტყვები საჭირო. საჭიროა საქმენი, რადგან დარწმუნებული ვარ, რომ ღმერთების ნებით მალე აღსრულდება ჩემი დაპირებები“¹⁰⁴.

¹⁰⁴ პოლიბიუსი, დასახელებული ნაშრომი, ტ. I, გვ. 365—366.

კანას ბრძოლა

ბრძოლა კანასთან მოხდა, მღ. აუფიდუსის ნაპირას, ამ ბრძოლას მხატვრულად აგვიწერს ტიტუს ლივიუსი¹⁰⁵★ ცონსულმა ვარონმა, 216 წლის 2 აგვისტოს, ემილიუს პაულუსთან ყოველგვარი მოთათბირების გარეშე, ბრძოლის ნიშანი მისცა. რომაელთა მარჯვენა ფლანგზე ცხენოსნები იდგნენ, შემდეგ ქვეითები, მარცხენა ფლანგის კიდე მოკავშირეთა ცხენოსნებმა დაიკავეს. უფრო ახლოს იდგა ქვეითი ჯარი, რომელიც ცენტრში რომაულ ლეგიონებს უერთდებოდა. მეწინავე რაზმს მეშურდულეები შეადგენდნენ. ტერენციუს ვარონი მარცხენა ფლანგს სარდლობდა, ემილიუს პაულუსი მარჯვენას, ცენტრს — გემინუს სერვილიუსი. †


‡ ჰანიბალმა თავისი არმია შემდეგნაირად განალაგა: გალებისა და ესპანელებისაგან შემდგარი ცხენოსანი ჯარი — მარცხენა ფლანგზე, ნაპირის მახლობლად, მარჯვენა ფლანგზე — ნუმიდელი ცხენოსნები, ცენტრი შემადგრებული იყო ქვეითი ჯარით. ისე რომ, ორივე ფლანგი აფრიკელებს ეკირათ, მათ შორის კი გალები და ესპანელები იყვნენ. ქვეითი ჯარის რიცხვი 40 ათასს უდრიდა, კავალერია 10 ათასს შეადგენდა. მარცხენა ფლანგს სარდლობდა ჰასდრუბალი, მარჯვენას — მაჰარბალი, ცენტრს — ჰანიბალი და შისიძმა მაგონი. †

მზე ორივე მხარეს ორბი სხივებით ანათებდა, ხოლო ქარი რომაელების წინააღმდეგ ქროდა, რაც კართაგენელებისათვის ხელსაყრელი იყო.

ბრძოლის დაწყებისთანავე რომაელთა ცხენოსანმა ჯარმა მტერს ზურგი უჩვენა, მაგრამ ქვეითებმა გაკვეთეს კართაგენელთა წყობა, როცა „ფრონტის ხაზი ჯერ გასწორდა, ხოლო მერე, შემდგომი უკანდახვევის გამო, შეიქმნა შუაში გალუნული ხაზი, — აფრიკელებმა წინ წაიწიეს ორივე მხარეზე და ფლანგებით გარს შემოერთყნენ რომაელებს, რომლებიც წინდაუხედავად მტრის ცენტრისაკენ მიისწრაფოდნენ. გაკიმეს რა თანდათან ფლანგები, კართაგენელებმა მალე ჩაქეტეს მტრები ზურგიდანაც“¹⁰⁶.

¹⁰⁵ ტ ი ტ უ ს ლ ი ვ ი უ ს ი, კანასთან ბრძოლა. XX 45, 47, 54 (იხ. გ. გოზალიშვილი, ძველი ისტორიის ქრესტომათია, თბილისი, 1951 წ., გვ. 97—102).

¹⁰⁶ ი ქ ვ ე, გვ. 99.



კანას ბრძოლა.

ჰანიბალმა ხერხს მიმართა. მან ხუთასი ნუმიდიელი შეუგზავნა მტერს, ვითომდა მათ მხარეზე გადასულნი: რომაელები ანკესზე წამოეგნენ, ნუმიდიელებმა ზურგიდან დაარტყეს, რითაც გააადვილეს კართაგენელთა გამარჯვება.

ემილიუსი მამაცურად იბრძოდა, მაგრამ მისი ბედი უკვე გადაწყვეტილი იყო. რომაელებმა ბოლოს მტერს ზურგი აქციეს.

ბრძოლაში დაეცა ემილიუსი პაულუსი. ვარონი სამარცხვინოდ გაიქცა. „შეოთხე, თითქმის სასიკვდილო პრილობა რომის სახელმწიფოს მიაყენა კანამ, აპულიის უცნობმა პატარა სოფელმა... კანასთან თითქოს ყველაფერი ხელს უმართავდა ჩვენი ბედკრული არმიის მარცხს: მტრის წინამძღოლი, ღელამიწა, ცა, ჰაერი და მთელი დანარჩენი ბუნება“¹⁰⁷.

¹⁰⁷ ფლორუსი, II, 6. იხ. ვ. ს. სერგევი, ძველი რომის ისტორიის ნარკვევები, ტ. I. თბილისი, 1949, გვ. 124.

ბრძოლის დამთავრების შემდეგ, ტიტუს ლივიუსის გადმოცემით, მაპარბალმა შესთავაზა ჰანიბალს, რომ ნება მიეცა გაელაშქრა რომში. კართაგენელ სარდალს თავი შეუწყაებია. მაშინ მაპარბალს ასე მიუმართავს ჰანიბალისათვის:

„რასაკვირველია, ღმერთები ყველაფერს არ აძლევენ ერთ აღადმიანს: შენ, ჰანიბალო, იცი გამარჯვების მოპოვება, მაგრამ არ იცი გამარჯვებით სარგებლობა“¹⁰⁸.

კანასთან მეომარი მხარეების ზარალის შესახებ ცნობას გვაწვდის პოლიბიოსი. „ნათასი მხედრიდან, წერს ის, ვენუზიაში გაქცევით თავს უშველა 70-მა კაცმა და მოკავშირეთა დაახლოებით 300 კაცი გაიფანტა და მიიმალა ქალაქში. რაც შეეხება ქვეითებს, მათგან ბრძოლაში ტყვედ იქნა წაყვანილი 10 ათასი კაცი; იყვნენ სხვა ტყვეებიც, რომელთაც მონაწილეობა არ მიუღიათ საქმეში. ბრძოლაში მონაწილეთაგან დაახლოებით 3 ათასი კაცი გაიქცა ქალაქის მიდამოებში. დანარჩენი 70 ათასი კაცი ღირსეულად დაეცა ბრძოლაში... ჰანიბალის ჯარიდან დაიღუპა დაახლოებით 4 ათასი კელტი, 1500 ლიბიელი და იბერი და დაახლოებით 200 ცხენოსანი“¹⁰⁹.

მკვლევართა აზრი კანასთან რომაელთა არმიის რაოდენობის შესახებ სხვადასხვაა. ზოგი იზიარებს პოლიბიოსის ცნობას (დაახლოებით 80 ათასი კაცი), ზოგი არა. ნ. ა. მაშკინის აზრით, კანასთან დაახლოებით 50 ათასი რომაელი იბრძოდა¹¹⁰. ვ. ს. სერგეევი სარწმუნოდ მიიჩნევს პოლიბიოსის ცნობას¹¹¹.

„კანასთან დამარცხებამ რომაელები დიდად შეაშფოთა. არასოდეს, ვიდრე რომი ფეხზე იდგა, მის კედლებში ასეთ შიშსა და ძრწოლას აღვილი არ ჰქონია“¹¹².

მაგრამ სენატი სასოწარკვეთილებაში არ ჩავარდნილა. იგი აკეთებდა ყოველივეს, რაც შეეძლო: ამხნევებდა ხალხს, ამაგრებდა ქალაქს, გულდასმით ემზადებოდა შემდეგი ბრძოლებისათვის.

¹⁰⁸ ტ ი ტ უ ს ლ ი ვ ი უ ს ი, კანასთან ბრძოლა (იხ. გ. გოზალიშვილის დასახელებული ქრესტომათია, გვ. 101).

¹⁰⁹ პ ო ლ ი ბ ი ო ს ი, დასახელებული ნაშრომი, ტ. I, გვ. 373.

¹¹⁰ Н. А. М а ш к и н, История древнего Рима. 1947, с. 152.

¹¹¹ ვ. ს. ს ე რ გ ე ე ვ ი, რომის ისტორიის ნარკვევები, ტ. I, გვ. 124.

¹¹² ტ ი ტ უ ს ლ ი ვ ი უ ს ი, კანას ბრძოლა, XX, 45—47 (იხ. გ. გოზალიშვილის დასახელებული ქრესტომათია, გვ. 331).

კანას ბრძოლა ჰანიბალის გამარჯვებათა გვირგვინია. იგი ჰანიბალის გენიალური სამხედრო ნიჭის გამოვლინებაა.

3. დელბრიუკი კანას ბრძოლის გარჩევისას ჰანიბალს უპირისპირებს ნაპოლეონსა და კლაუზევიცს და უპირატესობას ჰანიბალს ანიჭებს¹¹³.

ისტორიკოსი ო. იეგერი აღფრთოვანებით წერს, კანას შემდეგ სედანამდე ასეთი ბრძოლა აღარ მომხდარაო¹¹⁴.

კანა ბრძოლის ისეთი ტიპია, სადაც რიცხობრივად მცირე მოწინააღმდეგე მრავალი ოსტატური ხერხის გამოყენებით აბათილებს მოწინააღმდეგის რიცხობრივ უპირატესობას და ბრწყინვალე გამარჯვებას აღწევს.

კანასთან ბრძოლა ტაქტიკური გარემოცვის ნიმუშია. ჰანიბალმა შესანიშნავად აულო ალლო შექმნილ სიტუაციას, შემოქმედებითად შეახამა ჯარისა და იარაღის სხვადასხვა სახეობა და ბრწყინ-

ვალე გამარჯვება მოიპოვა მსოფლიოში განთქმულ რომაულ ქვეით ჯარზე.

ცნობილმა სამხედრო სპეციალისტმა, ა. ფონ შლიფენმა გამოაქვეყნა ნაშრომი, რომელშიც განხილულია ფრიდრიხ დიდისა და ნაპოლეონის ომები, 1866 წლის სამხედრო კამპანია, 1870—71 წლების საფრანგეთ-პრუსიის ომი. ამ სერიოზულ ნაშრომს მან სახელად დაარქვა — „კანა“ და პირველი თავი სწორედ კანას ბრძოლას მიუძღვნა. დასკვნით ნაწილში იგი წერს: „კანას ბრძოლის სრული განმეორება სამხედრო ისტორიის ფურცლებზე აღარ ყოფილა. ამისათვის საჭირო იყო, ერთი მხრივ, ჰანიბალი, ხოლო მეორე მხრივ, ტერენციუს ვარონი, ორივე ხელს უწყობს დიადი მიზნის განხორციელებას.



რომაელი
ქვეითი ლეგიონერი.

¹¹³ 3. დ ე ლ ბ რ ი უ კ ი, დასახელებული ნაშრომი, ტ. I, გვ. 361.

¹¹⁴ ო. ი ე გ ე რ. Всеобщая история в четырех томах, т. I, С.-Петербург, 1894, с. 331.

ჰანიბალი ვალდებულია, თუ არა აქვს ძალთა უპირატესობა, შექმნას ის. სედანის გარდა სრულყოფილი კანა აღარ ყოფილა¹¹⁵.

მეცნიერთა უმრავლესობა სწორად თვლის ჰანიბალის გადაწყვეტილებას, კანას შემდეგ რომ არ გაილაშქრა რომზე.

ფ. მერინგის აზრით, ჰანიბალის გენიალობას სწორედ ის მოწმობს, რომ მიუხედავად კართაგენელთა ჯარის სამხედრო-ტექნიკური უპირატესობისა, იგი მაინც არ გაუტაცნია უტოპიურ მიზნებს. კანასთან ბრწყინვალე გამარჯვების შემდეგ რომზე არ გაილაშქრა, რადგან კარგად იცოდა, რომ საუკეთესოდ გამაგრებული და მომარაგებული ქალაქის აღება გაუჭირდებოდა, ეს კი გამოიწვევდა მისი გეგმის მთავარი ნაწილის—რომის კავშირის დაქუცმაცების—ჩაშლას¹¹⁶. რომისაგან მოკავშირეთა ჩამოცილება კი ნიშნავდა „მის სისხლისაგან დაცლას, თანდათანობით სიკვდილს“¹¹⁷.

ამ აზრის საწინააღმდეგოდ ი. შ. კორაბლიოვი აღნიშნავს, რომ თუკი რომში ჰანიბალს ოდესმე გამარჯვების რაიმე შანსი გააჩნდა, ეს ჰქონდა კანასთან გამარჯვების შემდეგ, რომელიც გარდატეხის პუნქტად იქცა ომის მსვლელობაში¹¹⁸.

დენისონი კანასთან კართაგენელთა ჯარის მოქმედებას აღარებს მაკედონელის ოპერაციებს ისოსთან და არბელასთან¹¹⁹.

პროფ. ნ. ა. მაშკინის აზრით, ჰანიბალმა იმიტომ არ გაილაშქრა რომზე, რომ მან მნიშვნელოვანი ზარალი ნახა და იმიტომ გამარჯვება დიპლომატიური მიზნებისათვის გამოიყენა¹²⁰.

აქ ანგარიში უნდა გაეწიოს ერთ გარემოებას. ჰანიბალმა, როგორც თავისი დროის დიდმა სარდალმა, შესანიშნავად იცოდა რომაელთა დედაქალაქის მდგომარეობა კანას ბრძოლამდე. მას ესმოდა, რომ კართაგენელთა ცხენოსან ჯარს, რომელიც მთელი შისი არმიის გამარჯვებათა სულისჩამდგმელი იყო, რომის ვიწრო ქუჩებ-

¹¹⁵ Ш л и ф ф е н. Канны. Перевод с немецкого. М., 1936, с. 351.

¹¹⁶ Ф. М е р и н г. Очерки по истории войн и военного искусства, с. 52—53.

¹¹⁷ ი ქ ვ ე.

¹¹⁸ ი. შ. კ ო რ ა ბ ლ ი ო ვ ი, დასახელებული ნაშრომი, გვ. 142.

¹¹⁹ დ ე ნ ი ს ო ნ ი, დასახელებული ნაშრომი, გვ. 56.

¹²⁰ ნ. მ ა შ კ ი ნ ი, დასახელებული ნაშრომი, გვ. 192.

ში გაუძნელდებოდა მოძრაობა; რომ რომის მცხოვრებნი, ჯართან ერთად, ძალის მაქსიმალური დაძაბვით იბრძოლებდნენ მშობლიური ქალაქის დასაცავად, რასაც სულ ადვილად შეიძლება მოჰყოლოდა კართაგენელთა არმიის მარცხი, ყოველ შემთხვევაში დიდი ზარალი, რომლის ანაზღაურებაც ძალზე ძნელი, თითქმის შეუძლებელი იქნებოდა შორეულ იტალიაში მყოფი პანიბალისათვის. ეს კი იმას ნიშნავდა, რომ პანიბალის ძირითადი გეგმა რომის კავშირის დაშლისა კატასტროფის წინაშე დადგებოდა და კანასთან გამარჯვების მთელი ნაყოფი ფუჭად ჩაივლიდა. რომის აღება კი ჯერ კიდევ არ გამოიწვევდა რომის კავშირის კაპიტულაციას, თუმცა. გამარჯვების შემთხვევაში მას დიდი მნიშვნელობა მიენიჭებოდა. რომზე გალაშქრება კანას ბრძოლის შემდეგ, აქ მოპოვებული გამარჯვების უდიდესი მნიშვნელობის მიუხედავად, მაინც ავანტიურა იყო, რისგანაც პანიბალი შორს იდგა: აქვე უნდა აღინიშნოს, რომ პანიბალმა კანასთან მნიშვნელოვანი კი არა, უმნიშვნელო ზარალი. ნახა და ამ ზარალის დიდი ნაწილი მისი არმიის 'ყველაზე უფრო მერყევე ნაწილზე — კელტებზე მოდიოდა. ამ მცირე დანაკარგს არ შეეძლო ბისი რომზე გალაშქრება შეეჩერებინა, თუკი პანიბალს რომის აღება ძირითად მიზნად ექნებოდა დასახული, მაგრამ ეს ასე არ იყო.


კანასთან გამარჯვების შედეგები უდიდესი იყო. ამ გამარჯვების წყალობით რომის კავშირში მნიშვნელოვანი ბზარები გაჩნდა.

კართაგენის სენატში, ტიტუს ლივიუსის გადმოცემით, ცხარე კამათი გაიმართა პანიბალის ძმის შაგონის ჩამოსვლასთან დაკავშირებით. შაგონმა, კართაგენელთა ისედაც უდიდესი წარმატებანი, კიდევ უფრო გააზვიადა და თქვა. მტერმა დაკარგა 200 ათასი მოკლულს და 50 ათასი დაჭრილის სახითო. ამის დასამტკიცებლად შაგონმა კურჩის შესასვლელში მოკლულ რომაელთათვის წაძრობილი ოქროს ბეჭდების მთელი მთა აღმართა. თან თურმე დასძინა, რომ ასეთ ოქროს ბეჭდებს მხოლოდ მხედრები ატარებდნენ რომში და თან ყველაზე უფრო წარჩინებულნი.

მაგრამ ამისათვის კი არ გამოუგზავნია პანიბალს შაგონი, — წერს ლივიუსი, — არამედ იმისათვის, რომ მოეთხოვა დამხმარე ძალა და ფული. რადგან, ამტკიცებდა იგი, რაც უფრო ახლოა გადამწყვეტი და საბოლოო გამარჯვება, იმდენად მეტი ძალაა საჭირო, რათა მას მივალწიოთო.

ბარკოდები ზეიმობდნენ და ერთმანეთს ულოცავდნენ ჰანიბალის ასეთ გამარჯვებას. ერთ-ერთ მათგანს ჰანონისთვის დამცინავად უკითხავს:

„ჰანონ, ახლაც ისევე არ გვირჩევე ომს რომის წინააღმდეგ? ისევე მოითხოვ რომაელთათვის ჰანიბალის გადაცემას?“



საიერიშო ბოგირებით აღჭურვილი რომაული¹
საბრძოლო ხომალდი.

— დიჯაც, — უპასუხა ჰანონმა, — მანამდე ვიდარდებ წინა ზავზე, ვიდრე არ დაიდება ახალი, და მანამდე არ მივცემ მოსვენებას თქვენს ძღვევამოსილ სარდალს; ვიდრე არ დამიმტკიცებთ, რომ ახალი ზავი უფრო სამართლიანი და ხელსაყრელია ძველზე. მაგრამ ზავზე აქ კრინტიც არ არის დაძრული. დაუფიქრდით, რას გვეუბნება ჰანიბალი. „მე დაევამარცხე მტრის ჯარი — კიდევ გამომიგზავნეთ ჯარისკაცები!“ იმავეს ხომ არ მოითხოვდა, თვითონ ის რომ დაემარცხებინათ? „მე ხელთ ვივდე მტრის ორი ბანაკი — გამომიგზავნეთ პური და ფული!“ „სად გაქრა ნადავლი, რომელიც ხელთ იგდო ორ ბანაკში?!“¹²¹

¹²¹ ტ. ბ. უ. ს. ლ. ე. ი. უ. ს. ი., დასახელებული ნაშრომი, გვ. 105—106.

კანას ბრძოლამ რომს იძიებე ლიხვარი ჩასცა. კართაგენელებმა უძლეველების სახელი მოიხვეჭეს. რომის კავშირის შიგნით გაძლიერდნენ კართაგენული ორიენტაციის მომხრენი. რომის შემდეგ მეორე ცენტრის კაპუას პლებსმა პანიბალს ქალაქის კარიბჭენი გაუღო და იგი კართაგენელების ხელში გადავიდა. პანიბალი მის მიცხოვრებთ ლმობიერად მოექცა, რადგან კარგად იცოდა, რომ კაპუასადმი კართაგენელთა დამოკიდებულება სხვათა თვალშიც ასწევდა პანიბალის პრესტიჟს და მომხრეებს გაუმრავლებდა. ამიტომ მან ქალაქს დაუტოვა თავისი წყობა, კანონები. მის მიცხოვრებთ არ ევალებოდათ პანიბალის ჯარში სამსახური და არც ერთ კართაგენელს უფლება არ ჰქონდა უდიერად მოქცეოდა კაპუელს. ყოველივე ამან კი ის გამოიწვია, რომ კაპუას სხვებმაც მიბაძეს და თითქმის მთელი სამხრეთი იტალია პანიბალის ხელთ აღმოჩნდა. ცენტრალური იტალია კი კვლავ რომის ერთგული რჩებოდა.


ტიტუს ლივიუსი დაწვრილებით გადმოგვცემს პანიბალის მხარეზე კაპუას გადასვლის ამბავს. კაპუაში, წერს ის, თავიდანვე დიდი გავლენა ჰქონდა უბრალო ხალხს. მათი მეთაური ყოფილა პაკუვიუს კალავიუსი, რომელსაც მოხერხებულად დაუპატიმრებია ქალაქის სენატი, მერე მისი წევრები გაუთავისუფლებია, მაგრამ ფაქტიური ძალაუფლება ხალხს დარჩენია. კაპუელებმა სიხარულით იკისრეს პანიბალის მოკავშირეობა.

„მხოლოდ ერთმა კაცმა, სახელიდ დეციუს მაგიუსმა, — წერს ტიტუს ლივიუსი, — ძველი მოკავშირეების ღალატი ხმამაღლა დაგმო და ურჩია თანამოქალაქეთ, ვიდრე გვიან არ იყო, დაფიქრებულიყვნენ. მისმა გაბედულმა სიტყვებმა პანიბალამდე მიაღწია და პუნმა დეციუსს სთხოვან სწვეოდა. დეციუსმა კატეგორიული უარი შეუთვალა, თან მიუთითა იმაზე, რომ პანიბალს არავითარი ძალაუფლება არ ჰქონდა კამპანიელი თანამოქალაქეების შიმართ. პუნმა ბრძანება გასცა ურჩი დეციუსს მაგიუსი ბორკილებგაყრილი მიეგვარათ მისთვის, მაგრამ შემდეგ, ხალხის მღელვარებას მოერიდა, ბრძანება შეცვალა და მოქალაქეებს შეუთვალა, ხვალ კაპუაში თვითონ მოვალო“²².

²² ტ ი ტ უ ს ლ ი ვ ი უ ს ი, დასახელებული ნაშრომი, გვ. 103.

.ჰანიბალი კაპუაში მივიდა. მთელი კაპუის მოსახლეობა, გარდა დეციუს მაგიუსისა, კართაგენელ სარდალს დიდი ამბით შეეგება.

მეორე დღეს შეიკრიბა სენატი, რომელსაც ჰანიბალმა სიტყვით მიმართა. მან მადლობა გადაუხადა კაპუელებს მეგობრული შეხვედრისათვის და დაარწმუნა ისინი, რომ კაპუა, მას შემდეგ, რაც იგი რომს აიღებდა, იტალიის დედაქალაქი გახდებოდა. მაგრამ დეციუს მაგიუსი არ შეიძლება ჩაითვალოს კამპანიელად და მეგობრობის ხელშეკრულების ტექსტი მასზე არ ვრცელდება, რადგან ის არ არის კართაგენელთა მეგობარი. თუკი სენატი ამას ეთანხმება, ამბობ-



დიდი ბალისტა.

1.

და ჰანიბალი, მაშინ აქვე გამოიტანოს დადგენილებათ. სენატმა სამოქალაქო უფლება აპყარა დეციუს მაგიუსს.

ჰანიბალი გამოვიდა კურჩიდან და ბრძანა მისთვის წარედგინათ დეციუს მაგიუსი. იგი კვლავ ამაყად არ დაემორჩილა ბრძანებას. მაშინ მას ბორკილები დაადეს და ისე მიჰგვარეს ჰანიბალს.

ტიტუს ლივიუსი გადმოგვცემს უშიშარი კამპანიელის სიტყვებს:

— დამიხედეთ კამპანიელებო, თქვენს თავისუფლებას, რომელიც ასეთი დიდი ჭაფით მოიპოვეთ! დღისით-მზისით, ზედ ფორუმზე, თქვენს თვალწინ გვარიშვილობით არცთუ უკანასკნელი კაპუელი გათოკეს და დასასჯელად მიათრევენ! მაშ, მორთეთ ქალაქი

და შეეგებეთ ჰანიბალს, იზეიმეთ მისი მოსვლის დღე, და გახდით თქვენს თანამოქალაქეზე მისი ტრიუმფის მოწმე!"¹²³

კართაგენელებმა დეციუს მაგიუსს თავზე ლაბადა გადააცვეს და ზომალდით კართაგენისკენ გაისტუმრეს. მაგრამ, თუ ტიტუს ლივიუსს დაუუჭერებთ, გზაზე ქარიშხალი ამოვარდნილა და ზომალდი ეგვიპტის ქალაქ კირენაში გარიყულა, სადაც დეციუსს შავიუსს თავშესაფარი უთხოვია.

ჰანიბალმა სცადა რომაელებთან საზავო მოლაპარაკების დაწყება, ეს მისია მან დაავალა თავის უახლოეს თანამებრძოლს კართალონს. იგი სასტიკი უარით გამოისტუმრეს და მკაცრად გააფრთხილეს, რომ საღამომდე დაეტოვებინა რომის კუთვნილი ტერიტორია.

კართალონის მისიის წარუმატებლობა, წერს ი. შ. კორაბლიოვი, ჰანიბალისთვის იყო პირველი, თან ყველაზე უფრო ავბედითი, სიმპტომი: რომს ომი წაგებულად არ მიაჩნდა, რათა ჰანიბალისათვის შეწყალება და ზავი ეთხოვა!¹²⁴.

რომის შინაპოლიტიკურ ცხოვრებაში ასეთი სურათია: პლებსი ომის პირველ წლებში აქტიურ მონაწილეობას იღებს პოლიტიკურ ცხოვრებაში, მაგრამ ომის ბოლო წლებში მისი მოქმედი ნაწილი არმიაში იყო დაკავებული და პოლიტიკურ ცხოვრებაში გადამწყვეტი როლის შესრულება შეწყვიტა. ძლიერდებიან მხედრები¹²⁵.

ჰანიბალის შექრას იტალიაში თან მოჰყვა საშუალო და წვრილი მწარმოებლის გაჩანაგების პროცესი, ხელოსნებისა და წვრილი მწარმოებლის გაღატაკება, მიცრემიწიანი მიწათმფლობელების გაბოგანობა.

ტიტუს ლივიუსი გადმოგვცემს, რომ ორი უმდიდრესი და უძლიერესი ხალხის ბრძოლამ ყველა მეფისა და მმართველის ყურადღება მიიპყრო; მათ შორის, რა თქმა უნდა, მაკედონიის მეფის ფილიპესიც. თავიდანვე იგი სიხარულით შეხვდა ამ ომს, ოღონდ ვერ გაერკვია, ვისი გამარჯვება სურდა.

მაგრამ, კანას ბრძოლის შემდეგ, ყოყმანს ბოლო მოეღო და კართაგენთან კავშირის დასადებად ჰანიბალს ელჩები გაუგზავნა.

¹²³ ტიტუს ლივიუსი, დასახელებული ნაშრომი, გვ. 104.

¹²⁴ ი. შ. კორაბლიოვი, დასახელებული ნაშრომი, გვ. 143.

¹²⁵ ნ. ა. მაშკინი, დასახელებული ნაშრომი, გვ. 183.

ჰანიბალთან გზად მიმავალი ელჩები რომაელთა პატრულს გადაეყარნენ. თავდაპირველად იეშმაკეს და პრეტორ მარკუს ვალერიუსს დაუძვრნენ, მაგრამ შემდეგ კვლავ ჩაუვარდნენ ხელთ რომაელებს¹²⁶.

ჰანიბალსა და ფილიპეს შორის კავშირი ითვალისწინებდა ყოფილიყენენ მოკავშირენი „როგორც მეგობრები, ნათესავეები და ძმები“¹²⁷. პატივი ეცათ ერთმანეთის უფლებებისათვის, ერთმანეთის კანონებისათვის, ორივე მხარე მტრად უნდა მოჰკიდებოდა ერთ-ერთი მოკავშირე მხარის მტერს, რომაელების წინააღმდეგ ებრძოლათ საბოლოო გამარჯვებამდე, სეპარატული ზავი არ დაედოთ რომაელებთან. ამის შემდეგ ტექსტში ნათქვამი იყო, თუ როგორ უნდა მოქცეოდნენ მოკავშირენი რომს მისი დამარცხების შემდეგ.

ასეთივე ხელშეკრულება დადო ჰანიბალმა ჰიერონთან. სამოკავშირეო პირობები ითვალისწინებდა ურთიერთდახმარებას. ომის დამთავრების შემდეგ კართაგენელებსა და სირაკუზელებს შორის საზღვარი უნდა გასულიყო ქ. ჰიმერაზე, რომელიც სიცილიას ორ თანასწორ ნაწილად ყოფდა. შეთანხმება ადვილად იქნა მიღწეული, რადგან „კართაგენელებმა ყველაფერზე თანხმობა განაცხადეს“¹²⁸.

ჰანიბალისა და ფილიპეს კავშირის რომის დიპლომატიამ ეტოლიის კავშირი დაუპირისპირა. რომმა ფილიპე მეხუთეს წინააღმდეგ შეეკრა კოალიცია, რომელშიც შედიოდნენ ეტოლიის კავშირი, ბერძნული ქალაქები და პერგამოსის მეფე ატალოს პირველი. ამ ომს ეწოდება პირველი მაკედონური ომი (215—205 წწ.). ზავის პირობებით რომაელებმა ფილიპეს დაუთმეს ზოგიერთი ტერიტორია ილირიაში, მაგრამ რომის დიპლომატიამ მიაღწია იმას, რომ ომი ძირითადად საბერძნეთის ტერიტორიაზე და მოკავშირეთა ძალებით მიმდინარეობდა. რაც მთავარია, ფილიპემ ვერ მოახერხა იტალიაში შეჭრა და ჰანიბალისათვის არსებითი დახმარების გაწევა.

სიცილიაში საქმე ასე წარიმართა: 213 წელს რომაელებმა იქ გაგზავნეს მარკუს კლავდიუს მარცელუსი. მარცელუსს ანტიკური ავტორები გვიხასიათებენ როგორც ნიჭიერ სარდალს. პლუტარქე

¹²⁶ ტ ი ტ უ ს ლ ი ვ ი უ ს ი, დასახელებული ნაშრომი, გვ. 117.

¹²⁷ პ ო ლ ი ბ ი ო ს ი, დასახელებული ნაშრომი, ტ. II; გვ. 101.

¹²⁸ ი ქ ე ე, გვ. 97.



ხელის ტარანი.

მის შესახებ წერს, იგი ზუთჯერ გახდა კონსულობის ღირსიო. რომაელები მას და ფაბიუსს ნიშნავდნენ ხან ერთს კონსულად, ხოლო მეორეს პროკონსულად, ხანაც პირიქით, რითაც, წერს ის, ერთის სიამაყეს მეორის წინდახედულებას უერთებდნენ¹²⁹.

„რომი და კართაგენი, — გადმოგვცემს ტიტუს ლივიუსი, — სიცილიაში აგზავნიდნენ დამხმარე ძალებს. თითქოს საომარი მოქმედების მთავარმა თეატრმა იქ გადაინაცვლაო“¹³⁰. მაგრამ მარცელუსმა სირაკუზის აღება კარგა ხნის განმავლობაში ვერ შეძლო. ამ ქალაქის დაცვას ხელმძღვანელობდა იმ დროის უდიდესი გამომგონებელი და ინჟინერი არქიმედე. მან შექმნა ქვის სატყორცნი იარაღები, რომლებიც დაახლოებით 262 კილოგრამიან ქვებს ისროდნენ. ის მანქანები ისე შემადრწუნებლად მოქმედებდნენ რომაელებზე, რომ ვერაფრით ვერ შეძლეს მიდგომოდნენ ან მიახლოებოდნენ ქალაქსა

მხოლოდ 211 წლის გაზაფხულზე შეძლეს რომაელებმა ქალაქის აღება. იგი გაძარცვეს. ბრძოლაში დაიღუპა არქიმედეც. პლუ-

¹²⁹ Плутарх. Сравнительные жизнеописания. Перевод с греческого Спиридона Дестуняса. т. IV, с. 327.

¹³⁰ ტ ი ტ უ ს ლ ი ვ ი უ ს ი, დასახელებული ნაშრომი, გვ. 151.

ტარქე გადმოგვეცემს, ქალაქი რომაელებმა მაშინ აიღეს, როცა იგი გეომეტრიულ ამოცანას ხსნიდაო. ზოგის გადმოცემით არქიმედეს მარცელუსისათვის სხვადასხვა ხელსაწყოთი სავსე ყუთი მიჰქონდა. მეომრებს ყუთში ოქრო ეგონათ და გაძარცვის მიზნით მოკლეს¹³¹.

კანას შემდეგ ნოლა იყო პირველი ქალაქი, რომლის აღებაც ჰანიბალმა ვერ შეძლო.

ტიტუს ლივიუსი დეტალურად აგვიწერს ჰანიბალის მიერ ამ ქალაქის წინააღმდეგ გალაშქრებას. ქალაქს იცავდა კლავდიუს მარცელუსი. ჰანიბალმა ვერა და ვერ მოახერხა ქალაქის აღება. უფრო მეტიც. მოხერხებულ მომენტში რომაელი სარდალი თავს დაესხა მოალყე კართაგენელებს და საგრძნობი ზარალი მიაყენა მათ. „თუ რა ზარალი ნახა ორივე მხარემ, ზუსტად არავენ იცის. — ზოგი ამტკიცებს, რომ კართაგენელებმა დაკარგეს სამი ათასი კაცი, რომაელებმა კი მხოლოდ ხუთასი, — მაგრამ უდიდესი გამარჯვება, შესაძლებელია მთელი ომის განმავლობაში ყველაზე მნიშვნელოვანიც კი, ის გახლდათ, რომ ეს იყო პირველი გამარჯვება კანას შემდეგ“¹³².

ამას მოჰყვა კაზილინის ალყა, რომლის ერთბაშად აღება არ მოხერხდა, რადგან ქალაქი, ჯერ ერთი, კარგად იყო გამაგრებული, მეორეც, მისი დამცველნი საოცარი სიმამაცით იბრძოდნენ. ამიტომ ჰანიბალმა იგი მოალყეთ დაუტოვა, თვითონ კი თავისი ძირითადი ძალებით კაპუაში წავიდა გამოსაზამთრებლად.

ტიტუს ლივიუსს მიაჩნია, რომ კაპუაში გამოზამთრებამ კართაგენელებზე უარყოფითად იმოქმედა. მისი აზრით კართაგენელთა ჯარი შეჩვეული იყო ყოველგვარ გაჭირვებასა და განსაცდელს, სამაგიეროდ კარგი ცხოვრებისათვის სრულიად მოუშზადებელი იყო. ახლა იგი პირველ ზამთარს ატარებდა ბინებში, სითბოსა და განცხრომაში: და მისთვის, ვინც ნებისმიერი განსაცდელის წინაშე წარბს არ იხრიდა, დამღუპველი აღმოჩნდა ფუფუნება და ნეტარება. — დიდხანს ძილი, ლოთობა, ღორმუცლობა, უსაქმურობა. ჰანიბალის ჯარისკაცები ამ ცდუნებებს ხარბად დაეწაფნენ და სულ ცოტა ხანში ზორციელად და სულეერად მოდუნდნენ, დაკარგეს ბრძოლის ყოველგვარი სურვილი და მეთაურის წინაშე შიში.

¹³¹ პ ლ უ ტ ა რ ქ ე, დასახელებული ნაშრომი, გვ. 382.

¹³² ტ ი ტ უ ს ლ ი ვ ი უ ს ი, დასახელებული ნაშრომი, გვ. 108.

„კაპუაში გამოხატვითობად დაბინავენ, სამხედრო საქმის უტოდნეთა აზრით, — წერს ლივიუსი, — სარდლის საბედისწერო შეცდომა იყო, უფრო მიუტყეველი, ვიდრე კანას ბრძოლის შემდეგ რომზე ვალაშქრების დაყოვნება, იმიტომ რომ, კანასთან დაყოვნებით მან გამარჯვება გადადო, კაპუაში გამოხატვითობით კი ომის გამარჯვების ყოველგვარი შანსი დაკარგა. მებრძოლები თითქოს შეცვალეს: შემდგომ ზაფხულში მრავალი ჯარისკაცი გადაწერტირდა, აღარ სურდა საბანაკო კარვებში ღამის თევა, დამქანცველი ლაშქრობები, ჯარისკაცის ღარიბული ულუფა, განშორება საყვარელ ჭეგობრებთან და კაპულ ქალიშვილებთან“¹³³.


ჰანიბალი ომის კარიბჭისთან

რომაელები წერილ ბრძოლებზე გადავიდნენ. გამოცხადებულ იქნა 17 წლის ასაკიდან საყოველთაო გაწვევა. კერძო მესაკუთრეებისაგან სახელმწიფოს ხარჯზე 8 ათასი ახალგაზრდა მონა გამოისყიდეს და მათგან ორი ლეგიონი ჩამოაყალიბეს. რომი ემზადებოდა ხანგრძლივი ომისათვის. ჰანიბალის არმია კი ასეთი ომისათვის მზად არ იყო. ამას ემატებოდა ის ფაქტიც, რომ იგი თანდათან შემცირდა. განსაკუთრებით შეთხელდა ამ არმიის ყველაზე უფრო საიმედო ნუმიდური-იბერიული ნაწილი, რომლის შევსებაც ჰანიბალს არ შეეძლო. ყოველივე ამას ზედ ერთვოდა კართაგენელ ხელისუფალთა მოუქნელობა და საბოტაჟი. ამ ფაქტორებმა გადამწყვეტი მნიშვნელობა იქონია ომის შემდგომ მსვლელობაზე. ომის სასწორი თანდათან რომაელების მხარეზე გადაიხარა. ეს გამოწვეული იყო ობიექტური ფაქტორებით, რომელთა გაბათილებაც არ შეეძლო ჰანიბალის გენიას.

სირაკუზის აღების შემდეგ რომაელებმა კაპუას შემოარტყეს ძლუა. გარემოცვა 212 წელს დაიწყო. ჰანიბალმა რამდენჯერმე სცადა გამოეწვია რომაელები დიდ ბრძოლაში, მაგრამ საწადელს ვერ შიდაწია. ამავე დროს რომაელებმა ახლომახლო მიდამოებში გადაწვეს ცხენის საკვები, ისე რომ, ჰანიბალს ცხენის ფურაჟის შოვნა

¹³³ ტიტუს ლივიუსი, დასახელებული ნაშრომი. გვ. 110.

გაუქირდა. კართაგენელმა სარდალმა ტაქტიკურ მანევრს მიმართა. მან გადაწყვიტა რომისაყენ გაელაშქრა, რითაც „ძრწოლას მოჰგერი-
და ქალაქის მცხოვრებთ და იქნებ რაიმე გაეწყო მის წინააღმდეგ“¹³⁴.
ჰანიბალი ფიქრობდა, რომ „ან აიძულებდა აბიუსს მოეხსნა ალყა
და წასულიყო შშობლიური ქალაქის დასახმარებლად, ან გაეყო თა-
ვისი ძალები. ასეთ შემთხვევაში შესაძლებელი იქნებოდა დაეძლია
როგორც დასახმარებლად წამოსული ჯარი, ისე კაპუსთან ადგილზე
დარჩენილი“¹³⁵.



ჩარდახში მოთავსებული მძიმე ტარანი.

ჰანიბალმა მარშით გასწია რომისაყენ. იგი მოულოდნელად გა-
მოჩნდა ქალაქიდან 40 სტადიონის (დაახლოებით 7 კმ-ის) დაშორე-
ბით. ამ ამბავმა დიდი პანიკა გამოიწვია რომში. სწორედ ამ დროს
წარმოიშვა ცნობილი გამოთქმა „Hannibal ante portas“ („ჰანი-
ბალი კარიბჭესთანაა“). ეს გამოთქმა შემდეგში უდიდესი საფრთხის
სინონიმად იქცა, ვ. ი. ლენინი 1918 წლის მარტში, როცა მიუთი-
თებდა გერმანელების მიერ საბჭოთა რუსეთისათვის თავს მოხვეულ
ომზე და მით გამოწვეულ უდიდეს საფრთხეზე, წერდა: „ომი უნდა
ვაწარმოოთ ნამდვილად, ანდა სრულიად არ ვაწარმოოთ. შუათანა
რამ აქ არ შეიძლება იყოს... ჰანიბალი კარს მოგვადგა, — ეს არ უნ-
და გვავეიწყდებოდეს არც ერთ წუთს“¹³⁶.

¹³⁴ პოლიბოსი, დასახელებული ნაშრომი, ტ. II, გვ. 180.

¹³⁵ იქვე.

¹³⁶ ვ. ი. ლენინი, ტ. 22, გვ. 72.

პოლიბიოსი ასე გადმოგვცემს ამ დროს ქალაქის მოსახლეობის განწყობილებას: „მომხდარი ამბის შესახებ ცნობა მოვიდა რომში და ქალაქის მცხოვრებნი უფარესად შეაშფოთა და შეაძრწუნა. მოულოდნელი და გაუგონარი ამბავი იყო, იმიტომ, რომ ჰანიბალი არასოდეს არ მოსულა ასე ახლო ქალაქთან... მამაკაცები მიეშურებოდნენ ქალაქის კედლებისა და ქალაქის წინ მოხერხებული ადგილების დასაკავებლად, ხოლო ქალები ტაძრებში დადიოდნენ და ღმერთებს ევედრებოდნენ“¹³⁷.

რომის დასაცავად ძლიერ ძალებს მოუყარეს თავი. ქალაქი ემზადებოდა მოწინააღმდეგესთან სამკედრო-სასიციოცხოლო ბრძოლისათვის.

ტიტუს ლივიუსი გადმოგვცემს, რომ ჰანიბალი ორი ათასი ცხენოსნით თითქმის ზედ მიადგა რომის გალავანს, თან ქალაქის ციხესიმაგრეებს ზვერადა. პუნებს ისე თავისუფლად და გულარხინად ეჭირათ თავი, რომ ფულვიუსმა, რომელიც ბრძოლისაგან ცახცახებდა, ცხენოსანი ჯარი გაგზავნა დაუპატიჟებელი სტუმრების გონს მოსაყვანად. ესკვილინუმის მთაზე გაიმართა ბრძოლა; რომელშიც გამარჯვება რომაელებს დარჩენიათ¹³⁸.

მეორე დღეს ჰანიბალმა ჯარი საომრად განალაგა. ფულვიუსმა და კონსულებმა მიიღეს ეს ბრძოლა. შაგრაბ, როცა ყველაფერი მზად იყო, ისეთი თქეში და სეტყვა წამოვიდა, რომ მოწინააღმდეგენი, რომლებიც გალუმპულნი იყვნენ და ხელში იარაღს ვეღარ იჭერდნენ, იძულებულნი გახდნენ ერთმანეთს განშორებოდნენ. ასეთივე ამბავი განმეორდა მეორე დღეს. როგორც კი მოწინააღმდეგენი ერთმანეთს განშორდებოდნენ ხოლმე, ცა მოიწმინდებოდა და გამოიდარებდა.

კართაგენელებმა ეს ღვთის ნებად ჩათვალეს. ჰანიბალს უთქვამს, ერთხელ ჩემმა უჭკუობამ შემიშალა ხელი. რომის აღებაში, მეორეჯერ კი უ განგებამო¹³⁹.

მეცნიერებაში გაბატონებული აზრის მიხედვით, ჰანიბალი ქალაქის აღებას არ ფიქრობდა. ეს შემდეგმა მიზეზებმა განსაზღვრეს: 1. ჰანიბალს არ ჰქონდა საშუალებანი; რომლებიც აუცილებელი

¹³⁷ პოლიბიოსი, დასახელებული ნაშრომი, ტ. II, 180

¹³⁸ ტიტუს ლივიუსი, დასახელებული ნაშრომი, გვ. 221.

¹³⁹ იქვე, გვ. 222.

იყო ისეთი გამაგრებული ქალაქის ასაღებად, როგორიც რომი, იყო.
2. კართაგენელთა დამკვრელი ძალა, კავალერია, თავისუფლად ვერ
იმოქმედებდა რომის ქუჩებში. 3. რომის მოსახლეობა და ჯარი კარ-
გად მომზადებული დაუხვდა მტერს.

ი. შ. კორაბლიოვი წერს, მიუხედავად იმისა, რომ ქალაქ რომის
წინააღმდეგ გალაშქრების შემდეგ პანიბალი იტალიაში თითქმის
ათი წელი უნდა დარჩენილიყო, ომის შედეგი, იქ, არსებითად, უკვე
გადაწყვეტილი იყო. მას აღარაფერი აღარ შეეძლო ელონა, რათა
რამდენადმე შეერყია რომის ბატონობის საფუძველი აპენინის ნა-
ხევარკუნძულზე. მას არც აღამიანთა რესურსები ჰყოფნიდაო¹⁴⁰.

რომის ხარღლებმა ერთხელ კიდევ აცნობეს კაპუას მცხოვ-
რებთ, რომ ის მოქალაქე, რომელიც თავისი ნებით გამოცხადდებო-
და რომაელების ბანაკში, განთავისუფლდებოდა ყოველგვარი სას-
ჯელისაგან. მაგრამ არც ერთი კაცი არ გამოეხმაურა ამ მოწოდე-
ბას¹⁴¹.

საინტერესოდ და ხატოვნად გადმოგვცემს ტიტუს ლივიუსი ქა-
ლაქის სენატის ერთ-ერთ უკანასკნელ სხდომას. სადაც სენატორმა
ბიბიუს ვირიუსმა ასეთი სიტყვით მიმართა კოლეგებს:

„რა სუსტი მეხსიერება გაქვთ, ბატონო სენატორებო! და-
გავიწყდათ, რა დროს ვუღალატეთ რომს: დაგავიწყდათ წვალებით
სული რომ ამოგხადეთ რომაელ მოქალაქეთ, რამდენჯერ დავლაშ-
ქრეთ რომაელთა ბანაკი და როგორ მოვიხმეთ დასახმარებლად პა-
ნიბალი? დაბოლოს; დაგავიწყდათ რა შეურიგებელი სიძულვილით
არიან განწყობილი ჩვენს მიმართ რომაელები? მაშინ მე მოგაგო-
ნებთ“¹⁴².

და ბიბიუს ვირიუსმა დახატა რეალური და კაპუელთათვის
უიმედო სურათი.

„უცხო მტერი იტალიაშია, ყველგან ომია, რომაელები არა-
ფერს დაგიდევენ და ორივე კონსულს გზავნიან კაპუასათვის აღ-
ყის შემოსარტყმელად. პანიბალი მათ ბანაკს თავს ესხმის, ლამის
ხელთ იგდოს, ისინი მაინც არ ეშვებიან დაწყებულ საქმეს. პანი-
ბალმა გაილაშქრა თვით რომზე, იგი ქალაქის გალავანთანაა, და აშ-

¹⁴⁰ ი. შ. კორაბლიოვი, დასახელებული ნაშრომი, გვ. 240.

¹⁴¹ ტიტუს ლივიუსი, დასახელებული ნაშრომი, გვ. 223.

¹⁴² იქვე, გვ. 225.

კარად აგრძნობინებს მტერს, რომ თუკი თავს არ დაანებებენ კაპუსს, იგი დაიპყრობს მათ დედაქალაქს! ნადირნი, რაც გინდ გახელებულნი იყვნენ, ისინიც კი ყველაფერს მიატოვებენ და გარბიან თავიანთი ბოკვერების საშველად, თუკი ბუნაგიდან მათ საცოდავ კივკივს გაიგონებენ, რომაელები კი არ მოეშვნენ კაპუსს. არც ალყამ, არც ცოლებისა და შეილების გოდებამ, რომელმაც თითქმის ჩვენამდე მოაღწია, არც აოხრებამ და არც მათი სახლების, ხატების, ტაძრებისა და მათი წინაპრების საფლავების წაბილწვის შიშმა არ მოახსნევენა რომაელებს კაპუსასათვის ალყა. აი როგორ სწყყურიათ მათ ჩვენი სისხლი! და, სრულიად დამსახურებულადაც: ჩვენ რომ მათ ადგილ-

ზე ვყოფილიყავით, ზუსტად ასევე მოვიქცეოდით.

სიკვდილს. მე არ დავემალე, რადგან ასეთია ღმერთების ნება, რომლებმაც გამარჯვება მტერს არგუნეს და არა ჩვენ—მაგრამ იმ ცანჯვასა და დამცირებას, რასაც რომაელები გვიპირებენ, თავიდან ავიცილებ. ჩემი თვალებით არ ვიხილავ ამაყ აპიუს კლავდიუსს, გულზვიად კვინტუს ფულვიუსს, არ გაყვები ბორკილებდადებული ტრიუმფულ ეტლს ქუჩებში, რომ მერე დიღეგში მომგუდონ, ანდა მიმბანან ბოძზე და მათრახით ნაფლეთებად მიქციონ ზურგი, მერე კი ლიქტორის ნაჯახით წამკვეთონ თავი. მე არ დაეინახავ როგორ აგიზგიზდება ჩემი ქალაქი, ტყვედ როგორ წაასხამენ ჩვენს ქალიშვილებსა და ქაბუკებს, დედებს, ყველას, ვისაც ჩემსავით არ სურს ყოველივე ამის დანახვა, ნადიმზე ვიწვევ. როდესაც



რომაული ტოგა.

ყველანი დავნაყრდებით და შიმშილს დავიკმაყოფილებთ, ჩამოვატარებ ფიალას და პირველად მე მოვსვამ. ეს ფიალა სხეულს აარიდებს ტანჯვას, სულს — დამცირებას და სამუდამოდ დაგვიბ-

შობს თვალისჩინსა და სმენას. მსახურნი ეზოში კოცონს გააჩაღებენ და ჩვენს გვაშებს დაწვავენ. აი სიკვდილისაჲკენ შიშვეალი ერთადერთი ღირსეული და თავისუფალი გზა. მტერს გააოცებს ჩვენი სიმაშაყე. ჰანიბალი კი მიხვდება, თუ რა მოკავშირეებს აქცია ზურგი და უღალატა“¹⁴³.

ბიბიუს ვირიუსს ბევრმა სენატორმა დაუჭირა მხარი. მის სახლში მივიდა ოცდაშვიდი სენატორი, რომლებმაც შესვეს საწამლავი, შემდეგ გულმზურვალედ გამოემშვიდობნენ და უკანასკნელად გადაეხვივნენ ერთმანეთს. ზოგნი ბიბიუსთან დაჩნენ, რათა შთანთქმულიყვნენ საერთო კოცონის ალში, თუმცა, ყველამ მანამდე განუტევა სული, ვიდრე მტრის წინაშე ქალაქის ბჭენი გაიღებოდა¹⁴⁴.

ტიტუს ლივიუსი დაწვრილებით აგვიწერს რომაელთა მიერ კაპუას აღებას და მის სასტიკად დასჯას. მისი გადმოცემით, კაპუაში შევიდა რომაელთა ლეგიონი და მოკავშირეთა ჯარის ათასი ცხენოსანი. ლეგიონის მეთაურმა უპირველეს ყოვლისა იარაღის ჩაბარება ბრძანა. შემდეგ კი უმსხვერპლოდ დაატყვევა კართაგენელთა გარნიზონი. შემდეგ სენატორებს უბრძანა ოქრო-ვერცხლი ჩაებარებინათ, სულ მწეგროვდა რვაას ოთხმოცდაერთი კილოგრამი ოქრო და ათი ათას ორასთერამეტი კილოგრამი ვერცხლი. ორმოცდაცამეტი სენატორი, რომლებიც განდგომის ყველაზე უფრო თავგამოდებული შობხრენი იყვნენ, გაიყვანეს ორ მეზობლად მდებარე ქალაქში, ჩაკეტეს და მცველები მიუყენეს.

დამნაშავეთა დასჯის თაობაზე კლავდიუსი და ფულვიუსი ვერ შეთანხმებულან. კლავდიუსი უფრო ლმობიერი გზის მომხრე იყო, ფულვიუსი კი მათ სასტიკად დასჯას მოითხოვდა. ამიტომ კლავდიუსმა კოლეგას შესთავაზა, რომ მათი დავა რომის სენატს გადაეწყვიტა.

მიუხედავად ფულვიუსის უკიდურესი გაცეცხლებისა, აპიუს კლავდიუსი მაინც ფიქრობდა, რომ მისი ამხანაგი სენატის გადაწყვეტილებას დაელოდებოდა და საკუთარი პასუხისმგებლობითა და რისკით არ იმოქმედებდა. მაგრამ ფულვიუსმა უბრძანა თავის ტრიბუნებს და მოკავშირეთა რაზმების მეთაურებს სალაშქროდ გაემზადებინათ ორი ათასი ცხენოსანი, რამით იგი გაემზავრა ერთ-ერთ

¹⁴³ ტ ი ტ უ ს ლ ი ვ ი უ ს ი, დასახელებული ნაშრომი, გვ. 225.

¹⁴⁴ ი ქ ვ ე, გვ. 226.

ქალაქში, სადაც დატუსაღებული კამპანიელი სენატორები იყვნენ. ქალაქს რომაელებმა მიადწიეს გარიჟრაჟზე და პირდაპირ მოედანს მიაშურეს. ფულვიუსმა ტუსაღების მოყვანა ბრძანა. უკლებლივ ყველა გაროზგეს, მერე კი თავები დააყრევინეს.

იქიდან რომაელებმა მეორე ქალაქისკენ გაქუსლეს. გამოიყვანეს კამპანიელი ტყვეები და ბოძებზე გააკრეს. ამ დროს სენატის შიკრიკი გამოჩნდა და ფულვიუსს წერილი გადასცა. ფულვიუსიც, ცხადია, მიხვდა რაც ეწერა წერილში, გაუხსნელად შეინახა უსტარი უბეში, და ბრძანა განეგრძოთ სიკვდილით დასჯა:

მხოლოდ მას შემდეგ, რაც უკანასკნელ ტუსაღს თავი წაკეთეს, ამოიღო წერილი, წაიკითხა სენატის დადგენილება, მხრები აიჩიჩა და თქვა, წერილმა ძალზე დაიგვიანაო¹⁴⁵.

რომის სენატში კამათი გაიმართა იმის თაობაზე, დაენგრიათ და მიწასთან გაესწორებინათ ქალაქი, თუ ეკმარათ მისთვის უდიდესი მსხვერპლი. ბოლოს გონივრულმა აზრმა გაიმარჯვა და ქალაქი გადარჩა.

კაპუას დაცემა მნიშვნელოვანი პოლიტიკური მოვლენა იყო. ეს ნიშნავდა ჰანიბალის გენერალური გეგმის მარცხს. „ეს იყო რომის გადამწყვეტი კრიზისი... ეს ნიშნავდა, რომ რომის ჰეგემონია იტალიაზე ურყევი იყო“¹⁴⁶. კაპუას დაცემა დაძაბვა რომის მოკავშირეებს, რომ ჰანიბალის წარმატებები დროებითი იყო.

მდგომარეობა ესპანეთში

ესპანეთში გნეუს კორნელიუს სციპიონმა წარმატებებს მიადწია. მან შეაღწია მატერიკის სიღრმეში. მრავალი მოკავშირე გაიჩინა და დაამარცხა ჰანონი, მაგრამ ჰასდრუბალმა გადმოლახა მდინარე იბერი, უეცრად თავს დაესხა მის ქარს და გაიმარჯვა. ამის შემდეგ გნეუსი საზამთროდ ქ. ტარაკონაში გაჩერდა, ჰასდრუბალი კი გადავიდა იბერიის მარჯვენა მხარეში და ომისათვის ინტენსიური მზადება გააჩაღა. გნეუსმა სახმელეთო ბრძოლებზე ხელი აიღო. სამაგიეროდ საზღვაო ბრძოლებში წარმატებებს მიადწია. იბერიაში მას

¹⁴⁵ ტ ი ტ უ ს ლ ი ე ი უ ს ი, დასახელებული ნაშრომი, გვ. 227.

¹⁴⁶ ფ. მერინგი, დასახელებული ნაშრომი, გვ. 52.

დახმარებას უწევდნენ მასალიელები, „რომელნიც სხვა ხალხებთან შედარებით უფრო სანდო მოკავშირენი იყვნენ“¹⁴⁷.

იბერიის შესართავთან გამართულ ბრძოლაში გნეუსის ფლოტმა, რომელიც 25 ხომალდისაგან შედგებოდა, გამარჯვება მოიპოვა. კართაგენელებმა კვლავ შეაიარაღეს 70 ხომალდი, რომელსაც რომაელებმა დაუპირისპირეს 120 ხომალდისაგან შემდგარი ფლოტი და კართაგენელები იძულებულნი შეიქნენ ბრძოლისათვის თავი აერიდებინათ. სენატმა, მიუხედავად იმისა, რომ ატალიაში კვლავ სერიოზული მდგომარეობა იყო, შეაიარაღა 20 ხომალდი და გნეუსის ძმის პუბლიუს კორნელიუს სციპიონის მეთაურობით ესპანეთში გაგზავნა, რომაელები უალრესად დაინტერესებული იყვნენ, რომ ესპანეთიდან გაერეკათ კართაგენელები.


ტიტუს ლივიუსთან გადმოცემით, დიდმა სამხედრო საბჭომ ერთხმად გადაწყვიტა, რომ ბოლო მოეღო ესპანეთის ომისათვის. რომაელებმა ოცი ათასი კელტიბერი ჩარიცხეს სამსახურში. მოწინააღმდეგეს ჰყავდა სამი არმია: ორი მათგანი მაგონისა და ჰისგონის შვილის ჰასდრუბალის მეთაურობით ერთ ბანაკში იდგა, რომაელთაგან დაახლოებით ხუთი დღის სავალზე. მესამე არმიას სარდლობდა ჰასდრუბალი, ჰამილკარ ბარკას შვილი. სციპიონებმა განიზრახეს ჯერ ის დაემარცხებინათ.

ამრიგად, გადაწყდა საომარი მოქმედება გაეჩაღებინათ ერთბაშად მთელს ესპანეთში. პუბლიუს კორნელიუს სციპიონი დაიძრა მაგონისა და ჰისგონის შვილის, ჰასდრუბალის წინააღმდეგ, ხოლო გნეუს კორნელიუს სციპიონი ჰასდრუბალ ბარკას წინააღმდეგ.

ჰასდრუბალ ბარკას ბანაკი მდინარის ვაღმა იყო. მან შეიტყო, რომ რომაელი სარდლის მთელი ძალა და იმედი ემყარებოდა კელტიბერთა დამხმარე რაზმებს. კართაგენელმა სარდალმა შესანიშნავად იცოდა ბარბაროსი ტომების სუსტი ადგილი. მან კელტიბერთა ბელადებს დიდი თანხა შესთავაზა იმის საზღაურად, რომ შინ წაეყვანათ თავიანთი მებრძოლები. კელტიბერები ჰასდრუბალის წინააღმდეგამ ძლიერ მოხიბლა. მხარეები იოლად შეთანხმდნენ. კელტიბერები ერთბაშად აიყარნენ და რომაელებს ზურგი აქციეს. სციპიონი მიხვდა, რომ ვერც შეგონებითა და ვერც ძალით კელტიბე-

¹⁴⁷ პოლიბიოსი, დასახელებული ნაშრომი, ტ. I, გვ. 347.

რებს ვეღარ შეაჩერებდა. სხვა აღარათფერი დარჩენოდა და უკან დაიხია. იგი ყოველმხრივ ერადებოდა გაშლილ ადგილზე ბრძოლას. პასდრუბალმა გადალახა მდინარე ბეტისი და ფეხდაფეხ დაედევნა მტერს¹⁴⁸.



ლეგიონერი ლაშქრობისას

უკეთეს მდგომარეობაში არც პუბლიუს კორნელიუსი იყო. მას ახალი, უცნობი მტერი ემუქრებოდა, მასინისა. იგი თავისი ნუმიდიური ცხენოსანი ჯარით თავს ესხმოდა პუბლიუსს და დღედაღამ მოსვენებას არ აძლევდა მის ჯარს.

პუბლიუს კორნელიუს სციპიონი იძულებული გახდა მიეღო ბრძოლა. მან გადაწყვიტა კართაგენელთა მოკავშირე სევსეტანების ტომისათვის მოელო ბოლო.

ბრძოლაში რომაელებმა გატეხეს სევსეტანების წინააღმდეგობა და ის-ის იყო გამარჯვება უნდა ეზეიმათ, რომ მოულოდნელად მათ

¹⁴⁸ ტ ი ტ უ ს ლ ი ე ი უ ს ი, დასახელებული ნაშრომი, გვ. 202.

თავს დაეხსა მასინისა. რომაელები არ შემდრკალან, მაგრამ ახლა კართაგენელთა ქვეითი ჯარი გამოჩნდა, რომელმაც ზურგიდან დარტყა მტერს. სციპიონი ამხნევებდა მებრძოლებს და თვითონ გადაეშვებოდა ხოლმე ბრძოლაში იქ, სადაც ყველაზე უფრო მეტად უჭირდათ. ერთ-ერთ ასეთ შეტაკებაში მას მარჯვენა მხარში აძგერეს შუბი. როცა კართაგენელებმა დაინახეს, რომ სციპიონი ცხენიდან გადმოვარდა, ყიჟინით აუწყეს ყველას რომაელი სარდლის სიკვდილი¹⁴⁹.

რომაელთა ჯარი საშინელმა პანიკამ მოიცვა, პირი იბრუნა და სცადა გაქცევით ეშველა თავისთვის, მაგრამ ეს თითქმის შეუძლებელი იყო. მას დაედევნენ კართაგენელთა ცხენოსნები და ქვეითი ჯარი. დევნისას მტერმა თითქმის უფრო მეტი რომაელი გაწყვიტა, ვიდრე თვით ბრძოლის დროს. საერთოდ, ალბათ, არც ერთი კაცი არ გადარჩებოდა, რომ არ დაღამებულიყო, წერს ტიტე ლივიუსი¹⁵⁰.

გნეუს კორნელიუს სციპიონმა შენიშნა, რომ მტრის ბნანაქში ჯარმა იმატა. იგი მიხვდა, რომ პუბლიუს კორნელიუს სციპიონი დამარცხეს მტრის შეერთებულმა ძალებმა და ახლა ჯერი მასზე მიმდგარიყო. მტრის ჯარი რამდენჯერმე სჯარბობდა რომაელთა ისედაც დემორალიზებულ ჯარს.

გაჩაღდა უთანასწორო ბრძოლა. რომაელები დამარცხდნენ. გნეუს კორნელიუს სციპიონი რამდენიმე თანმხლებლითურთ წააწყდა სადარაჯო კოშკს და მასში ჩაიკეტა. კართაგენელებმა კოშკს თივა შემოუწყვეს და ცეცხლი წაუკიდეს, როცა კარი დაიწვა, კოშკში შეცვივდნენ და ყველანი ამოჟლიტეს.

ასე დაიღუპა გნეუს კორნელიუს სციპიონი, პუბლიუსის სიკვდილის შემდეგ ოცდამეცხრე დღეს. ძმების დაღუპვას გლოვობდა არა მარტო რომი, წერს ლივიუსი, არამედ მთელი ესპანეთი. ამასაც ვიტყვით: რომში გლოვობდნენ დაკარგულ არმიასაც, დაკარგულ პროვინციასაც, ესპანეთი კი გლოვობდა მხოლოდ დაღუპულ სციპიონებს. უფრო გნეუსს, ვიდრე პუბლიუსს, იმიტომ, რომ მან უფრო დიდხანს დაჰყო ესპანეთის მიწაზე, პირველმა მოიხვეჭა ესპანელთა სიყვარული და პირველმა დაანახვა მათ რომაული სამართლიანობის, უბრალოებასა და თავდაჭერის ნიმუში¹⁵¹.

¹⁴⁹ ტ ი ტ უ ს ლ ი ვ ი უ ს ი, [დასახელებული] ნაშრომი, გვ. 201—202.

¹⁵⁰ ი ქ ვ ე, გვ. 202.

¹⁵¹ ი ქ ვ ე, გვ. 205.

სციპიონების სიკვდილის შემდეგი სენატმა ესპანეთში გაგზავნა ლუციუს მარციუსი და ტიტუს ფონტეუსი, ხოლო მას შემდეგ რაც რომაელებმა კაპუა აიღეს, შესაძლებლად ჩათვალეს ესპანეთში 12 ათასი ქვეითისა და 1100 მხედრის გაგზავნა კლავდიუს ნერონის მეთაურობით.

210 წელს სენატმა ესპანეთში გაგზავნა პუბლიუს კორნელიუს სციპიონი (უმცროსი). მან თავი გამოიჩინა, როგორც მამაცმა და ნიჭიერმა სარდალმა. პოლიბიოსის ცნობით, მას ახასიათებდა დიდსულოვნება, სიფრთხილე, შორსმჭვრეტელობა, დაკვირვებულობა, თანამიმდევრულობა¹⁵². ამ თვისებების გამო მას დიდი პოპულარობა მოუპოვებია ხალხსა და არმიასში.

კორნელიუს სციპიონი დაიბადა 236—235 წლებში რომაელ დიდებულის ოჯახში. ეს გვარი III—II სს-ში ერთ-ერთ გამოჩენილ როლს ასრულებდა რომის პოლიტიკურ ცხოვრებაში. სციპიონთა გვარი დაკავშირებული იყო ემილიუსების გვართან. კორნელია, ძმები გრაქხუსების დედა, სციპიონ აფრიკელის ქალიშვილი იყო, ხოლო გრაქხუსების და სემპრონია გათხოვილი იყო სციპიონ ემილიანუსზე.

ი. შ. კორაბლიოვი იმოწმებს აპიანეს, რომლის სიტყვებითაც კონსულობის ახალგაზრდა პრეტენდენტი ამბობდა, რომ შურს იძიებდა მამის, ბიძისა და სამშობლოსათვის. უფრო მეტიც, იგი ამბობდა, რომ არა მარტო ესპანეთს, კართაგენსაც დაიპყრობდა. სციპიონმა აქტიური საქმიანობა გააჩაღა რის შედეგადაც იგი აირჩიეს რომაელთა ჯარების მეთაურად ესპანეთში.

გადმოცემით, როგორც ზემოთაც აღინიშნა, 17 წლის კორნელიუს სციპიონ უმცროსი ტიციანუსთან იბრძოდა და იქ სიკვდილს გადაარჩინა მამამისი. კანასთან მონაწილეობას იღებდა როგორც სამხედრო ტრიბუნი. იგი მათ შორის იყო, ვინც აპიუს კლავდიუს პულხერთან ერთად სათავეში ჩაუდგა შეძრწუნებულ და სასოწარკვეთილ რომაელ ჯარისკაცებს და წინააღმდეგა ლუციუს ცეცილიუს მეტელუსს, რომ ბედის ანაბრად მიეტოვებინათ რომი, გაქცეულიყვნენ ნებისმიერი მიმართულებით. ასევე გადმოგვცემენ, რომ სციპიონ უმცროსი საოცრად ღეთისმოშიში კაცი იყო.

¹⁵² პოლიბიოსი, დასახელებული ნაშრომი, ტ. II, გვ. 235—236.

ესპანეთში, ა. მიშულინის გამოანგარიშებით, პუბლიუს კორნელიუს სციპიონის ხელქვეით აღმოჩნდა 35 ათასი მებრძოლი¹⁵³.

რომაელი სარდალი მოქმედებდა როგორც იარაღით, ისე დიპლომატიური გზით. მან აქტიური საქმიანობა გააჩაღა. ამ დროისათვის, ჩანს, კართაგენელებს საკმაოდ მოუბეზრებიათ თავი იბერიელი ტომებისათვის, რომელნიც ცდილობდნენ რამენაირად თავიდან მოეშორებინათ კართაგენელთა ბატონობა. ამ ტომების რომელთა შხარეზე გადასვლაში განსაკუთრებული როლი შეასრულა იბერმა დიდებულმა აბილიგმა. მან მოახერხა იმ იბერი მძევლების განთავისუფლება, ჰანიბალმა რომ წაიყვანა იტალიაზე გალაშქრების წინ.

ტიტუს ლივიუსი მოგვითხრობს ასეთ ეპიზოდს: ჯარისკაცებმა სციპიონს მიუყვანეს ტყვე ქალი, რომელიც თურმე ახალგაზრდა იბერი დიდებულის ალუციუსის სატრფო იყო. სარდალმა პატივისცემით მიიღო ქალი და შემდეგ სასიძოს ჩააბარა. ამით მადლიერი იბერი რამდენიმე დღის შემდეგ დაბრუნდა და თან სციპიონს 1500 მხედარი მოუყვანა.

„ვიყოთ გულახდილნი, — უთხრა სციპიონმა კელტიბერ ალუციუსს, — იმიტომ, რომ ერთი ხნისანი ვართ და ერთმანეთს არ უნდა მოვერიდოთ. ჩემმა მებრძოლებმა ტყვედ იგდეს შენი საცოლე და მომგვარეს. მითხრეს, რომ ქალიშვილი შენ გიყვარს და ამაში არაფერია საოცარი. ის ისეთი მშვენიერია, რომ არც მე ვიტყვოდი მსგავს საცოლეზე უარს, ჩემს თავს ჩვეულებრივი ჰაბუკისათვის შესაფერისი საქციელის უფლებას რომ ვაძლევდე. მაგრამ მე მთლიანად ჩემს თავს კი არ ვეკუთვნი, არამედ სახელმწიფოს. ამიტომ მინდა დაგეხმარო შენს სიყვარულში — ამის უფლება მე მაქვს. ჩემთან შენს საცოლეს ისევე არავინ მიჰკარებია, როგორც საკუთარ მშობლებთან. შიღვე ჩემგან ის ისეთ ძღვნად, ორივე ჩვენგანისათვის შესაფერისი რომ იქნება. მხოლოდ ერთ რამეს გთხოვ: იყავი რომაელი ხალხის მეგობარი. შენ თუ მიგაჩნია, რომ მე წესიერი კაცი ვარ, იცოდე, რომ რომაელ ხალხში მრავალი ჩემისთანაა და ქვეყნად არ არის სხვა ხალხი, რომელთანაც მეგობრობა შენთვის ესოდენ სასიკეთო იყოს, მტრობა კი საზარალო“¹⁵⁴.

¹⁵³ А. В. Мишулия. Античная Испания. 1952, с. 304.

¹⁵⁴ ტ ი ტ უ ს ლ ი ვ ი უ ს ი, დასახელებული ნაშრომი, გვ. 256.

ი. შ. კორაბლიოვის აზრით, ესპანეთის ამბებს ჰანთბალი დიდ მნიშვნელობას არ ანიჭებდა და იქ ახალი რომაელი სარდლის გამოჩენას მასზე არაეითარი შთაბეჭდილება არ მოუხდენია. იგი არა მარტო თვით დარჩა იტალიაში, არამედ თავისი ძმა ჰასდრუბალიც გაიწვია¹⁵⁵.

„სციპიონმა გადალახა მდინარე იბერი,—წერს ლივიუსი,—ოცდახუთი ათასი ქვეითი ჯარისკაცითა და ორიათას ხუთასი ცხენონით... მან გადაწყვიტა დაეწყო ახალი კართაგენის ალყით.

ამ მდიდარ ქალაქში იყო კართაგენელთა იარაღის საწყობიც, სახელმწიფო ხაზინაც, სადაც ფული ინახებოდა და საპატრიმროც, სადაც მთელი ესპანეთიდან მოყვანილი მძევლები ჰყავდათ დამწყვდეული. ქალაქს ჰქონდა ვრცელი ნავსადგური ნებისმიერი ფლოტისათვის და ძალიან ახლო იყო აფრიკასთან. იბერიის გადალახვიდან მეშვიდე დღეს რომაელები ახალ კართაგენს მიუახლოვდნენ ხმელეთიდან და ზღვიდან ერთდროულად: აღრევე ასე შეუთანხმდა სციპიონი ფლოტის უფროსს გაიუს ლელიუსს“¹⁵⁶.

ახალ კართაგენს იცავდა კართაგენელთა გარნიზონი მაგონის მეთაურობით. იგი დარწმუნდა, რომ მხოლოდ თავისი გარნიზონით სათანადო წინააღმდეგობას ვერ გაუწევდა რიცხობრივად რამდენჯერმე ჰარბ მოწინააღმდეგეს. ამიტომ შეაიარაღა ორი ათასი მოქალაქე და განალაგა ქალაქის გალავანთან, რომელიც ზედ რომაელებისკენ იყო მიმართული. ხუთასი მეზრძოლი ციხესიმაგრეში ჩააყენა, ხუთასი კი — ბორცვის კორტოხზე, ქალაქის სამხრეთ ნაწილში. მათ უბრძანა იქ მიშველებოდნენ, სადაც ქალაქის დამცველთ ყველაზე უფრო გაუჭირდებოდათ.

სციპიონმა ხმელეთიდან და ზღვიდან ერთდროულად დაარტყა მტერს. ქალაქის დამცველნი თავგანწირვით იბრძოდნენ, მაგრამ რომაელთა შტურმს ვერ გაუძლეს. ახალი კართაგენი დაეცა, მაგონი ციხეში ჩაიკეტა, მაგრამ მალე შეწყვიტა უიმედო წინააღმდეგობა. რომაელებმა უდიდესი ნადავლი იგდეს ხელთ. ლივიუსის გადმოცემით, ათი ათასი თავისუფალი წარმოშობის მეზრძოლი ჩაბარდა ტყვედ. ახალი კართაგენის მკვიდრნი სციპიონმა გაათავისუფლა, დაუბრუნა მათ სახლები და ძარცვას გადაარჩინილი ქონება. დაახლოე-

¹⁵⁵ ი. შ. კორაბლიოვი, დასახელებული ნაშრომი, გვ. 247.

¹⁵⁶ ტ. ბ. უ. ს. ლივიუსი, დასახელებული ნაშრომი, გვ. 248.

ბით ორი ათასი ხელოსანი რომელი ხალხის მონად აქციეს. მათ გათავისუფლებას შეპირდნენ იმ პირობით, თუკი კეთილსინდისიერად ემსახურებოდნენ რომაელებს. დანარჩენი მცხოვრებნი, მოხუცებისა და ხეიბრების გარდა, რომელთაც არ ჰქონდათ მოქალაქეთა უფლება, ასევე ჯანმავარი ჰაბუკი მონები ხომალდებს მიამაგრეს და შენიჩბეობა დააკისრეს, რომელთა ფლოტი შეავსო მრავალმა ხომალდმა. რომლებიც ნავსადგურში დაისაყუთრეს.

სამხედრო მანქანებიდან და სურსათ-სანოვაგის მარაგიდან რომაელებმა ხელთ იგდეს ასოცი დიდი კატაპულტა, ორას ოთხმოცდაერთი მცირე, ოცდასამი დიდი და ორმოცდათორმეტი — მცირე ბალისტა, ურიცხვი დიდი და მცირე სკორპიონი, მახვილი, ფარი, ჯავშანი, ხელშუბი. უამრავი ოქრო-ვერცხლი. ორას სამოცდათექვსმეტი ოქროს ფიალა, ვერცხლის ზოდები და მონეტები — თითქმის ექვსი ათასი კილოგრამი, გარდა ამისა უამრავი ვერცხლის ჰურბეული. ოთხი ათასი მოდიუსი¹⁵⁷ ხორბალი, სამოცდაათი ათასი მოდიუსი ქერი. ნავსადგურში იდგა ხორბლით, იარაღით, სპილენძით, რკინით, ტილოთი, ბაგირებით დატვირთული სამოცდასამი ხომალდი¹⁵⁸.

ა. ვ. მიშულინი იძლევა სციპიონის (უფროსის) და მისი ძმის გნეუსის წარუმატებლობის მიზეზების ახსნას, რომელიც კარგად გაითვალისწინა პუბლიუს კორნელიუს სციპიონმა (უმცროსმა). ამ მიზეზებად ა. ვ. მიშულინი ასახელებს: 1. დიდ მანძილს მდინარე ებროსა და ბეტისს შორის. 2. ესპანეთის აღმოსავლეთ წყლებში რომაული ფლოტის სისუსტეს. ორივე ეს პირობა მშვენივრად გაითვალისწინა სციპიონ უმცროსმა, შან აიღო ახალი კართაგენი, რითაც მყარი დასაყრდენი გაიჩინა ებროსა და ბეტისს შორის. ასევე მან უზრუნველყო რომაული ფლოტის ბატონობა ესპანეთის აღმოსავლეთ წყლებში¹⁵⁹.

ახალი კართაგენის აღების ოპერაცია ერთ-ერთი შესანიშნავი ფურცელია სამხედრო ხელოვნების ისტორიაში. სციპიონმა აქედან ენერგიული მოქმედება გააჩაღა. კართაგენელებმა უდიდესი შეცდომა ჩაიდინეს. მათი არმიები ერთმანეთისაგან დიდი მანძილით

¹⁵⁷ მოდიუსი — დაახლოებით 9 ლიტრი.

¹⁵⁸ ტიტუს ლივიუსი, დასახელებული ნაშრომი, გვ. 253.

¹⁵⁹ А. В. Мишулин. О возникновении римского провинциального управления в Испании. ВДИ, № 1, 1949, г., с. 41.

იყვნენ დაშორებული და თავიანთი ძირითადი სტრატეგიული პუნქტი ათასკაციანი გარნიზონის ამარა დატოვეს, რომლის დამარცხებაც სციპიონმა ადვილად შეძლო. ამიერიდან ახალ კართაგენს იგივე როლი უნდა შეესრულებინა რომაელთა მხარეზე, როგორსაც იგი აქამდე კართაგენელთათვის ასრულებდა. ეს ასეც მოხდა.

209 წ. პუბლიუს კორნელიუს სციპიონმა გამარჯვება მოიპოვა ჰასდრუბალზე ბეკულთან ბრძოლაში. ასეთივე გამარჯვება მოიპოვა სილანუსმა მაგონისა და ჰანონის გაერთიანებულ არმიასზე და შემდეგში სციპიონმა ილიპოსთან ბრძოლაში დაამარცხა ჰასდრუბალისა და მასინისას გაერთიანებული ლაშქარი. ილიპოსთან ბრძოლას ა. ვ. მიშულინი უწოდებს „კართაგენ-რომის ომში მობრუნების პუნქტს“¹⁶⁰. დენისონი კი შას თვლის სამხედრო ისტორიაში რომის ტაქტიკური ხელოვნების ნიმუშად¹⁶¹.

206 წლისათვის მთელი ესპანეთი რომაელთა ხელში გადავიდა.

ბრძოლა მებავრასთან

კართაგენელები ხელადვნენ, რომ იტალიაში ჰანიბალს გაუჭირდა. ამიტომ ჰასდრუბალმა გადაწყვიტა ძმას დახმარებოდა. იგი გაუხსნტა სციპიონს ესპანეთიდან, გადალახა ალპები და მისწერა ძმას, უამბრიაში შეგვხვდებით.

ტიტუს ლივიუსი ზუსტად გადმოგვცემს ჰასდრუბალის მარშრუტს. იგი აპენინის მთებს სამხრეთით დაუყვა და ძმასთან წერილი გაატანა ექვს მხედარს — ორ ნუმიდელსა და ოთხ ვალს. მეტაბონტთან ჰასდრუბალის შიკრიკებს გზა აებნათ და რომაელთა პატრულს გადაეყარნენ, რომლებმაც ისინი მაშინვე კვინტუს კლავდიუსს მიუყვანეს. კვინტუს კლავდიუსმა, ისე რომ ბარათი არც კი გაუხსნია, ბრძანა ისინი აპულიაში წაეყვანათ და კონსულ გაიუს კლავდიუს ნერონისათვის წარედგინათ.

გაიუს კლავდიუს ნერონმა შეიტყო თუ არა წერილის შინაარსი, გადაწყვიტა, რომ რომაელებს ომის გეგმა მთლიანად უნდა

¹⁶⁰ A. B. Мишулин. Античная Испания, с. 312.

¹⁶¹ დენისონი, დასახელებული ნაშრომი, გვ. 60.

შეეცვალათ. ამ გეგმით თითოეულ კონსულს სენატისაგან ევალეზობდა თავის პროვინციაში თავისივე ძალებით ებრძოლა მტერთან. ახალი გეგმით გაიუს კლავდიუსს ნერონი უნდა შეერთებოდა კონსულ მარკუს ლივიუსს და გაერთიანებული არმიით გაენადგურებინათ ჰასდრუბალი მანამ, ვიდრე ის ძმას შეუერთდებოდა.

როცა გაიუს კლავდიუსის გადაწყვეტილების შესახებ გაიგეს რომში, იქ ისეთმავე შიშმა დაისადგურა, როგორც პანიბალის რომთან გამოჩენის დროს. რომაელები შეაშფოთა იმან, რომ კლავდიუსმა ბანაკი უეცრად მიატოვა, თავის ლეგატს კვინტუს კატიუსს გადასცა ბანაკის უფროსობა და თვით კი ლივიუსთან შესახვედრად გაემართა. ეს მამინ, როცა პანიბალი იქვე იყო, რომის კარიბჭესთან. რომაელები შეაძრწუნა იმ ამბავმა, წერს ლივიუსი, რომ ახლა არსებითად ორი პუნიკური ომი იყო და ორი პანიბალი იბრძოდა მათ წინააღმდეგ. დიახაც, ჰასდრუბალი ხომ იმავე მამის, პამილკარის შვილი იყო, ისეთივე გულადი, დაუცხრომელი და ქედუხრელი, ესპანეთის ომში მრავალი წლის ბრძოლით გამობრძმედილი, სციპიონების ორგზის დამარცხებით სახელგანთქმული და ზოგი რამით ის უფრო მალა იდგა პანიბალზე; რა სწრაფად გადმოლახა მან პირენეები და ალპები, რა იოლად ააჯანყა და იარაღი აასხმევიანა ვალებს — და ეს მოხდა იმ ადგილებში, სადაც პანიბალმა თავისი არმიის ნახევარზე მეტი დაკარგა ყველაზე უფრო საზარელი სიკვდილით — შიმშილისა და სიცივისაგან¹⁶².

კონსულების შეერთების ამბავმა თავზარი დასცა ჰასდრუბალს. „უთუოდ ორივე კონსული აქ არის, — ფიქრობდა ჰასდრუბალი, — მაგრამ როგორ დაუხსნლტა კლავდიუსი პანიბალს?“ ათასგვარი აზრები მოსდიოდა მას თავში, მაგრამ მხოლოდ საგანთა კეშმარიტი მდგომარეობა ვერ წარმოედგინა — რომ პანიბალი პატარა ბიჭვიით გააცურეს. „უეშველად, — ფიქრობდა ჰასდრუბალი, — ჩემი ძმა სუსტიკად დამარცხდა, ვერ შეძლო და ვერ გაბედა მტრის გამოდევნება. იგი თავის თავს ეკითხებოდა, ომი მთლად ხომ არ არის წაგებული, ხომ არ დავიგვიანე ძმის დასახმარებლადო“¹⁶³.

ჰასდრუბალმა გადაწყვიტა, რომ როგორმე გაცლოდა რომაელ კონსულთა შეერთებულ არმიებს, აპყარა ბანაკი და გაემართა მდი-

¹⁶² ტ ი ტ უ ს ლ ი ვ ი უ ს ი, დასახელებული ნაშრომი, გვ. 297.

¹⁶³ ი ქ ე ე. გვ. 301.

წარე მეტაკრაზე გადასასვლელად. ღამის სიბნელეში ადგილობრივ-
მა მეგზურებმა კართაგენელებს უმუხთლეს და გაეპარნენ. ლაშქარი
დაბნეული დაბორიალებდა. ბოლოს ჰასდრუბალმა ბრძანება გასცა
მდინარის ზედაწელს აპყოლოდნენ, მაგრამ უკუნ ღამეში დაკ-
ლაკნილმა მდინარემ კიდევ უფრო დააბნია კართაგენელები. ჰას-
დრუბალმა ბრძანა განთიადს დალოდებოდნენ. პირველად გაიუს
კლავდიუს ნერონის არმია მიადგა კართაგენელებს, მას მოჰყვებოდა
პრეტორ ლუციუს პორციუსის მსუბუქი ქვეითი ჯარი. აქვე გამო-
ჩნდნენ მარკუს ლივიუსის ლეგიონები. ჰასდრუბალს სხვა გზა აღარ
დარჩენოდა და ბრძოლაში ჩაება. მან ცენტრში ათი სპილო დააყენა,
მათ უკან — ლიგურები. მარცხენა ფლანგზე კლავდიუსის წინააღმ-
დეგ განალაგა გალები, მარჯვენაზე — ესპანელები. ესპანელები იყვ-
ნენ მისი ვეტერანები და არმიის მთავარ დასაყრდენ ძალას შეად-
გენდნენ; მარჯვენა ფლანგს თვითონ შეთაურობდა. შეტაკება გააფთ-
რებულ ჩეხვად გადაიქცა: აქ თავი მოიყარეს რომაელთა ქვეითმა
და ცხენოსანმა ჯარმა, აქვე იბრძოდნენ ესპანელები, ლიგურიელები.
აქეთკენ დაიძრნენ სპილოები, რომელთა შემოტევაშეშა არივ-დარია
მტრის მეწინავე რიგები და რომაელთა დროშებიც შედრკნენ. სა-
შინელ ზედახოცვაში გაძნელდა სპილოების დამორჩილება, ისინი
დაფეთებული დაქროდნენ და ვეღარ გაეგოთ, სად იყო მტერი და
სად მოყვარე.

ამ დროს ბრძოლაში ჩაება კლავდიუსი, რომელმაც ჰასდრუბალს
დასცხო ფლანგიდან და ზურგში მოექცა. გაჩაღდა სისხლისმღვრე-
ლი ბრძოლა. გალებმა თითქმის შეწყვიტეს წინააღმდეგობა. ისინი
დაღლილ-დაქანცულნი იყვნენ უძილობისა და უმძიმესი ლაშ-
ქრობისაგან, თან სიცხე და წყურვილი ტანჯავდათ.

გახელებული სპილოები საკუთარმა მხედრებმა დახოცეს;
ერთ-ერთი ასეთი სპილო ყველაზე პირველად ჰასდრუბალმა გამოა-
სალმა სიცოცხლეს. ლივიუსი აღტაცებულია ჰასდრუბალის გამირო-
ბით. ის აკავებდა ჯარისკაცებს მწყობრში გამამხნევებელი სიტყვე-
ბით. ხან საკუთარი მაგალითით, აღვივებდა მიმქრალ სიმამაცეს, რო-
ცა ხედავდა, რომ ჯარისკაცებს დაღლილობისაგან მახვილი ხელიდან
უვარდებოდათ, უკან აბრუნებდა უკუქცეულთ და მრავალ ადგილას
კვლავ აღადგინა და გააერთიანა უკვე გაწყვეტილი მებრძოლთა რი-
გები, არაერთხელ დაიბრუნა დაკარგული პოზიციები. დაბოლოს,

როცა ბრძოლის ბედი საბოლოოდ გადაწყდა, არ ისურვა აეტანა არმიის მარცხი, რომელიც მის ღიღებასა და სახელს ანდეს, — ცხენი რომაელთა კოჰორტების შუაგულში შეაგდო და ბრძოლაში დაეცა დიდი ჰამილკარის ღირსეული, მემკვიდრე და დიდი ჰანიბალის ძმა.

არასოდეს მთელი ომის განმავლობაში, წერს ტიტუს ლივიუსი, ერთ ბრძოლას მტრისთვის ასეთი ზარალი არ მოუტანია — ეს იყო ჰემპარიტი საზღაური კანასათვის¹⁶⁴.

ეს ბრძოლა 207 წელს მოხდა. ჰასდრუბალის გმირობით აღტაცებული პოლიბიოსი წერს, რომ მან გასაოცარი სიმამაცე გამოიჩინა და თავი ისე ექირა, როგორც ბარკას ღირსეულ შვილს შეეფერებოდა¹⁶⁵. მისი თავი რომაელმა მხედარმა ჰანიბალის ბანაკში გადაისროლა. ძმის თავის დანახვაზე ჰანიბალს უთქვამს, ახლა კი ჩემთვის ცხადია, რაც ელის კართაგენსო.

ამ ბრძოლაში, პოლიბიოსის ცნობით, დაიღუპა 10 ათასი კართაგენელი. რომაელებმა დაახლოებით 2 ათასი მებრძოლი დაკარგეს¹⁶⁶.

მეტავრასთან კართაგენელების დამარცხებას არსებითი მნიშვნელობა არა ჰქონია, რადგან ჰასდრუბალი კიდევაც რომ შეერთებოდა ჰანიბალს, ეს მაინც ვერ შეატრიალებდა კართაგენელთა წაგებულ საქმეს, თუმცა, შესაძლებელია დროებით შეემსუბუქებინა ჰანიბალის მდგომარეობა.

203 წ. მაგონი გაეშურა ძმის დასახმარებლად და გენუასთან 14 ათასიანი არმია გადასხა. იგი იმედოვნებდა, რომ გალები მიემხრობოდნენ, მაგრამ ვარაუდი არ გაუმართლდა. გალები არ მიემხრნენ, ძმას ვერ შეუერთდა და დამარცხდა. მძიმედ დაჭრილი მაგონი რომაელებს დაუსხლტა და კართაგენისაკენ გასწია, მაგრამ კრლოზისაგან გეშზე გარდაიცვალა.

სციპიონმა გადაწყვიტა კართაგენელებისათვის სასიკვდილო დარტყმა თვით აფრიკის კონტინენტზე მიეყენებინა. მაგრამ აფრიკაში ექსპედიციის წინააღმდეგ გამოსულა კვინტუს ფაბიუს მაქსი-

¹⁶⁴ ტ ი ტ უ ს ლ ი ვ ი უ ს ი, დასახელებული ნაშრომი, გვ. 303—304.

¹⁶⁵ პ ო ლ ი ბ ი ო ს ი, დასახელებული ნაშრომი, ტ. II, გვ. 305.

¹⁶⁶ ი კ ვ ე.

მუსი. ტიტუს ლივიუსი გადმოგვცემს სენატში წარმოთქმულ მის სიტყვას:

„ვიცი, ბატონო სენატორებო, რომ ბევრს პროვინცია აფრიკის საკითხი, და ის, თუ ვის შეხვდება იგი, გადაჭრილად მიაჩნია. მაგრამ რამდენადაც ვიცი, არც ხალხს ჭერ არ დაუდგენია, რომ აფრიკა წლეულს იყოს ომის თეატრი...“

ღიახ, მე წინააღმდეგი ვარ აფრიკაში ლაშქრობისა და ამას ამკარად ვაცხადებ, მიუხედავად იმ საყვედურებისა, რასაც აქ უთუოდ მოვისმენ. ჭერ ერთი, გაიხსენებენ ჩემს მუდმივ აუჩქარებლობას და რა თქმა უნდა, ახალგაზრდები შემთხვევას არ გაუშვებენ, რომ მომნათლონ მშობარად და ზოზინად, — მეორეც, ბრალს დაბდებენ შურიანობაში დღითი-დღე მზარდი ჩვენი შესანიშნავი კონსულუსადმი.

მაგრამ თუ არ გაითვალისწინებთ ჩემს ბუნებას, და იმ დიდ პატივს, რითაც მე უხვად დამაჯილდოვეს, გადახედეთ ჩემს წლებს. ნუთუ მე, მოხუცი კაცი, ხუთგზის კონსულობის შემდეგ, ვეჭვიშები ჩემს შვილზე უმცროს ჰაბუტუს?...“

მე ყოველთვის სახელმწიფოს სიკეთეს საკუთარ დიდებაზე მაღლა ვაყენებდი და უყოყმანოდ დავაყენებ შენს დიდებაზე მაღლა, პუბლიუს კორნელიუსს... იტალიიდან ჰანიბალის განდევნა, რომელიც მოსვენებას არ გვაძლევს თოთხშეტი წლის განმავლობაში, — განა ეს უდიდესი გამარჯვება არ იქნება?“¹⁶⁷...

კვინტუს ფაბიუს მაქსიმუსს ექვეყვეშ დაუყენებია სციპიონის გეგმა, რაც იმას გულისხმობდა, რომ რომაელთა არმიის აფრიკაში გადასხმას თან აუცილებლად ჰანიბალის იტალიიდან წასვლაც მოჰყვებოდა.

მაგრამ სციპიონს სენატისათვის დაუსაბუთებია, რომ კართაგენელთა წინააღმდეგ ბრძოლის მისი გეგმა სრულიად რეალური იყო; სციპიონმა ნათელყო, რომ კართაგენელების ბატონობით შეწუხებული მეზობლები სიამოვნებით დასთანხმდებოდნენ საძულველი დამპყრობლების წინააღმდეგ რომაელებთან კავშირზე, საკუთარი ძალები კი კართაგენელებს ძალიან მცირე ჰყავდათ. „ეყოფა აფრიკას მშვიდობითა და სიწყნარით ტკობა. ახლა, დაე, გმინავდეს სა“

¹⁶⁷ ტ ი ტ უ ს ლ ი ვ ი უ ს ი, დასახელებული ნაშრომი, გვ. 340—341.

სოწარკვეთისა, ძრწოლისა და ტკივილებისაგან“, — დაამთავრა თავისი გამოსვლა მან¹⁶⁸.

სციპიონმა 204 წელს 30-ათასიანი არმია გადასხა უტიკასთან, კართაგენის ოდნავ ჩრდილოეთით. იგი ფიქრობდა გამოეყენებინა სიფაქსი, რომელიც კართაგენელებთან მტრულ დამოკიდებულებაში იყო. მაგრამ მისი აფრიკაში ჩამოსვლის მომენტისათვის ეს მტრობა მოყვრობით შეიცვალა.

ტიტუს ლივიუსი გადმოგვცემს, რომ პასდრუბალ ჰისგონის შეიღმა სიფაქსს მიათხოვა თავისი ქალიშვილი სოფონიბე. ამას მოჰყვა სახელმწიფოებრივი კავშირი, რომლითაც კართაგენელები და სიფაქსი ვალდებულნი იყვნენ ჰყლოდათ საერთო მეგობრები და მტრები¹⁶⁹.

მაგრამ პასდრუბალისა და სიფაქსის გაერთიანებული ლაშქარი ორგზის დაამარცხა რომაელთა და მასინისას გაერთიანებულმა ჯარმა. ბრძოლაში სიფაქსი და მისი მშვენიერი მეუღლე ტყვედ ჩავარდნენ. ტიტუს ლივიუსი გადმოგვცემს სოფონიბეს სიტყვებს, რომლითაც მას მიუმართავს მასინისასთვის.

— მე შენს სრულსა და განუყოფელს განკარგულებაში ვარ, მაგრამ, თუკი ტყვეს უფლება აქვს ითხოვოს შეწყალება, გაფიცებ შენს მეფურ ღირსებას, რომელიც ჯერ კიდევ ცოტა ხნის წინათ მეც გამაჩნდა, გაფიცებ ნუმიდიელის სახელს, შენ რომ ატარებ სიფაქსთან ერთად, ნუ ჩამაგდებ რომაელების ხელში. როგორც უნდა განაგო ჩემი ბედი, მე მზად ვარ ავიტანო ყოველივე, იმიტომ, რომ ეს ბრძანება იქნება თანამემამულისა, რომელიც ჩემი მშობლიური აფრიკის შვილია. და თუ შენ არ ძალგბის დაიცვა სოფონიბე რომაელთა ძალადობისა და ქედმაღლობისაგან, მაშინ სიცოცხლე მოუსპე მას¹⁷⁰ მასინისა მოხიბლა სოფონიბემ. „ტყვე ქალმა დაიმორჩილა გამარჯვებული“. ნუმიდიელი ქალს შეჰპირდა, რომ შეუხრულებდა თხოვნას. იმავე დღეს მასინისა დაქორწინდა სოფონიბეზე, რათა ლელიუსისა და სციპიონისათვის პირდაპირ ეგრძობინებინა, რომ სოფონიბე მისი მეუღლე იყო და არა ტყვე. მასინისას ამ საქციელმ განარისხა ლელიუსი, მაგრამ შემდეგ გადაწყვიტა ყო-

168 ტ ი ტ უ ს ლ ი ვ ი უ ს ი, დასახელებული ნაშრომი, გვ. 342.

169 ი ქ ვ ე. გვ. 354.

170 ი ქ ვ ე. გვ. 365.

ველივე მოეხსენებინა სციპიონისათვის და მას გადაეწყვიტა მასინისა და სოფონიბეს ბედი.

ტიტუს ლივიუსი გადმოგვცემს სიფაქსის სიტყვებს, რომელიც ტყვედქმნილს უთქვამს სციპიონისათვის.

„მე ვოვიქეცი როგორც უბადრუკი უგუნური, მაგრამ უგუნურება დამეუფლა არა მაშინ, როცა იარაღი აღმართე რომის წინააღმდეგ, არამედ გაცილებით ადრე: უგუნურება ჩემს ჭერქვეშ შემოვიდა კართაგენელ ქალთან ერთად, რომელიც ცოლად შევიერთე. საქორწინო ჩირაღდნებს მოჰყვა ის ალი, სიფაქსს რომ გონება და ძალა დაუხშო. ეს ქალი შემომეწნა, დამაბრმავა და იმდენი ეცადა, სანამ მახვილი არ აღმამართვინა ჩემი მეგობრისა და კეთილი მასპინძლის წინააღმდეგ. ახლა ჩემთვის ყველაფერი დაკარგულია, მხოლოდ ერთი რამ მრჩება ნუგეშად — რომ იგივე ჭირმა, იგივე ცოფმა შეაღწია იმ კაცის გულში, რომელიც ამ ქვეყანაზედ ყველაზე მეტად მძულს. მასინისა სიფაქსზე არც უფრო ჰკვიანია და არც უფრო მტკიცე, ხოლო ასაკით ბევრად უფრო დაუდღულარია და სულ მალე ზღავს სოფონიბეს სიყვარულისათვის“.

ეს გესლიანი სიტყვები, წერს ტიტუს ლივიუსი, სიფაქსს ატყვევინა არა სიძულვილმა, არამედ ექვიანობამ, მაგრამ ისინი ღრმად ჩასწვდა სციპიონის გულსო.

მასინისამ და ლელიუსმა დაიპყრეს მთელი დასავლეთ ნუმიდია. დაბრუნებისთანავე სციპიონმა დაიბარა მასინისა და განუცხადა, რომ მისმა საქციელმა სოფონიბესთან დაკავშირებით ჩრდილი მიაყენა რომაელთა მეგობრის სახელს. რომაელმა სარდალმა ერთხელ კიდევ აუხსნა მასინისას ის ჭეშმარიტება, რომ გამარჯვებულის საკუთრება იყო არა მხოლოდ სიფაქსი, მისი ტახტი და ქალაქები, არამედ სიფაქსის მეუღლეც, რომელიც რომში უნდა წაეყვანათ, რადგან მხოლოდ რომის სენატს და ხალხს უნდა გადაეწყვიტა მათი მომავალი. მან გაათრახილა მასინისა, რომ ამ ერთადერთი შეცდომით არ დაეჩრდილა თავისი გმირობა და დამსახურება.

როცა სციპიონს უსმენდა, გაფითრებული მასინისა ცრემლებს იწმენდა. მან აღუთქვა სციპიონს, რომ ყოველთვის მისი მსახური იქნებოდა, თუკი ანგარიშს გაუწევდა მის მიერ სოფონიბესთვის შეცემულ პირობას. როცა სციპიონმა ამაზე დღემილით უპასუხა, იგი მიხვდა, რომ მისი და სოფონიბეს ერთად ყოფნა შეუძლებელი

იყო. ნუმიდიელი ბელადი ჩაიკეტა თავის კარავში და იქ დიდხანს ჯმინავდა, მერე დაუძახა თავის ერთგულ მონას, რომელსაც ყოველი შემთხვევისათვის საწამლავი თან დაჰქონდა, უბრძანა, რომ საწამლავი ღვინოში გაეხსნა და მიეტანა სოფონიბესთვის. თან დააბარა ეთქვა, რომ ყოველგვარი ცდის მიუხედავად, ვერ იხსნა იგი და ვერ შეუსრულა პირობა. მაგრამ ასრულებს მეორე ფიცს — ცოცხალს არ ჩაუგდება ხელში რომაელებს.

მონამ ზუსტად მოახსენა დანაბარები სოფონიბეს.

— მადლობელი ვარ ამ საჭორწინო საჩუქრისათვის, რადგან სხვა ვერაფრით ვერ შეძლო მასძინისამ მისი მეუღლის გახარება. ოღონდ იმასაც ახსოვდეს, რომ დღეს უფრო იოლად მოგვეცდებოდო, სამარის პირას ეს უკანასკნელი ქორწინება რომ არ მომხდარყო.

და ისე, რომ წარბიც არ შეუხრია, საწამლავით სავსე ფიალა ბოლომდე შესვა¹⁷¹.

კართაგენელებმა საზავო მოლაპარაკება გამართეს სციპიონთან. ამოსავალ პუნქტად მათ წამოაყენეს *Status quo ante bellum*. თან ჰანიბალს შეუთვალეს იტალიიდან დაბრუნებულყო.

საზავო მოლაპარაკება დამთავრდა ხელშეკრულებით, რომელიც რომაელმა ხალხმა და სენატმა დაამტკიცა. კართაგენი კარგავდა აფრიკის გარეთ მდებარე ტერიტორიებს, იხდიდა დიდ კონტრიბუციას და თმობდა ფლოტს. მაგრამ ამ დროს ჰანიბალი დაბრუნდა იტალიიდან და მდგომარეობა ისევე შეიცვალა.

ჰანიბალის დაბრუნება იტალიიდან.

ზამასთან ბრძოლა

იტალიაში ჰანიბალთან გამოცხადდნენ ელჩები, რომელთაც ჰანიბალს გადასცეს კართაგენის სენატის ბრძანება იტალიიდან დაბრუნების შესახებ. ეს მძიმე მდგომარეობიდან გამოსვლის შესანიშნავი შემთხვევა იყო. კართაგენელი სარდალი კარგად ხედავდა, რომ რომის სასწორი იტალიაში აშკარად გადაიხარა რომაელებისაკენ; მაგრამ ჰანიბალს არ გაუბედავებია გულისნადები. ტიტუს ლივიუსი გადმოგვცემს: „როდესაც ელჩებს უსმენდა, ჰანიბალი კენესოდა, კბი-

¹⁷¹ ტ ი ტ უ ს ლ ი ე ი უ ს ი. დასახელებული ნაშრომი, გვ. 366—368.

ლებს აღრქიალებდა და ლამის ტიროდა... ჰანიბალი დაამარცხეს, — ამბობდა ის, — მაგრამ რომაელმა ხალხმა კი არა, — შათი გაპყლავება მან შეძლო, ის დაამარცხა კართაგენის სენატმა, მისმა მზაკვრობამ და შურიანობამ¹⁷². ჰანიბალი მიუთითებდა იმ სიხარულზე, რომელსაც რომაელებში იტალიიდან მისი წასვლა გამოიწვევდა „მაგრამ — უფრო გახარებული იქნება ჰანონი, რომელიც მზად არის დაღუპოს მთელი კართაგენი, ოღონდ როგორმე ბოლო მოუღოს ჰამილქარ ბარკას გვარსო“¹⁷³.

ამის შემდეგ სარდალმა თავისი ჯარი გემებში ჩასხა. მოკავშირე მებრძოლების ის ნაწილი, რომელმაც არ ისურვა მასთან ერთად იტალიიდან წასვლა, დაახოცვინა, ან ტყვედ აქცია. ჰანიბალის მიერ განხორციელებული ეს აქტი, ცხადია, ჩრდილს აყენებს მას. დახოცა და ტყვედ აქცია ადამიანები, რომლებიც მასთან ერთად ინაწილებდნენ მძიმე ლაშქრობის ხვედრს. მაგრამ აქვე ისიც უნდა გავითვალისწინოთ, რომ იმავე მებრძოლებს, რომლებიც გუშინ კართაგენელთა მხარეზე იბრძოდნენ, ხვალ რომაელები ჰანიბალის წინააღმდეგ გამოიყენებდნენ. ისე რომ, კართაგენელი სარდლის ეს მოქმედება მხოლოდ მისი „პუნიკური მუხანათობით“ როდი უნდა ავსხნათ.

ჰანიბალმა ჯარი ლიბიაში, ლეპტისში გადმოსხა. დიდი ხნის განშორების შემდეგ იგი სამშობლოში დაბრუნდა.

ჰანიბალის ჩამოსვლამ კვლავ ასწია სამხედრო პარტიის პრესტიჟი და კართაგენელთა საბრძოლო აღტკინება გამოიწვია: „დავიწყებას მიეცა უკანასკნელი დამარცხებანი; ისევე აკიაფდა გამარჯვების იმედი. კართაგენელებს ბრმად სჯეროდათ ჰანიბალის გენიისა და ვერ გრძნობდნენ, რომ მისი ნიჭი ფუჭი იყო მოვლენათა მსვლელობის კანონზომიერებათა წინაშე“¹⁷⁴.

პოლიბიოსის გადმოცემით ჰანიბალი და სციპიონი ერთმანეთს შეხვედრიან.

ჰანიბალს შემდეგი სიტყვებით მიუმართავს სციპიონისათვის: „რადგან ჩვენ პირველი დავა და ომი ჯერ სიცილიის, ხოლო შემდეგ იბერიის გამო წამოვიწყეთ, რადგან, ბოლოს, ჩვენ, ბედის

¹⁷² ტ ი ტ უ ს ლ ი ვ ი უ ს ი, დასახელებული ნაშრომი, გვ. 370.

¹⁷³ ი ქ ე ე, გვ. 370.

¹⁷⁴ ლ ე ვ ა ნ ს ა ნ ი კ ი ძ ე, ანტიკური ქვეყნების ისტორია, პუნიკური ომების ეპოქა, თბილისი, 1963, გვ. 154.

უკუღმართობით მაინც შეუგონებელნი, იმდენად დავებრმავდით, რომ ერთ-ერთ ჩვენგანს ადრე ემუქრებოდა, ხოლო მეორეს ახლა ემუქრება მშობლიური მიწა-წყლის დაჯარჯვის საფრთხე, — ამიტომ აწმყო შულს ბოლო უნდა მოვუღლოთ, თუკი ამას ღმერთები ინებებენ. მე მზად ვარ ხელი ავიღო მტრობაზე, რადგან გამოცდილებამ შემაგნებინა, რაოდენ მუხთალია ბედი, თუ რაოდენ მცირე მიზეზის გამო განგება გადაწყვეტ გამარჯვებას ანიჭებს ან ერთ, ან მეორე მხარეს და ჩვენ უგონო ბაღღებებით გვათამაშებს. ოღონდ, პუბლიუს, ძლიერ ვშიშობ, რომ შენ არ დაჰყვები ჩემს რჩევას, მიუხედავად იმისა, რომ ჰეშმარიტებას მოგახსენებ, რადგან ჯერ კიდევ ახალგაზრდა ხარ, და შენს საქმეებს როგორც იბერიასში, ასევე ლიბიასში სასურველი დასასრული ჰქონდა. ამიტომ ბედის უკუღმართობა აქამდე საკუთარ თავზე არ გამოგიცდია. მაგრამ აი შენს წინაშეა ადამიანის ბედის ერთი ნათელი მაგალითი, შორეულ წარსულიდან კი არა — აწმყოდან: იგივე ჰანიბალი, რომელიც კანასთან ბრძოლის შემდეგ თითქმის მთელი იტალიის მფლობელი გახდა, ელვისებურად მიაღდა რომს და მისგან 40 სტადიონის დაშორებით დასცა ბანაკი, მოიწვია საბჭო იმის თაობაზე, თუ როგორ მოგქცეოდათ თქვენ და თქვენს ქალაქს. ახლა მე ლიბიასში ვარ, შენს წინაშე, რომელთან, ჩემი და კართაგენელთა სიცოცხლის თაობაზე მოსალაპარაკებლად. გირჩევ, დაიხსომო ბედის ეს სიმუხთლე და სიამაყემ არ აღგაზევოს, მიიღე ჩვეულებრივი მოკვდავის შესაფერისი გადაწყვეტილება, ესე იგი, ყოველთვის აიღე მეტი სიკეთისაგან და მცირე ბოროტისაგან. ნუთუ წინდახედულ ადამიანს კეთილი ნებით შეუძლია ამჯობინოს ზავს ისეთი ომი, რომელიც შენ გელის? მით უმეტეს, რომ გამარჯვების შემთხვევაშიც კი ვერ განადიდებ ვერც შენს სახელს, ვერც შენს ქვეყანას, და თუ დამარცხდი, საკუთარი ხელით დალუპავ აქამდე მოპოვებულ დიდებასა და პატივს. რა არის, ბოლოს და ბოლოს, ჩემი სიტყვის დედააზრი?

ყოველივე, რის გამოც ჩვენ რომაელებს ვებრძოდით, ეკუთვნოდა რომაელებს, კერძოდ, სიცილია, სარდინია, იბერია; და კართაგენელები ნურასოდეს დაიწყებენ ომს რომაელების წინააღმდეგ ამ მიწების გამო; რომაელებსვე ეკუთვნოდეთ ყველა სხვა კუნძული, რომლებიც მდებარეობენ იტალიასა და ლიბიას შორის. ასეთი პირობებით დადებული ხელშეკრულება, ამაში ღრმად ვარ დარწმუნ-

ნებული, სრულიად სამართლიანად დაიცავს კართაგენელთა უშიშროებას მომავალში, ხოლო შენ, აგრეთვე ყველა რომაელს, უსაზღვრო დიდების შარავანდელით შეგამკობთ“¹⁷⁵.

პოლიბიოსი გადმოგვცემს სციპიონის პასუხს. მასში ნათქვამია, რომ რომაელებმა კი არა, კართაგენელებმა გააჩაღეს ომი, რაც შესანიშნავად იცის ჰანიბალმა. რომის სენატი და ხალხი აღაშფოთა იმ მუხანათობამ, რაც კართაგენმა ჩაიდინა. „ჩვენ დავდეთ ხელშეკრულება, — ამბობს სციპიონი, — რომელშიც, გარდა იმისა, რაც შენ ჩამოთვალე, ნათქვამი იყო, რომ კართაგენელებს უსასყიდლოდ გაეთავისუფლებოდათ ყველა სამხედრო ტყვე, რომელებსათვის გადაეცათ ბანიანი გემები, გადაეხადათ ხუთი ათასი ტალანტი და მიეცათ მძევლები“¹⁷⁶.

ამრიგად, მხარეებმა ვერავითარ შეთანხმებას ვერ მიიღწიეს. იარაღს უნდა ეთქვა საბოლოო სიტყვა.

გადამწყვეტი ბრძოლა მოხდა ზამასთან. ამ ბრძოლის მნიშვნელობის შესახებ პოლიბიოსი წერს: „გამარჯვებული გაბატონდებოდა არა მარტო ლიბიასა და ევროპაში, არამედ სხვა, მსოფლიოს აქამდე ჩვენთვის ცნობილ ქვეყნებშიც. მალე ასეც მოხდა“¹⁷⁷.

ზამასთან ბრძოლამ სამხედრო ხელოვნების ისტორიაში ახალი ფურცელი ჩაწერა, აქ პირველად იქნა გამოყენებული ეშელონისებური ტაქტიკა, რომლის გამოყენებისას მომდევნო მწკრივის ენიჭება დამოუკიდებელი მოძრაობის საშუალება, შეუძლია თავისუფლად იმოქმედოს ფლანგიდან, ზურგიდან.

★ რომაელებმა ფლანგებზე განალაგეს ძლიერი ცხენოსანი ჯარი, რომელსაც ლელიუსი და მასინისა მეთაურობდნენ.

ჰანიბალმა მთელი ჯარის წინ სპილოები დააყენა. მათი რიცხვი 80-ზე მეტს შეადგენდა. ქვეითი ჯარის ფლანგებზე კი — კავალერია¹⁷⁸.


თითოეული მებრძოლი მხარის რიგებში 40 ათასი მებრძოლი იბრძოდა, მაგრამ კავალერიის მხრივ უპირატესობა სციპიონის მხა-

¹⁷⁵ პოლიბიოსი, დასახელებული ნაშრომი. ტ. II, გვ. 454—455.

¹⁷⁶ იქვე, გვ. 455—456.

¹⁷⁷ იქვე. გვ. 457.

¹⁷⁸ იქვე. გვ. 458.



ბრძოლა ზამასთან.

რეზე იყო. ამიტომ პანიბალი ვარაუდობდა სპილოებითა და ქვეითი ჯარით მოეპოვებინა მტერზე გამარჯვება, ცხენოსან ჯარს კი უბრძანა გაეტყუებინა მტრის კავალერია რაც შეიძლება შორს, რათა მას ბრძოლისათვის ვერ მიესწრო.

ბრძოლა დაიწყო. პანიბალმა მეორე ხაზი ორად გაყო და შეუდგა რომაელთა ფლანგების გარშემოვლას, მაგრამ სციპიონმა ასეთივე მოქმედებით უპასუხა. ისე რომ, ბრძოლამ ორი გაგრძელებული ხაზის ფრონტალური შეჯახების სახე მიიღო. კართაგენელები წარმატებით იბრძოდნენ, მაგრამ რომაელთა კავალერიამ ზურგიდან დაარტყა მტერს. კართაგენელთა დამარცხება გარდუვალი გახდა. „რომაელებმა მოკლულთა სახით 1500 კაცი დაკარგეს. კართაგენელთაგან 10 ათასზე მეტი დაეცა ბრძოლაში და ცოტა უფრო ნაკლები ტყვედ ჩავარდა“¹⁷⁹. ★

პანიბალი მცირერიცხოვანი ჯარით ჰადრუმეტუმში გაიქცა. იგი დამარცხდა, მაგრამ ამ დამარცხებას ოდნავადაც არ დაუჩრდილავს მისი სახელი, ზუსტად შენიშნავს ამის შესახებ პ. დელბრიუჟი: „ისტორია ორ უდიდეს მხედართმთავარს იცნობს, პანიბალსა და ნაპოლეონს, რომელთა სიდიადესაც სრულებით ვერ ჩრდილავს უკანას-

¹⁷⁹ პ. კ. ლ. ი. ბ. ი. ს. ი., დასახელებული ნაშრომი, ტ. II, გვ. 462.

კნელი მარცხი. მათი ღიღების წინაშე ისტორია ყოველთვის განი-
ცდიდა ცდუნებას განესაჯა მათი დამამარცხებელნი უფრო მკაცრად,
ვიდრე თვით ისინი, რათა არ შექმნილიყო ისეთი შთაბეჭდილე-
ბა, თითქოს გამარჯვებული დამარცხებულზე მალლა დგას¹⁸⁰. *

ზამა ომის დასრულების საბაზად იქცა. სციპიონის მიერ 203 წელს წამოყენებულ პირობებს დაემატა შემდეგი მუხლები: კართა-
გენს უფლება არ ჰქონდა რომაელების დაუქითხავად დაეწყო ომი.
მასინასას სამეფო უნდა აღმდგარიყო და მისთვის უნდა დაებრუნე-
ბინათ წინაპართა ტერიტორიები. კართაგენელებს უნდა გადაეცათ
რომაელებისათვის ტყვეები, ყველა ზომალდი და სპილო, უნდა შე-
ენახათ რომის საოკუპაციო არმია 3 თვის განმავლობაში და გადა-
ეხადათ კონტრიბუცია 10 ათასი ტალანტის რაოდენობით 50 წლის
განმავლობაში. კართაგენელებს უფლება ეძლეოდათ ემართათ ლა-
ბიის ქალაქები, რომელნიც მათ ემორჩილებოდნენ, „იცხოვრებდნენ
საკუთარი კანონებით და ადათებით, არ ეყოლებოდათ ჩაყენებული
რომაული გარნიზონი“¹⁸¹.

ზავი ერთადერთი გამოსავალი იყო, ასე ესმოდა შექმნილი
მდგომარეობა ჰანიბალსაც. მაგრამ კართაგენში მას აღმოუჩნდნენ
მოწინააღმდეგენიც.

ტიტუს ლივიუსი გადმოგვცემს, რომ როცა ელჩებმა სახალხო
კრებას გააცნეს გამარჯვებულთა მოთხოვნები, ერთ-ერთი წარჩინე-
ბული მოქალაქე, სახელად ჰისგონი, გამოვიდა სახალხო კრებაში
და მოითხოვა, რომ უარი ეთქვათ ასეთ დამამცირებელ ზავზე. აღელ-
ვებული და შეძრწუნებული ხალხი მას უსმენდა და მხარი დაუჭირა.
მაგრამ ჰანიბალმა მიიზიბინა ორატორის კათედრასთან, ხელი ჩაავლო
მხრებში ჰისგონს და თავდაღმა უბიძგა. ამ ამკარა, თავისუფალ სა-
ხელმწიფოში მანამდე გაუგონარმა ძალადობამ აღაშფოთა კრება,
ხალხი მრისხანედ აგუგუნდა, შეწუხებულმა და აღვზნებულმა ჰა-
ნიბალმა თავის მართლება დაიწყო:

— ცხრა წლისა ვიყავი, — დაიწყო მან, — როცა სამშობლოს
გამოვეთხოვე და მისგან მოშორებით გავატარე ოცდათექვსმეტი
წელი. სამხედრო ხელოვნებას, მე მგონი, კარგად დავეუფლე, მაგ-
რამ სამოქალაქო წესები დი კანონები თქვენ უნდა მასწავლოთ.

¹⁸⁰ ჯ. დ ე ლ ბ რ ი უ კ ი, დასახელებული ნაშრომი, გვ. 312.

¹⁸¹ ბ თ ლ ი ბ ი ო ს ი, დასახელებული ნაშრომი, ტ. II, გვ. 465.

მან ბოდიში მოუხადა ჰისგონს, მერე კიდევ გაიმეორა თავისი მოსაზრებანი და ამტკიცებდა, რომ კართაგენისათვის ჰაერივით საჭირო იყო ზავი, როგორი უსამართლოც უნდა ყოფილიყო ის¹⁸².

საზავო ხელშეკრულება 201 წელს რატიფიცირებულ იქნა რომში. სციპიონს ბრწყინვალე ტრიუმფი გადაუხადეს.

კ. მარქსი მეორე პუნიკურ ომში კართაგენელების დამარცხების შესახებ წერდა: „...რომაელების გადასხმა აფრიკაში II პუნიკური ომის დროს მხოლოდ მას შემდეგ შეიქნა შესაძლებელი, რაც კართაგენის არმიის საუკეთესო ნაწილი მოისპო ესპანეთსა და იტალიაში, ხოლო პუნიკური ფლოტი გაქვებულ იქნა ხმელთაშუა ზღვიდან; თავდასხმა თავდასხმა კი არ იყო, არამედ მეტად სოლიდური. ოპერაცია, რომელიც ხანგრძლივი და რომისათვის კეთილსასურველი ომის სრულიად ბუნებრივ დამთავრებას წარმოადგენდა“¹⁸³.

ამრიგად, რომმა გაიმარჯვა. მისი ფედერაცია უფრო ხალხმრავალი, მტკიცე, ერთიანი და ეკონომიკურად ძლიერი აღმოჩნდა, ვიდრე კართაგენის კოლონიური იმპერია. ჰანიბალის გეგმა, რომელიც ნავარაუდღევი იყო რომის ფედერაციის ერთიანობის სისუსტეზე, ჩაიფუშა; რომელ მებრძოლთა მორალური დონე უფრო მაღალი აღმოჩნდა, ვიდრე კართაგენისა, რადგან ომის უმეტესი ხნის განმავლობაში რომაელები თავიანთი დამოუკიდებლობისათვის იბრძოდნენ.

ვ. ი. ლენინი, როცა მიუთითებდა ომში ძირითად მოქმედ ფაქტორებზე, წერდა: „ომში იმარჯვებს ის, ვისაც მეტი რეზერვები ჰყავს. ძალის მეტი წყაროები აქვს, მეტი გამძლეობა აქვს ხალხის სიღრმეში“¹⁸⁴.

II პუნიკური ომი რომის მონათმფლობელური რესპუბლიკის უდიდესი გამოცდა იყო. მისმა მატერიალურმა და სულიერმა ძალებმა წარმატებით ჩააბარეს ეს გამოცდა. ომში დროებითად მოქმედმა ფაქტორებმა ჰანიბალს გადაწყვეტი გამარჯვება ვერ მოუპოვა. კართაგენელმა ომის ხელოვანმა, ისარგებლა მოულოდნელობით და თავისი ჯარის დროებითი უპირატესობით მან მნიშვნელოვან წარმატებებს მიაღწია, მაგრამ საბოლოოდ დამარცხდა.

¹⁸² ტ ი ტ უ ს ლ ი ვ ი უ ს ი, დასახლებული ნაშრომი. გვ. 380.

¹⁸³ ს. ი. კოვალოვი, მარქსი და ენგელსი ანტიურობის შესახებ. გვ. 42

„ყოველ ომში, — წერს ვ. ი. ლენინი, — გამარჯვება საბოლოო ანგარიშით განპირობებულია იმ მასების სულისკვეთების მდგომარეობით, რომელნიც ბრძოლის ველზე ღვრიან თავიანთ სისხლს. ომის სამართლიანობაში დარწმუნება, თავის თანამომკმეთა საკეთილდღეოდ საკუთარი სიცოცხლის განწირვის აუცილებლობის შეგნება ამხნევებს ჯარისკაცებს და აიძულებს მათ გადაიტანონ გაუგონარი სიმძიმეები...

მასების მიერ ომის მიზნებისა და ამ მიზნების შეგნებას უდიდესი მნიშვნელობა აქვს და ეს უზრუნველყოფს გამარჯვებას“¹⁸⁵.

ფრ. ენგელსი შეფასებას აძლევს ომში სახელმწიფოთა ეკონომიკურ მდგომარეობას და გენიალურ მხედართმთავართა როლს. იგი წერს, რომ ძალას განსაზღვრავს სახალხო მეურნეობის მდგომარეობა და არაფერი ისე არ არის დამოკიდებული ეკონომიკურ მდგომარეობაზე, როგორც არმია და ფლოტი. გენიალურ მხედართმთავართა გენია კი არ განსაზღვრავს ომის ბედს, არამედ კარგი იარაღის გამოგონება და ცვლილებანი არმიაში. გენიალურ მხედართმთავართა დიდ დამსახურებად ფრ. ენგელსს მიაჩნია ის, რომ გონივრულად შეუხამონ ერთმანეთს ქვეყნის ეკონომიკური ძლიერება, ერთა მხრივ და, მეორე მხრივ, ახალი იარაღი და ახალი ჯარისკაცები¹⁸⁶.

ჰანიბალის გენიამ კართაგენს გადაშწყვეტი გამარჯვება ვერ მოუპოვა. რომს, მართალია, ომის დიდ მანძილზე არ ჰყავდა ისეთი ბრწყინვალე სარდალი, როგორიც ჰანიბალი იყო, მაგრამ მეორე პუნიკური ომის მსვლელობაში რომში გამოჩნდა უდავოდ ნიჭიერი სარდალი სციპიონ აფრიკელის სახით.

ჰეგელი სციპიონს იმ ბედნიერ ინდივიდუულობა რიცხვს აკუთვნებს, რომლებიც დიდი საქმეებისათვის არიან მოწოდებულნი¹⁸⁷. სციპიონმა შეძლო რომის არმიის სტრატეგია და ტაქტიკა შეეფარდებინა რომის დაუსრუტელი რეზერვებისა და ახალი ჯარისკაცებისათვის, რომელნიც ხანგრძლივი ომის შედეგად სახალხო მილიციელებიდან კადრის ჯარისკაცებად იქცნენ.

¹⁸⁵ ვ. ი. ლენინი, ტ. 31, გვ. 154.

¹⁸⁶ ფრ. ენგელსი, დასახელებული ნაშრომი, ტ. 1, გვ. 169—170.

¹⁸⁷ ჰეგელი, დასახელებული ნაშრომი, გვ. 290.

რომმა გაიმარჯვა იმიტომ, რომ მისი ეკონომიკა უფრო ძლიერი აღმოჩნდა კართაგენისაზე; წარმოების მონათმფლობელური წესი იქ ჯერ კიდევ არ შეიცავდა იმ გამწვავებულ წინააღმდეგობებს, რომლებიც კართაგენს ღრღნიდა. რომის პოლიტიკური წყობილება უფრო რეალურ საფუძველზე იდგა, ვიდრე კართაგენისა.

მეორე პუნქტურ ომს უდიდესი საერთაშორისო მნიშვნელობა ჰქონდა. ამ ომის შემდეგ ხმელთაშუაზღვეთის სახელმწიფოებს შორის რომის ჰეგემონობა განუყოფელი იყო. მისი დაპყრობითი პოლიტიკა ამიერიდან კიდევ უფრო აშკარა და აღვირახსნილი გახდა.

„მეორე პუნქტურმა ომმა, — წერს ჰეგელი, — დაამხო კართაგენის ძლიერება. ამ სახელმწიფოს სტიქია ზღვა იყო; მაგრამ ოდითგანვე არ გააჩნდა საკუთარი ტერიტორია, არ შეუქმნია ერი, და არ ჰყავდა ეროვნული არმია. მისი არმია დამორჩილებული და მოკავშირე ერების რაზმებისაგან შედგებოდა და მაინც ასეთი არმიით, რომელიც სულ სხვადასხვა ეროვნებისაგან შედგებოდა, დიდმა ჰანიბალმა კინალამ დაამხო რომი. მან, ყოველგვარი დახმარების გარეშე, მხოლოდ თავისი გენიალობა დაუპირისპირა რომაელთა აბტანობასა და სიმტკიცეს იტალიაში 16 წლის განმავლობაში; მართალია, ამ დროის მანძილზე სციპიონებმა დაიპყრეს ესპანეთი და ურთიერთობა დაამყარეს აფრიკელ მეფეებთან. ბოლოს ჰანიბალი იძულებული გახდა წასულიყო თავისი სამშობლოს დასახმარებლად, რომელსაც საფრთხე დაემუქრა... და 36 წლის განმორების შემდეგ კვლავ იხილა მშობლიური ქალაქი, რომლისთვისაც თვითონ უნდა ერჩია ზავი. ამრიგად, მეორე პუნქტური ომის შედეგად დაწყარდა რომის ურყევი ბატონობა კართაგენზე...“¹⁸⁸.

ზამასთან დამარცხების შემდეგ.

ჰანიბალის სიკვდილი

ზამასთან დამარცხების შემდეგ ჰანიბალს იმედი არ გადაუწყვეტია. იგი რომის წინააღმდეგ ახალ ომზე ფიქრობდა, რომელშიც ელინისტური აღმოსავლეთის სახელმწიფოების ჩაბმის იმედი ჰქონდა. ჰანიბალის ფართო პორიზონტის გონება მაშინდელ მსოფლიოში

ხედავდა ძალებს, რომლებიც ანტირომაულ გაერთიანებაში უნდა ჩაება.

ჩანს, სამხედრო პარტია და დემოკრატია კართაგენში კვლავ ძლიერი იყო, რადგან ზამას ბრძოლის შემდეგ ჰანიბალს სამხედრო ხელმძღვანელად ვხედავთ. მან წესრიგში მოიყვანა მთელი ის ტერიტორია, რომელიც ხელშეკრულების შემდეგ კართაგენელთა ხელში აღმოჩნდა. მაგრამ მტრები დიდხანს ვერ მოითმენდნენ მის ყოფნას კართაგენის შეიარაღებული ძალების სათავეში, ამიტომ გადაინაცვლა ქვეყნის სამეურნეო და ფინანსურ საქმეებზე.

ჰანიბალმა თავისი მოქმედება აგრარული პარტიის მსხვილი მესაკუთრეების წინააღმდეგ მიმართა, მოაწესრიგა სახელმწიფოს ფინანსური მდგომარეობა და სასამართლო საქმეები. მან, როგორც უმადლესმა მოსამართლემ, მოითხოვა რესპუბლიკის ხაზინადარს პასუხი დაეცა ხაზინის საქმიანობის შესახებ. ხაზინადარმა უარი განაცხადა. ჰანიბალმა აიძულა იგი ტრიბუნალში გამოცხადებულყო. ეს კი ნიშნავდა ასთა საბჭოს წინააღმდეგ გალაშქრებას, რადგან ხაზინადარი მისი წევრი იყო. ჰანიბალი ამას არ შეჩერებულა და გადაწყვიტა სახალხო კრებაზე დაყრდნობით გაეტარებინა კანონი, რომლის მიხედვითაც 100-ის საბჭო ყოველ წელიწადს უნდა გადაჩეულყო. ეს აქცია პირდაპირ იყო მიმართული ამ საბჭოში მოკალათებული ჰანონის პარტიის წევრთა წინააღმდეგ.

კართაგენელი საზოგადოებრივი განაგრძობდა ქვეყნის გაჯანსაღების კურსს. მან გაწმინდა საბაჟო მმართველობა და ქვეყნის ხაზინის გაჯავალ-შემოსავალი მკაცრ კანონს დაუმორჩილა.

ჰანიბალის ცხოვრების ეს პერიოდი დაუღლო საფუძვლად პროგრესულმა ინგლისელმა მწერალმა ჯ. ლინდსეიმ თავის რომანს. ნაწარმოების წინათქმაში ა. სარუხანიანი წერს: „კართაგენის ისტორია ლინდსეისათვის იმის კლასიკური მაგალითია, თუ მმართველი კლასები რა იოლად დალატობენ სამშობლოს, როცა იქ იმარჯვებენ დემოკრატიული ძალები“¹⁸⁹. თვით ლინდსეი კი რომანის შესახებ წერს, ამ ისტორიის ხასიათი ისე საოცრად გავს თანამედროვე ევროპის სტილს, რომ მკითხველს შეიძლება ეჭვი შეეპაროს, თითქოს შე გამოვიგონე ფაქტები. მაგრამ ამაში მკითხველმა მე კი არ უნდა

¹⁸⁹ Джек Линдсей. Ганнибал. Перевод с английского И. Ермашевой. М., 1962 г., с. 9.

დამდოს ბრალი, არამედ მმართველი კლასების უცვლელ ბუნებას¹⁹⁰.

შწერალი უარყოფს ზოგიერთი ისტორიკოსის აზრს, ვითომცდა კართაგენელები მხოლოდ გამდიდრების სურვილით შეპყრობილი ფილისტერები იყვნენ და წერს, რომ ასეთი ხალხი ვერ წარმოშობდა ჰანიბალის მსგავს სარდალს, ვერ გამოიჩინდა ბრწყინვალე თვისებებს ზღვაოსნობაში. ფილისტერს არ შეუძლია ისე უყვარდეს მიწა, როგორც უყვარდათ იგი კართაგენელებს, რომლებმაც დაგვიტოვეს მაგონის შესანიშნავი ტრაქტატი. დაბოლოს, არც ერთ ხალხს, თუკი ის ფილისტერებისაგან არის შემდგარი, არ შეუძლია ისეთი თავგანწირვით იბრძოლოს, როგორც იბრძოდნენ კართაგენელები¹⁹¹. რომანის ერთ-ერთი გმირი ბარაკი ჰანიბალს ალექსანდრე მაკედონელს ადარებს, ხოლო ჰანიბალი თავისი ეპოქის უდიდეს პროგრესულ მოაზროვნედ წარმოგვიდგება. მონობა ბოროტებაა, მხოლოდ შეგობრობაშია ნამდვილი სათნოებაო, ამბობს ლინდსეისეული ჰანიბალი¹⁹².

ეპოქის ღრმა ცოდნით აგვიწერს ავტორი ჰანიბალის სუფეტად ყოფნის დროს ოლიგარქიის მიერ მოწყობილ ხრიკებს. საკმარისი იყო ჰანიბალს რაიმე დოკუმენტი მოეთხოვა, რომ უპასუხებდნენ, დაიკარგა, ან განადგურდა, ანდა საერთოდ არ არსებობდაო. რომელი საქმის გამოძიებასაც ხელი მოჰკიდა, უთხრეს, მოხელე, რომელიც ამ საქმეს იძიებდა, გარდაიცვალაო. უკანასკნელი წლის განმავლობაში რამდენიმე ხანძარი გაჩნდა, რომლებმაც მნიშვნელოვანი დოკუმენტები გაანადგურეს. თანამდებობის მოხელეები ყველაფერს აკეთებდნენ იმისათვის, რომ ხელი შეეშალათ გამოძიებისათვის. ჰანიბალს ეჭვი ჰქონდა, — წერს ლინდსეი, — რომ აღმოაჩენდა კორუფციას, და როგორც მის შედეგს არსებული მმართველობის სისტემის სრულ უეარვისობას დაამტკიცებდა, მაგრამ სახელმწიფო აპარატი თუ ასე იქნებოდა გადაქცეული მმართველ ოჯახების გამდიდრების საშუალებად, ამას ვერ წარმოიდგენდა. მისთვის ნათელი შეიქნა, რომ კორუფციამ თავიდან ბოლომდე გააჩანაგა მთელი სახელმწიფო აპარატი. ასთა საბჭოს მთავარი მიზანი იყო გაბატონე-

¹⁹⁰ დ. ლინდსეი, დასახელებული ნაშრომი, გვ. 16.

¹⁹¹ იქვე, გვ. 20.

¹⁹² იქვე, გვ. 60.

ბული ოჯახების მდგომარეობისა და ისეთი წყობის შენარჩუნება, როდესაც ყველა გადასახადი და ბაჟი დაეკისრებოდათ წვრილ ვაჭრებს, მრეწველებს, მიწათმოქმედებსა და ხელოსნებს. იმისათვის, რომ მმართველ ოჯახებს ასეთი ხელსაყრელი პირობები შექმნოდათ, საჭირო იყო სახელმწიფო აგენტებისა და თანამდებობის პირების განშტოებული ქსელი. ისინი ყველანი მკიდროდ იყვნენ დაკავშირებული, რადგან დატაცებისა და ქრთამის აღების ფართო საშუალება ეძლეოდათ¹⁹³.

ჰანიბალი დიდხანს ვერ დარჩებოდა კართაგენში. მის წინააღმდეგ, თავის მხრივ, აქტიური საქმიანობა გააჩაღა აგრარულმა პარტიამ, რომელსაც რომში ძლიერი მომხრეები ჰყავდა. ჩანს, ამ პარტიამ რომაელთა ყურადღება გაამახვილა ჰანიბალის რომის საწინააღმდეგო გეგმებზე და რომმა, ვითომდა რესპუბლიკისა და მასინისას შორის დავის მოსაწესრიგებლად, კართაგენში ელჩობა გაგზავნა, რომელსაც ხელთ უნდა ეგდო ჰანიბალი. მაგრამ კართაგენელმა სარდალმა დაასწრო და 195 წელს დატოვა სამშობლო. კართაგენის სენატმა ჰანიბალი სამშობლოს მტრად გამოაცხადა. მის მთელს ქონებას კონფისკაცია უყვეს, სახლი დაუნგრის და ნაცარტუტად უქციეს. ლტოლვილ სარდალს ორი ხომალდი გამოუყენეს მდევრად. მაგრამ ჰანიბალი უკვე მიუწვდომელი იყო. ჯერ მან შეიარა კუნძულ კერკინაზე, შემდეგ ტვიროსში გაჩერდა ცოტა ხანს. აქ დიდის ზეიმით მიიღეს როგორც ეროვნული გმირი და შემდეგ გასწია სირიისაკენ, სადაც ამ დროს ანტიოქე III შეფობდა. გენიალური სარდალი ფიქრობდა სირიის მეთაურობით რომის წინააღმდეგ გაერთიანებინა ელინისტური აღმოსავლეთი. მაგრამ ჰანიბალის ეს გეგმა არარეალურ ნიადაგზე იდგა.

სირია ანტიოქე III-ის (223—187 წწ.) დროისათვის განთქმული ხელეკიდების სახელმწიფოს აჩრდილს წარმოადგენდა. ამ დროისათვის მას ჩამოსცილდა: ბითინია, კაპადოკია, პონტო, პერგამონი და სხვა სახელმწიფოები. ანტიოქეს კარზე თავაზიანად მიიღეს სახელგანთქმული სარდალი.

პირველ სირიულ ომში (192—189 წწ.) ანტიოქემ რომაელების წინააღმდეგ ბრძოლაში თავდაპირველად გარკვეულ წარმატებებს მიაღწია, მაგრამ მისი ვარაუდი, რომ ზმელთაშუაზღვეთის

¹⁹³ ჟ. ლინდსეი, დასახელებული რომანი, გვ. 96—97.

ყველა სახელმწიფო გაერთიანდებოდა მის გარშემო, არ გამართლდა. ზოგიერთი პირიქით მოიქცა. მაკედონია და აქეის კავშირი რომაელთა მხარეზე გადავიდნენ. ასევე მოიქცნენ პერგამოსის მეფე ევმენოს II, როდოსელები, ქიოსელები, სამოსელები. ამას ზედ დაერთო ანტიოქე. მესამის მოუქნელი და დაუკვირვებელი მოქმედება. კორნელიუს ნებოტის მიხედვით „ჰანიბალი კარგად ხელავდა, რომ ანტიოქე ერთობ არაოსტატურად იქცეოდა“¹⁸⁴. ანტიოქემ იმის მაგივრად, რომ მთელი ძალით გამოეყენებინა ჰანიბალის დიდი სამხედრო ნიჭი და მისი უდიდესი გამოცდილება, ჩამოაშორა იგი ძირითად ბრძოლებს და მეორეხარისხოვანი ოპერაციების სარღლობა მიანდო. მაგალითად, ჰანიბალს დავალებული ჰქონდა ერთერთი ესკადრის ხელმძღვანელობა იმ ფლოტის შემადგენლობაში, რომელსაც ნაბრძანები ჰქონდა რომაელთა ფლოტის წინააღმდეგ ბრძოლა. ეს იმით იყო გამოწვეული, რომ პატივმოყვარე მეფე შიშობდა ჰანიბალს არ დაეჩრდილა მისი სახელიო.

190 წელს მაგნეზიასთან ბრძოლაში ანტიოქე III დამარცხდა. აზრის დიდი ნაწილი ტავრამდე რომაელთა ხელში გადადიოდა. რომაელებმა ანტიოქესთან დადებულ ხელშეკრულებაში სპეციალურ პუნქტად შეიტანეს საკითხი ჰანიბალის გაცემის შესახებ. მასში ნათქვამია: „ანტიოქე ვალდებულია კისრულობს, თუ მისთვის შესაძლებელი იქნება, გასცეს კართაგენელი ჰანიბალი“¹⁸⁵.

ლტოლვილი სარდლის გაჩერება სირიაში აღარ შეიძლებოდა. იგი კუნძულ კრეტაზე წავიდა, მაგრამ ვერც იქ ჰპოვა სასურველი გარემო და წასვლა არჩია ბითონიის მეფე პრუსიასთან, რომელსაც ბრძოლა ჰქონდა რომაელების მეფობაზე ევმენოსთან, პერგამოსის მეფესთან. ნებოტის გადმოცემით, ჰანიბალმა პერგამოსელებთან ბრძოლაში შზამიანი გველები გამოიყენა, რომლებიც ქოთნებში ჰყავდათ ჩამწყვდეული ბითონიელებს.

ბითონიელთა გამარჯვებებმა რომაელთა ყურადღება მიიქცია. მათ დაინახეს, რომ ბითონიელთა არმიას გამოცდილი სამხედრო პირი ხელმძღვანელობდა. მალე კი დარწმუნდნენ, რომ პრუსიასის არმიას ჰანიბალი სარდლობდა. რომაელებმა პრუსიასთან ვაგზაუნეს

¹⁸⁴ Корнелий Непот. Жития славных генералов. Перевод с латинского Василия Лебедева, С.-Петербург, 1748, кн. XXIII, 8.

¹⁸⁵ ჰოლიბოთი, დასახელებული ნაშრომი, ტ. II, გვ. 694.

ტიტუს ფლამინინუსი—გამოცდილი, ეშმაკი, პატივმოყვარე ადამიანი¹⁹⁶. პლუტარქეს გადმოცემით, იგი სენატმა ბითვინიაში მიავლინა სულ სხვა საქმეების გამო, მაგრამ შეიტყო თუ არა იქ ჰანიბალის ყოფნის შესახებ, გადაწყვიტა მისი თავიდან მოშორება. ამ დროისათვის ჰანიბალი ბითვინიის ზღვისპირა სოფელ ლიბისოზში ცხოვრობდა. იგი თურმე მაინც არ ენდობოდა თავის მფარველ მეფეს და თავისი სახლიდან რამდენიმე საიღუმლო ხერელი გაუკეთებია. როდესაც გაუგია ფლამინინუსის ბრძანების შესახებ, ჰანიბალს გაპარვა მოუნდომებია, მაგრამ, ჩანს, გაცემული ყოფილა და ველარ მოუხერხებია. იმედდაკარგულმა მოხუცმა რომაელთა ტყვეობას სიკვდილი არჩია და საწამლავი შესვა, რომელსაც იგი სულ თან ატარებდა. პლუტარქეს გადმოცემით, ჰანიბალს შემდეგი სიტყვები წარმოუთქვამს სიკვდილის წინ: „მე ავაცილებ უდიდეს საზრუნავს რომაელებს, რომლებსთვისაც მძიმე და მოსაბეზრებელი იყო ეცლიათ საძულველი მოხუცისათვის სიკვდილი. მაგრამ ტიტუსის გამარჯვება შესაშური როდია. იგი უღირსი მემკვიდრეა თავისი წინაპრებისა, რომელთაც თავიანთ მტერსა და დამამარცხებელს პიროსს აცნობეს, რომ მისთვის გამზადებული საწამლავი არ დაეღლია“¹⁹⁷.

პლუტარქე ლიბისოზში მცხოვრებ ჰანიბალს „სიბერისაგან ფრთაშემოძარცულ მოშინაურებულ ჩიტს“¹⁹⁸ აღარებს, რომელიც ტიტუს ფლამინინუსის პატივმოყვარეობის მსხვერპლი შეიქნა. ცხადია, აქ პლუტარქე აჭარბებს. ჰანიბალი თავისი სიცოცხლის უკანასკნელ წუთამდე რომაელთა საშიში მტერი იყო და მათთვის გარკვეული ზიანის მიყენება ყოველთვის შეეძლო. ამიტომ არ შეიძლება, რომ რომის მმართველი წრეები მისი ფიზიკური მოკპობით დაინტერესებული არ ყოფილიყვნენ. ამ მისიის შესრულება მათ ტიტუს ფლამინინუსს დაავალეს, რომელმაც იგი სისრულეში მოიყვანა.

ასე დაამთავრა თავისი სიცოცხლე ჰანიბალმა, გენიალურმა კართაგენელმა სარდალმა, რომლის სახელიც ისტორიამ ღიდების შარავანდელით შემოსა.

¹⁹⁶ პ ლ უ ტ ა რ ქ ე, დასახელებული ნაშრომი, ნაწ. V, გვ. 303.

¹⁹⁷ ი ქ ვ ე, გვ. 302—303.

¹⁹⁸ ი ქ ვ ე, გვ. 303.

ამის შემდეგ კართაგენი კვლავ მომძლავრდა, მაგრამ ძველის აჩრდილიდა იყო. თუმცა რომაელებს იგი მაინც განსაკუთრებით აღინიშნებდა. საბოლოოდ რომმა სისრულეში მოიყვანა კატონის სიტყვები: „კართაგენი უნდა დაინგრეს“ კარგად შენიშნავს ამის თაობაზე ჰეგელი:

„კართაგენი კვლავ გაძლიერდა და რომაელთა შური გამოიწვია. დიდო ხნის წინააღმდეგობის შემდეგ იგი აიღეს და გადაწვეს... კართაგენის დამხობა და საბერძნეთის დაპყრობა ის გადამწყვეტი მომენტები იყო, რომლებსაც უკავშირდება რომაელთა ბატონობის განვრცობა“¹⁹⁹.

ჰანიბალი დამარცხდა, მიუხედავად იმისა, რომ მისი, როგორც სარდლის, გენიალობა თანამედროვეებმა და მომდევნო თაობებმა უდავოდ აღიარეს.

პლესხანოვის აზრით, პიროვნებებს შეუძლიათ გარკვეული ზეგავლენა მოახდინონ საზოგადოებაზე, ზოგჯერ ღრიალ მნიშვნელოვანიც: „პიროვნების ხასიათი, — წერს პლესხანოვი, — საზოგადოებრივი გზნებითარების „ფაქტორს“ წარმოადგენს მხოლოდ იქ, მხოლოდ მაშინ და მხოლოდ იმდენად, სადაც, როცა და რამდენადაც მას ამის ნებას აძლევენ საზოგადოებრივი ურთიერთობანი“²⁰⁰.

ჰანიბალის მაგალითი კიდევ ერთი ილუსტრაციაა იმისა, რომ პიროვნებებს „შეუძლიათ შეცვალონ მოვლენათა ინდივიდუალური ფიზიონომია და მათი ზოგიერთი კერძო შედეგები, მაგრამ მათ არ ძალუძთ შეცვალონ მათი საერთო მიმართულება, რომელსაც სხვა ძალები განსაზღვრავენ“²⁰¹.

ვ. ი. ლენინი პიროვნების როლის შესახებ ისტორიაში, წერდა: „ისტორიული აუცილებლობის იდეაც სრულიადაც არ უარყოფს პიროვნების როლს ისტორიაში: მთელი ისტორია შედგება სწორედ იმ პიროვნებათა მოქმედებისაგან, რომელნიც უეჭველად მოღვაწეები არიან“²⁰².

ჰანიბალი სწორედ ასეთი დიდი მასშტაბის მოღვაწე იყო.

¹⁹⁹ ჰეგელი, დასახელებული ნაშრომი, გვ. 289—290.

²⁰⁰ ვ. ი. პლესხანოვი, ისტორიაში პიროვნების როლის საკითხისათვის, სახელგამი, 1939, გვ. 37.

²⁰¹ იქვე, გვ. 41.

²⁰² ვ. ი. ლენინი, ტ. I, გვ. 176.

შ ი ნ ა ა რ ს ი

წინათქმა	3
წყაროები და ისტორიოგრაფია	5
ჰანიბალის სამშობლო — კართაგენი	6
I პუნიკური ომიდან II პუნიკურ ომამდე. ჰანიბალის ფიცი.	18
ჰანიბალი კართაგენელთა ჯარის სათავეში	24
კანას ბრძოლა	57
ომის მსვლელობა კანას შემდეგ	64
ჰანიბალი რომის კარიბჭესთან	70
მდგომარეობა ესპანეთში	76
ბრძოლა მეტავრასთან	84
ჰანიბალის დაბრუნება იტალიიდან. ზამასთან ბრძოლა	91
ზამასთან დამარცხების შემდეგ. ჰანიბალის სიკვდილი	99

რედაქტორი პროფ. გ. გოზალიშვილი
გამომცემლობის რედაქტორი ნ. შიქაძე
გარეკანის მხატვარი ნ. პაპიაშვილი
მხატვრული რედაქტორი ე. სულთანაშვილი
ტექნიკური რედაქტორი მ. ოსიტაშვილი
უფ. კორექტორი ნ. დგებუაძე
კორექტორი ნ. დოღბაძე
გამომწვევები ნ. დოგუზაშვილი

უაღაეცა წარმოებას 2. III. 77 წ. ხელმოწერილია დასაბეჭდად 14. VII. 77 წ.
ქალაღლის ზომა 60×84¹/₁₆; საბეჭდი ქალაღლი № 2. პირობითი ნაბეჭდი
თაბახი 6,28. საღარიცხეო-საგამომცემლო თაბახი 5,52.
უე 00446 ტირაჟი 2000 შეკვეთა № 851
ფასი 18 კაბ.

გამომცემლობა „განათლება“, თბილისი, მარჯანიშვილის, 5
Издательство «Ганатлеба» Тбилиси, Марджанишвили, 5

1977

საქ. სსრ მეცნ. აკადემიის სტამბა, თბილისი, 380060, კუტუზოვის ქ., 19
Типография АН Груз. ССР, Тбилиси, 380060, ул. Кутузова, 19